

萬 有 文 庫

第 二 集 七 百 種

王 雲 五 主 編

宋 詩 紀 事

(四)

厲 鶚 馬 日 瑄 輯

商 務 印 書 館 發 行

萬有文庫

第二集七百種



總編 王雲五

Handwritten notes in black ink, including the number "421.522" and some illegible characters.

商務印書館發行

愛惜
公用
圖書
使用

宋詩紀事

(四)

厲鶚馬日瑄輯

空軍軍官學校圖書館

登記號 70073

類號 ~~#810.705~~ 7167 (4)
~~#811.1044~~

空軍軍官學校圖書館

國學基本叢書

登錄號 ~~00073~~ 412

類號 083.12 / 7167
~~2047~~

新加坡
國家圖書館



Handwritten notes in blue ink, including the number "27" and some illegible characters.

中華民國二十六年

五月

第...

宋詩紀事卷十八

錢唐厲鶚緝

祁門馬曰璐同緝

馮京

京字當世鄂州江夏人皇祐元年舉進士鄉選禮部廷試皆第一累官知制誥翰林學士旋擢參知政事尋以觀文殿大學士出鎮河陽歷大名彰德拜太子太師致仕卒贈司徒諡文簡有澹山集

詔修兩朝國史賜筵史院和首相吳公原韻

天密叢雲曉風清一雨餘三長太史筆二典帝王書按武知何者霑恩匪幸歟吐茵平日事何憚汚公車揮塵後錄

謝鄂倅南宮城

嘗思鵬海隔飛翻曾得天風送羽翰恩比丘山何以戴心同金石欲移難經年空歎音書絕千里常思道義歡每向江陵試遺治邑人猶指縣題看

湘山野錄馮大參當世始求薦于武昌會小宗者庸繆寡鑒堅欲黜落又欲置未綴時鄂倅南宮城監試嘗拆封定卷大不平奮臂力主之以公冠于鄉版果取大魁釋褐除荆南倅南宮遷潭倅以詩謝之

句

琴彈夜月龍魂冷。劍擊秋風鬼膽麤。
塵埃掉臂離長陌。琴酒和雲入舊山。
豐年足酒容身易。世路無媒著腳難。
以上鶴林玉露

沈遘

遘字文通。錢唐人。皇祐元年進士第二。歷知杭越揚三州。官至翰林學士。卒。有西溪集。

題山光寺寺在揚州

馬蹄輕蹙柳花浮。醉入淮南第一州。
不是青樓羞薄倖。自緣無錦不纏頭。
高臺已傾池已平。隋家宮殿春草生。
千年往事何足歎。廣陵非復舊時城。

送施密學守錢唐

塞外風烟河上塵。歸來始覺二毛新。
承明自厭頻趨直。滄海還思一濯巾。
幕府旌旗初壓境。畫船歌吹便行春。
湖山滿目舊遊在。何日從公醉紫尊。

南漪堂

山繞湖堂寺繞山。平生願向此中閑。
青雲白水相浮蕩。野客高僧獨往還。
年少自嫌軒冕累。因循將恐鬢鬢斑。
南漪最是逍遙地。且挹清波濯媿顏。
以上西溪集

和王微之漁陽圖

燕山自是漢家地。北望分明掌股閒。
休作畫圖張屋壁。空令壯士老朱顏。
聲畫集

天祿研匣歌

張君贈我古研滴。四脚爬沙角如戟。肉翼絡髀老獸姿。世不能名眼未識。我知此為天祿兒。口銜一寸黃金匣。蟾蜍嚼月兩吻坼。天鯨胸穴雙泉飛。玉聲琮瑋珠迸落。影射巖石光澗潏。未央書殿立髮髻。曾見揚雄老投閣。子孫晚出中平閒。渴烏翻車灑平洛。宗資墓口臥露霜。頭角頓挫仍騰攫。爾來拂拭傍几案。眉目睢盱苔蘚剝。形模不入世俗用。疑付大手傳糟粕。未能點綴清廟頌。開闢大易摛春秋。就令□□□□□。末勢猶足為遷彪。物無貴賤繫所用。千金乞我直暗投。圖書散落愈□下。晚歲惟有齋鹽謀。學注蟲魚問老圃。無乃塌颯為匣羞。緯略

祖無擇

無擇字擇之。上蔡人。進士高第。累官直集賢院。出知袁州。入為龍圖閣學士。權知開封府。進學士。知鄭杭二州。神宗朝。知通進銀臺司。知明州。坐事謫忠正軍節度副使。移知信陽軍。卒。有煥斗集。

高齋詩話。祖無擇晚娶徐氏。有姿色。議親之時。無擇為館職。徐氏必欲諧相其人。而無擇貌寢。恐不得當。同舍馮當世。丰姿秀美。乃諭媒妁。俟馮出局。揚鞭躍馬經過徐居。曰。此祖學士也。徐竊窺甚喜。成婚始悟其非。竟以反目離婚。歐公嘗作詩曰。無擇

聲名重當世。早歲多

奇晚乃偶。蓋謂此也。

遊真陽石室

昔讀到難篇。乃聞真陽室。亦嘗怪斯人。稱道或浮實。邈在數千里。莫觀烟霞質。青山有獨往。吾志久矣必。

如何驂俗駕。尙此行朝紱。繆分南顧憂。惟刑在欽恤。孤宦雖云遠。勝踐其敢失。行行訪雲巖。草木披蒙密。呀然一穴開。勢欲吞朝日。嵐光屏障展。乳溜龍蛇屈。溪流自清泚。松韻何蕭瑟。酌酒飲遊客。謂言此可述。周生誠不誣。所紀窮纖悉。惜哉非吾土。無由寄蓬華。平生丘壑心。與道共湮鬱。難進而易退。終當守儒術。唐周夔作到難篇。謂此洞離長安遠。故到者難也。

途次金陵逢同年沈五判官

數載天涯別。年來不定居。扁舟忽相值。孤抱信何如。公幹猶多病。奉述。孝先仍嬾書。自謂。人生從坎壈。客意且躊躇。淡薄市橋酒。鮮肥江岸魚。可來同飲食。勿笑此蕭疏。

琵琶亭

晚泊湓江半客舟。琵琶亭下動閑愁。霓裳綠腰杳何許。楓葉荻花空自秋。賈傅有才悲鵬鳥。楚騷終古怨靈修。莫言司馬青衫溼。今日行人亦涕流。以上祖龍學集。

慈嚴院

在杭村風水洞。太康閒。葛稚川捨宅爲寺。上元閒。賜額恩德。大中祥符二年改今額。

恩德傳名久。慈嚴賜號新。樓臺□□□。風水憶長春。客有披襟者。時無洗耳人。清音發鐘磬。翠色混松筠。住合登仙籍。來宜出俗塵。經年嗟倥偬。半日喜逡巡。席上詩情逸。樽中酒味醇。恩恩又歸去。自媿使君身。咸淳臨安志。

盧石

盧石在宜陽門外東湖上。唐狀元盧肇家石。奇秀可愛。宋守祖無擇徙置東湖。

袁山之陽秀水側。草履遺基誰氏宅。皆云子發其姓盧。往以文章名籍籍。宅中舊物何所存。惟有嶙峋一

34
巨石闊纔三尺高倍尋。久臥塵沙羣瓦礫。余心好異因獨往。下馬環視聊拂拭。地表可見十二三。已足怪駭動魂魄。呼工運鋪塹其傍。挽以長絙百夫力。謹然鼓譟登大車。恍爾如蒙巨靈劈。選置東湖最佳處。四朔衆峯轟轟春筍植。捫蘿蹋蘚窮之徧。若此奇卓曾未識。郡人奔走來如雲。故老驚看復唧唧。乃言此石遇真賞。屈指于今年二百。沈埋曠代誰爾珍。一日身價逾荆璧。嗟余束髮大夫後。區區志尙惟忠直。十年再謫非不窮。猶慕堅凝無改易。如何故老不我愚。感物再三形歎息。石不能言人有言。勿使他時重堙阨。記萬載縣風俗。

居民覆其屋。大半施白瓦。山際兩三家。如經新雪下。以上袁州府志。

沈遜
遜仕爲判官。

和同年祖擇之韻

一自曾經別。於今歎索居。善交思柳惠。多病是相如。官下頻無況。天涯每得書。舊懷長惋歎。此會合躊躇。曉露生蘭苑。秋風動鱸魚。蕭然林野性。與世轉爲疏。祖龍學集附。

陳誥

誥官袁州通判。

和祖擇之學士袁州慶豐堂十詠存四。



年長身多病。閑鈔已試方。未甘先犬馬。畢命報恩光。
曉案三杯後。閑烹北苑茶。色香俱絕品。雪放滿甌花。
雨霽輕埃息。閑吟面曲池。遊鱗時對擲。雙破碧漣漪。
朝來因試筆。閑答故交書。莫怪音塵絕。吾心與世疏。
祖龍學集附。

一 蕭亢宗

廣陵人

奉和祖無擇郡守詠盧石

石是人非世所傳。宜陽城郭古山川。和光瓦礫曾無累。委質泥沙積有年。地僻久為神物護。時來方遇使君賢。介然作鎮東湖上。德政何當向此鐫。
祖龍學集附。

張徽

官朝議大夫上柱國致仕

聞祖擇之曾遊潁川西湖詩以寄之

河勢橫斜帶地形。碧旂丹旆昔常經。驛名未改風塵黑。碑字猶存雨蘚青。薦福寺名。園林倡杏澆。擷芳亭名。洲渚妓娉婷。汝南一值賢人降。分野于今占德星。
祖龍學集附。

羅誘

鄉貢進士官教諭

和祖無擇太守九日登宜春臺

九日經年一再來。不妨吏隱遣懷開。時豐訟少欣多暇。秋晚花黃儘任催。幸遇登高筵宴樂。喜容落帽客追陪。預愁詔入三公去。芹泮誰思樂育才。祖龍學集附

閣 珣

珣江西運使

祖擇之學士惠示吏隱宜春郡十詩奉答

達觀終知世事勞。利名都是一鴻毛。登瀛自有仙遊樂。緩帶何妨吏隱高。深意庇民躋富壽。正辭華國聳英髦。搏風九萬期鵬翼。且傲松軒弄彩毫。祖龍學集附

宋

據鄉貢進士

一和祖無擇太守九日登宜春臺

登高佳節喜重來。會客依隨五馬開。帽落秋風隨意適。杯迎露菊趁時催。東籬幸有主人席。絳帳那逢上客陪。時李泰伯預坐。欲報君恩話歸去。不妨尊酒論文才。祖龍學集附

陳 闡

闡字伯通。仙遊人。皇祐元年進士。守知萊州。

題梅仙山

先生吏隱寄南昌。千里來尋物外鄉。汲水尙憐春井渫。藏丹猶發夜壇光。鶴歸華表人何在。犬吠雲深日自長。我擬重來訪遺跡。手搘筇杖少徜徉。梅仙事實。

張公庠

公庠字元善。皇祐元年進士。有泗州集。

道中一絕

一年春事已成空。擁鼻微吟半醉中。夾路桃花新雨過。馬蹄無處避殘紅。侯鯖錄。

遊白鶴山

初眠官柳未成陰。馬上聊爲擁鼻吟。遠宦情懷消壯志。好花時節負歸心。別離長恨人南北。會合休辭酒淺深。欲把春愁閑抖擻。亂山高處一登臨。

能改齋漫錄。張才翁風韻不羈。初仕臨邛。秋官郡守張公庠待之不厚。會有白鶴之遊。郡守率屬官同往。才翁不預。乃語官妓楊皎曰。老子到彼。必有詩詞。可速寄來。公庠既到白鶴。便留題云云。皎錄寄才翁。才翁增減作雨中花詞。寄皎云。萬縷青青。初眠官柳。向人猶未成陰。據雕鞍馬上。擁鼻微吟。遠宦情懷。誰問空嗟壯志。消沈正是好花時節。山城留滯。忍負歸心。別離長恨。飄蓬無定。誰念會合難憑。相聚裏。休辭金盞酒淺。還深。欲把春愁。抖擻春愁。轉更難禁。亂山高處。憑闌垂袖。聊寄登臨。公庠再坐。皎歌于側。公庠問之。皎前稟曰。張司理恰寄來。令皎歌之。以獻台座。公庠遂青顧才翁尤厚。

宮詞

上番宮女捲簾時。閃閃寒鴉拂曉啼。纔索赭袍催進輦。紫宸門外報班齊。
佳人唯是惜韶年。嬾向紅窗理管弦。錦席安排胡蝶局。深宮不忌賭金錢。
太皞祠壇數級紅。青旂搖曳日曛曛。人閒未覺春風至。先入宜春小苑中。
月華浮動上階棱。侍宴歸來掩繡屏。子夜酒醒蘭燭暗。碧紗窗外度流螢。十家宮詞。

郡齋宴坐

爲州容散誕。真慰野人情。撼鄴禪初悟。搖頭句未成。試香秋院靜。鬪墨午窗明。已有東歸計。柴扉掩姓名。
瀛奎律髓。

盧秉

秉字仲甫。湖州德清人。皇祐元年進士。提點兩浙刑獄。加集賢殿修撰。知渭州。遷龍圖閣直學士。提舉洞霄宮。卒。有文集。

絕句

十月都門風薄衣。擣砧聲裏雁南飛。野人不識長安樂。且趁鱸魚一櫂肥。西溪叢話。

題汴河驛中

青衫白髮病參軍。旋糶黃糧買酒尊。但得有錢畱客醉。也勝騎馬傍人門。

吟窗雜錄。舒王見此詩。尤極稱。

賞。俄薦于朝。數年閒遂超顯仕。

孫覺

覺字莘老高郵人皇祐元年進士元豐初除右正言歷外郡哲宗朝拜御史中丞提舉靈仙觀卒紹聖中以元祐黨奪兩官徽宗即位復職有集

聞朝議以子瞻送高麗

文章異域有知音鳴綠差池一醉吟穎士聲名動中國樂天辭筆過雞林節毛零落氈吞雪辯舌縱橫印佩金奉世風流家世事幾隨浪拍海東岑合璧事類後集

介亭

在杭州鳳凰山太守祖無擇建

真人昔未起奔鹿駭四方連延天目山兩乳百里長有地跨江海無種生侯王中宵燎穹旻列石表壇場朱旗大梁野英氣通八荒寥寥百年後故物亦已亡所餘彼巉巖峯巒屹相望主人承明老星斗工文章築亭紫霄上坐客蒼林旁攀雲弄明月曉星出扶桑禹山隔波濤簡書永埋藏願逢希夷使水土還故常

宋藝圃集

李育

育字仲蒙吳人皇祐元年進士

飛騎橋

魏人野戰如鷹揚吳人水戰如龍驤氣吞魏王惟吳王建旗敢到新城旁霸主心當萬夫敵麾下倉皇無羽翼途窮事變接短兵生死之閒不容息馬奔津橋橋半撤洶洶有聲如地裂蛟怒橫飛秋水空鸚驚徑

度秋雲缺，奮迅金羈汗。霑臆濟主艱，難天借力艱。難始是報主時，平日主君須愛惜。

避暑錄話：吳志孫權征合肥，爲魏將張遼所襲，乘駿馬上津橋。橋板徹丈餘，超度得免，故以名橋。今在廬州境中，育有詩云云。

錢公輔

公輔，字君倚，常州武進人。皇祐元年進士，知明州，進知制誥，神宗朝拜天章閣待制，知諫院，出知揚州。

衆樂亭詩并序

衆樂亭居南湖之中，南湖又居城之中，望之真如方丈瀛洲焉。以其近而易至，四時勝賞，得以與民共之。民之遊者，環觀無窮，而終日不厭。孟子曰：獨樂與衆樂，孰樂？不若與衆。衆樂之名，于是乎書。旣又爲詩以記真景之萬一云。

誰把江湖付此翁，江湖更在廣城中。暮成世界三千景，占得鵬天九萬風。宴豆四時喧畫鼓，遊人兩岸跨長虹。他年若數東南勝，須作蓬萊第一宮。延祐四明志。

寄題翠麓寺呈伯強寺丞

曩時曾作家山遊，亭有翠麓排新幽。疏軒密牖竹鏘戛，烈風勁雨松颼颼。呀然出戶瞰山足，屹然數竿圍上頭。掃除雲峯聳客步，煎煮錫水供茶甌。我時旣合衆賓飲，醉岸山幘心遲留。山僧顧我丐詩榜，詩未脫吻驚旋轉。四方環走條已晚，十載負約今相酬。珍藍增蒼想勝舊，我已白首糜藩州。何當一賦歸去來，再

款巖室空披搜。吾宗道人正嘉遯。擺脫世上無窮憂。欣逢主人賢且令。泉石笑傲都相求。上人灑掃莫暫閒。行行逆我西來舟。惠山古今考

馮浩

浩、仁宗朝集賢校理。知鄆州。

遙贈錢公輔

嘗聞衆樂亭。未窺衆樂景。今蒙貺新詩。若得暫觀省。萬象盈紙來。孤風隨筆騁。丹青慙近工。造化與遙領。因識主人懷。殆非郡侯政。所寄嬉遊中期。歡衆庶競。無俾一夫愁。將和四時盛。此而推是心。況乎持大柄。青山綠水佳。百草千花勝。吾將因宦遊。異日細謠詠。鄆縣志

呂誨

誨字獻可。開封人。端之孫。第進士。官殿中侍御史。熙寧初。爲御史中丞。與王安石不合。出知鄧州。提舉崇福宮致仕。卒。贈通議大夫。

和邵堯夫見寄時知鄧州

冥冥鴻羽在雲天。邈阻風音已十年。不謂聖朝求治理。尙容遺逸臥林泉。羨君自有隨時樂。顧我官閑飽晝眠。應笑無成三黜後。病衰方始賦歸田。聞見前錄

趙君錫

君錫字無媿。洛陽人。舉進士。爲宗正丞。元祐中。拜御史中丞。以天章閣待制。出知應天府。紹聖中。

貶少府監分司南京入黨籍

紀事送太師潞公西歸

樂人多用教坊家。席上羣公換口誇。內裏宣來蕉葉盞。御前賜出縷金花。坐上纔初佳句傳。中官寫得便聞天。聖人含笑搜尋了。依韻當時賜和篇。西苑重排餞會時。新篇御製降彤墀。明朝上巳無公事。赴宴臣僚總進詩。

文昌雜錄趙君錫作小詩二十篇紀恩寵以送潞公

其尤為人傳誦者三章雖王建宮詞無以過此也

姚關

關字子張。金壇人。皇祐元年進士。歷官項城令。通州通判。與蘇洵同修禮書。歐陽公甚稱之。

挽老蘇先生

羈旅都門十載中。轉頭浮宦已成空。青衫暫寄文安宅。白社長畱處士風。萬里雲山歸故國。一帆江月照疏篷。世閒窮達何須校。只有聲名是至公。蘇集附

望文脊山懷瞿礪先生

文脊山中姓已逃。江城爭美少微高。應知司馬來窺鼎。便學秦人去種桃。海上音書斷鴻雁。洞中吟嘯伴猿猱。鹿裘誰識先生志。卻把虛詞倚伏滔。寧國府志

范純仁王辟疆

純仁字堯夫。仲淹次子。皇祐元年進士。神宗朝累擢天章閣待制。哲宗朝落職。貶永州安置。建中靖國初召爲光祿卿。分司南京。卒。贈開府儀同三司。諡忠宣。與黨籍有集。

寒食日泛舟

合友逢佳節。攜尊泛碧流。溪風消酒力。烟樹入春愁。羣鴨開波練。疏雲透月鉤。平生懷古意。最羨五湖遊。

和吳仲庶春遊海雲寺

東郊行樂冠西州。古寺岩巖翠嶺頭。化俗文翁傳愷悌。尋山謝傅繼風流。天涯尊酒欣相遇。劍外三春得共遊。雅興直須窮勝賞。年光難使隙駒留。

和吳仲庶龍圖西園海棠

丹葩翠葉競妖濃。蜂蝶翩翩弄暖風。濯雨正疑宮錦爛。媚晴先奪曉霞紅。芬菲劍外從來勝。歡賞天涯爲爾同。卻想鄉關足塵土。只應能見畫圖中。

和鄭通議青州范公泉

勝概因人得久存。此泉疏鑿自先君。澄源不負當時意。清影猶涵昔日雲。養正迴當深澗下。朝宗應與衆流分。今逢賢帥光陳迹。名逐新詩海內聞。

遊嵩山與王弱翁聯句

靈境中天秀辟疆。雄名古到今。位尊朝列嶽純仁。勢重壓千岑。靜鎖神仙宅辟疆。高盤宇宙心。孤棧標日月純仁。絕仞倚戈鐔。彩棟靈祠邃辟疆。層簷淨刹深。民祈傳覲語純仁。國祀致君忱。碑古苔生字辟疆。堂

虛畫蠹金山呼曾薦壽純仁。神降卽爲霖事怪塗山石少室山下有啓母石。辟疆。形端玉女砧峯巒排翠玉。
純仁。灘瀨漱鳴琴蕙帳人誰繼辟疆。金泥迹可尋唐經藏寶妙純仁。魏殿想鸞音會善寺魏文帝離宮。雲作他
方雨辟疆。松連別院陰谷泉長浸斗山有七星泉。辟疆。頂路欲捫參探穴夢潛動辟疆。捫蘿力不禁箕熊分
蟻垤純仁。伊洛認蹄涔鳥道樵夫去辟疆。龍潭驛使臨衆仙停羽駕頂有八仙壇。純仁。昔帝儼宸襟山有元
宗御容選勝先看記。辟疆。乘危可作箴天門開四極山有東西二天門。辟疆。樹品冠雙林少林有則天一品松五品松。
靈藥看苗斲辟疆。香醪挈榼斟道宮庭不埽純仁。學館突無黔山有書院。壘麥風搖浪辟疆。溪淙石聳簪雜花
春爛漫純仁。老木夜蕭森夕照河光接辟疆。晴嵐塔影侵深崖藏積雪純仁。虛壑響幽禽溪月寒澄霽辟
疆。巖烟暮杳沈寺橋橫蠅蝻純仁。禪磬擊瓊琳拂壁題新字辟疆。逢僧舉舊吟疲驂何處解純仁。高閣在
崎嶇辟疆。以上范忠宣公集。

王康

和吳公仲庶遊海雲寺

大帥新謠十五州殘春摸石是遨頭。氤氳喜氣隨民徧冉冉風光盡日流。野俗只知觀讌賞主人非獨爲
嬉遊。晚迴都騎簫鞞引觀稼郊原亦暫畱成都文類

馮介

和吳公仲庶遊海雲寺

及時行樂慰刀州。曉背重城信馬頭。彩石散隨香被去芳塵紛逐鈿車流。怱怱曲水當年會草草東山舊

日遊不是海雲今獨勝。清風長共好詩留。成都文類。

楊希元

和吳公仲庶遊海雲寺

三春行樂盛刀州。況是春光欲盡頭。使節在郊觀似堵。香輪爭道去如流。正逢鈴閣多閑日。肯對花時負勝遊。會得公心惜歡意。欲歸猶自儘遲留。成都文類。

張端

和吳公仲庶遊海雲寺

海雲真賞甲刀州。十里春光拂馬頭。花酒價高分宴樂。綺羅人好助風流。出郊行旆從編俗。摸石居民事勝遊。斜日懽心猶未足。藩侯歸轡爲遲留。成都文類。

薛縑

和吳公仲庶遊海雲寺

寺占靈峯更近州。喧闐騶從錦纏頭。歌鐘乍奏晴雷殷。戈甲急趨春水流。幾處醉眠方枕藉。一城謠俗重嬉遊。賢侯惠意民知否。幾刻嚴闈爲爾留。成都文類。

楊成章

成章字晦之蜀人

梵安寺內浣溪四老唱和詩有序

伏觀益之奉議尊兄。欲于浣花梵安寺之普賢。約漢公子臧作三老會。又築堂繪像。榜曰三老。誠蜀中之盛事。咸章方調官武信。敢卜謝事。少陪雅集。輒更爲四老。因賦拙詩。上浼清覽。聞說懸車三老儒。約爲繪像訪僧居。蟹螯杯酒歡無極。鼎足韜裘樂有餘。暑簟共觀岷嶺雪。春盤同膾蜀江魚。歸來一榻如相許。須信逍遙倍二疎。成都文類。

楊損之

損之。字益之。蜀人。

宗弟晦之通直有詩陳武信歸筵三老之後損之喜繼元韻以勉之

未拋名利尙區區。方卜榮遷武信居。思筵林泉三老後。已經年紀七旬餘。且來在野同遊鹿。莫學臨淵卻羨魚。子美堂鄰願爲約。免教朋友舊情疎。成都文類。

任傑

傑。字漢公。蜀人。

傑衰朽無取辱益之見招同諸友爲四老會晦之承議有詩傑謹次其韻

夫子關西出衆儒。冑來尋我卜幽居。忘憂碁局眞佳趣。投老詩篇是緒餘。故舊已蒙吟伐木。太平只恐罩嘉魚。主人醉指前溪路。松菊清涼月影疎。成都文類。

楊武仲

武仲。字子臧。蜀人。

武仲伏承益之奉議轉示晦之佳什謹依元韻次和

素髮龐眉一陋儒。常陪龍友到禪居。我隨益者誠多幸。人歎賢哉媿有餘。坐上共飛純玉掣。腰閒齊佩白銀魚。高吟清論常終日。會數朋交信不疎。成都文類

呂陶

陶蜀人。

昨日漢公承議見召與三老友談笑大醉退而作詩少謝勤意

六十年前里巷遊。北歸重此接交儔。據鞍矍鑠誇朱紱。把酒殷勤勸白頭。況是三春逢美景。何妨一笑斷多愁。閑中歲月非難遣。須得新詩事唱酬。

和吳公仲庶遊海雲寺

玉節重來鎮此州。暫驅千騎上峯頭。春闌好爲良辰惜。俗樂誰知急景流。山色也疑今日盛。物情渾勝頃年遊。登臨賦詠應難再。持語鄉人早借畱。以上成都文類

葛琳

和運使學士浣花亭韻

井絡西南區。成都號佳麗。錦城十里外。物景居然異。傍縈浣花溪。中開布金地。杜宅歸遺址。任祠載經祀。

按蜀記。梵安寺。乃杜甫舊宅。在浣花。去城十里。大歷中。節度使崔寧妻任氏亦居之。後捨爲寺。人爲立廟于其中。每歲四月十九。凡三日。

衆邀樂于此。自昔歲一遊。有亭久摧廢。將期汎舟會。先此畱旌騎。弗基矧有構。後人莫予嗣。冠蓋或戾止。風

雨無所庇。我公至之初。行樂徇人意。柅車集賓組。幕天陳燕器。苟弗謀高明。胡爲革媮敝。鳩工度材用。奢
儉求中制。舉從縣官給。下靡秋毫費。巍然大廈成。甚于折枝易。藩條息偃暇。時律清和際。落成及休辰。夙
駕忻重詣。羣嬉逐使轂。雜處同蠶市。棟宇美可觀。席筵陳有次。芳尊旣罷撤。綵舲妥登憩。夾岸布緹帟。中
流喧鼓吹。泝沿烟靄閒。禽魚共翔戲。都人與士女。疊足連帷被。弄珠疑漢曲。浮觴均洛禊。曖曖日將暮。熙
熙衆皆醉。悅入武陵源。卻返塵寰世。自是畢遨賞。始復專民事。農耕仕就學。商販工居肆。蜀邦生齒繁。衣
食良艱匱。三時急耕播。寸壤無遺棄。茲焉俾暇逸。所以慰勤瘁。上賴天子心。慎重坤維寄。旣擇邇臣德。來
秉諸侯瑞。且命太史賢。出攬澄清轡。第務廣教育。孜孜布仁惠。匪圖亟聚斂。規規奉邦計。和氣斯涵濡。羣
生皆茂遂。乃躋富壽域。共樂升平治。不才備屬僚。罔補公家利。廕宇幸焉依。雅聲慙善繼。願比召南篇。永
歌棠蔽芾。成都文類。

費著歲華紀麗譜四月十九日浣花佑聖夫人誕日也太守出笮橋門至梵安寺謁夫人祠就宴于寺之設廳旣宴登
舟觀諸軍騎射倡樂導前泝流至百花潭觀水嬉競渡官舫民船乘流上下或幕帟水濱以事遊賞最爲出郊之勝

周敦頤

敦頤字茂叔道州營道人以舅龍圖閣學士鄭向恩補官熙寧初累官至廣東轉運判官提點刑
獄因疾求知南康軍築室廬阜下號曰濂溪嘉定中諡元公淳祐中封汝南伯從祀孔子廟廷有
集

同宋復古遊大林寺

三月僧房暖。林花互照明。路盤層頂上。人在半空行。水色雲含白。禽聲谷應清。天風拂襟袖。縹緲覺身輕。

靜思篇

靜思歸舊隱。日出半山晴。醉榻雲籠潤。吟窗瀑瀉清。得閑方達士。失計只勞生。朝市誰頭白。車輪未曉鳴。

題春晚

花落柴門掩夕暉。昏鴉數點傍林飛。吟餘小立闌干外。遙見樵漁一路歸。

題濂谿書堂

元子谿曰濂。相傳到于今。此俗良易化。不欺顧相欽。廬山我所愛。買田山之陰。田閒有清水。清泚出山心。山心無塵土。白石照沈沈。潺湲來數里。到此始澄深。書堂構其上。隱几看雲岑。倚梧或敲枕。風月盈冲襟。有時吟復默。酒罷鳴幽琴。數十黃卷軸。賢聖談無音。窗前卽疇圃。圃外桑麻林。芋蔬可卒歲。絹布足衣衾。吾樂蓋易足。名濂以自箴。誰爲相朝暮。岸木寒蕭森。以上濂溪集。

郭獬

送吳中復守長沙

初登西漢文章府。便領吳王第一州。繞郭白雲衡岳近。滿帆明月洞庭秋。淵鑑類函。

王吉

吉、淮東人。試校書郎。

游琅邪呈銳公長老

踏石披雲一徑通。翠微環合見神宮。峯巒鬱密泉聲上。樓殿參差樹色中。子夜千溪分水月。清秋十里韻松風。平生久佇名山約。吟賞今纔信宿同。南滁會景編

周圻

圻、圻尚書都官員外郎。通判滁州事。

游琅邪寺

杉松夾道綠森森。古寺尤欣結客尋。殿閣長時異香滿。亭臺佳處白雲深。清泉迸石落寒谷。幽鳥避人穿茂林。緩步閑看舊題詠。盆池蓮葉幾浮沈。南滁會景編

安昌期

昌期、皇祐初舉進士。調永定尉。去官。放浪山水間。

題清遠峽和光洞

蕙帳將辭去。猿猱不忍啼。琴書自爲樂。朋友孰相攜。丹竈非吾藥。青雲別有梯。峽山予暫隱。人莫擬夷齊。萬姓統譜

趙抗

揚抗

抗、揚。抗、抃二弟。皇祐閒。抃爲江源令。抗揚與俱。

引流聯句有抃序

江源縣江繚治廨址。而東距三百步。瀧湍馳激。朝暮鳴在耳。使人聽愛弗倦。遂畝渠通民田。來囿亭塔

廡閒環迴旋繞溝行沼渟起居游觀清快心目公暇事休與弟抗揚坐東軒樂然盤桓共為詩章云
 別派從江垠邀流入農畎淙淙來源深灑灑度溝淺疏功浹旬畢漑利千步遠田觀疑澤瀦坎聽類瓴建
 波行拂落葉浸長浮生蘚孤鶴眼怪窺纖魚鬣跳展映葦色莫分喧琴韻難辨增霖晨鬧蛙涵月夜驚犬
 憐黃澆菊籬惜紫沃蘭畹吏治窳甃整童戲芒車卷灌攜合手勞漱掬致腰俛庭秋臨加涼軒夏向消烜
 我矜近濟能僮賀遙沒免貯庀理巨甌歸廚架修篔供淘飯盞糧給澳羹鼎爨調藥修舊餌煎茶試新葺
 坐客頻泛觴蹲兒屢滌硯聆寒心脫煩挹冷酒除面閑眺筇步隨靜看髭吟撚高懷造文據清興團詩遣
 題為引流篇記耳非自衒名勝志

安昌縣

物類志

淮南書論官民長道嚴時訪世事

周禮

海國志卷之八

宋詩紀事卷十九

錢唐厲鶚輯
祁門馬曰璐同輯

楊繪

繪字元素綿竹人皇祐初擢進士第二神宗朝累官翰林學士御史中丞哲宗朝終天章閣待制知杭州有集

墨莊漫錄嘉祐中有王永年者娶宗女求舉于寶下楊繪得監金耀門書庫嘗置酒延下繪出其妻閒坐妻以左右手掬酒以飲下繪謂之白玉蓮花杯可謂善體物者也

春遊

傾城追逐豔陽天。上巳清明節序連。桃李光陰足駘蕩。湖山風月更鮮妍。谷中荅響飄新曲。波底妝光颺綵船。遲日未西人已醉。綠楊柔弱舞秋千。合璧事類前集

落花

夜來經雨學啼妝。今日摧紅怨夕陽。已落旋隨春水急。強畱還怯晚風狂。應將別恨憑鶯語。更把歸期趁蝶忙。誰謂多情消不得。夢魂猶惜滿闌香。夢梁錄

壽山

壽山北接侵隋碧。湏水南流接漢清。宋玉陽臺猶暮雨。子虛夢澤已春耕。湖廣總志。

謝景溫

景溫字師直。絳次子。皇祐元年進士。元祐初。歷官權刑部尚書。知鄆州。徙知河陽。

中山詩話。梅聖俞幼戲謝師直詩曰。古錦裁詩句。斑衣戲坐隅。木奴今正熟。冑效陸郎無。師直小名錦衣奴。至十歲讀此。方悟之。

遊雲門

若邪欲盡山轉青。中有三寺山爲屏。秦峯表裏植蒼翠。仰視萬木相崢嶸。雪霜洗盡塵土跡。龍蛇蟄處烟氛生。我攜賓友事登覽。穿徑已覺毛骨輕。窮幽陟險興不盡。巖房畱宿神逾清。寒隨陰谷一夜至。酒力半酣如不勝。狂歌出行步竹徑。正是溪橋雙月明。幽泉亂迸石竇響。松風遠送哀猿聲。凌晨後嶺縱俛仰。長林翠阜何從衡。獻之舊地不可辨。懸崖欲斷石爲阬。五雲散盡遺蹟滅。老僧至今傳此名。憑高覽古復太息。翻嗟萬事多廢興。丈夫出處固未測。我于山水夙有盟。區區世路雖可厭。脫身向此誠獨醒。豈如乘興事茲樂。賞心不繫窮與亨。昔人避世非獲已。我今安學禽鳥情。雲門集。

呂大防

大防字微仲。藍田人。皇祐初進士。神宗朝。累除知制誥。哲宗卽位。爲翰林學士。拜尚書右丞。封汲郡公。進尚書左僕射。兼門下侍郎。紹聖初。以黨論責授舒州團練使。循州安置。未踰嶺卒。高宗朝。復故官。贈太師宣國公。謚正愨。有呂汲公文錄。

萬里橋西有僧居曰聖果後瀕錦江有脩竹數千竿僧辯作亭于竹中予與諸公自橋乘舟泝流過之因名亭曰萬里蓋取其發源注海與橋名同而實異作小詩識之

萬里橋西萬里亭錦江春漲與隄平
拏舟直入修篁裏坐聽風湍徹骨清

成都文類

李觀

觀字泰伯建昌軍南城人皇祐初以薦試太學助教終海門主簿太學說書有退居類稿

絕句

人言落日是天涯望極天涯不見家
已恨碧山相掩映碧山還被暮雲遮

青箱雜記識者謂此詩意有重重

障礙李君其不偶乎後果如其言

清明

遲遲日影坐成曛聞說清明在此晨
花卉不宜愁眼看句萌能爲幾人春
銷磨志氣多因老檢點交遊半作塵
欲向醉中聊自適病來還厭舉杯頻

王方平

五百餘年別恨多東征重得見青蛾
擗麟始擬窮歡樂不柰閑人背癢何

璧月

璧月迢迢出暮山素蛾心事問應難
世閒最解悲圓缺祇有方諸淚不乾

梁帝

擬旒南面總虛名。廟祀何曾暫割牲。但學禪心能忍辱。莫羞侯景陷臺城。

送僧遊廬山

行非為客住非家。此去廬山況不遐。要見南朝舊人物。池中唯有白蓮花。

憶錢唐江

當年乘醉舉歸帆。隱隱前山日半銜。好是滿江涵返照。水仙齊著淡紅衫。以上盱江集。

望海亭席上作

七閩山水掌中窺。乘興登臨到落暉。誰在畫簾沽酒處。幾多鳴櫓趁潮歸。晴來海色依稀見。醉後鄉心積漸微。山鳥不知紅粉樂。一聲檀板便驚飛。

湘山野錄。蔡君謨出守福唐時。泰伯自建昌攜文迓之。一日命泰伯及陳孝廉烈。早膳于後園望海亭。不設樽酒。膳罷欲起。時方暮春。鸞酒于園。郡人嬉遊。藉姬數子。時亦尋芳于此。既太守在亭。因斂袖聲喏而退。蔡公遂留之。旋命觥具。就以爲侑酒。方

行舉歌一拍。陳烈者驚懼怖駭。越牆攀木而遁。泰伯即席賦詩云云。

句

幾函道藏金壺墨。一片秋容玉井花。仙都觀。酒鄉貧更入。詩債病猶還。和陳殿撰。天冷雲含白。溪清水獻沙。

感秋。歷代吟譜。

張唐英

唐英字次功蜀州新津人丞相商英之兄自號黃松子皇祐初調穀城令熙寧中仕至殿中侍御史有嘉祐名臣傳蜀檣杙行于世

題傳舍詩

先帝昭陵土未乾又聞永厚葬衣冠小臣有淚皆成血忍向東風看牡丹

邵氏聞見前錄熙寧元年春唐英以前御史服除還京朝過洛府尹同僚屬出賞花皆不見題詩傳舍云云時仁宗山陵初成英宗厭代尹聞之遣書為禮卻而不受賴唐英還朝不得歸臺不然河南尹者不免矣

裴大亮

大亮皇祐四年以尚書虞部員外郎知商州

題西巖寺

清溪如鑑照行人谷鳥山花景漸新五馬頻來無別事為思江上若邪春陝西通志

鄭炎

炎皇祐初漢中郡守

贈張俞秀才遊金華山

凌晨別我將何適鶴態飄然振霜翮指點金華欲去遊騎驢直造煙霞宅一片嵐光凝不飛數里松陰翠如滴背臘山寒雪未消迎春地暖花爭拆水潺潺兮風索索簾卷虛堂正岑寂高歌應有鬼神聽狀物潛

驅鴻化力。繫我浮生繫郡符。安得乘閑訪靈跡。吟成一首送君詩。倩僧勒上巖邊石。陝西通志。

鄭獬

獬字毅夫。安州安陸人。皇祐五年進士第一。神宗朝拜翰林學士。為王安石所惡。出知杭州。徙青州。提舉鴻慶宮。卒。有鄖溪集。

郡齋讀書志。毅夫為文有豪氣。峭整無長語。與滕達道少相善。嗜酒落魄。無檢操。人目之曰滕屠鄭沽。

題垂虹橋寄同年叔楸秘校。劉攽字叔楸。原父之弟。時為吳江尉。

三百闌干鎖畫橋。行人波上踏靈鼈。插天蟠螭玉腰闊。跨海鯨鯢金背高。路直鑿開元氣白。影寒壓破大江豪。此中自與銀河接。不必仙槎八月濤。中吳紀聞。

題僧文瑩所居壁。守杭日作。

西湖頻送客。綠波舟楫輕。春入蘿徑靜。浪花翻遠晴。

題杭郡閣

雨影橫殘虹。秋容陰映日。寒江帶暮流。曉角穿雲出。峯藏翠如織。宿鳥去無跡。封書寄所懷。聊託金門翼。

玉壺清話。二詩時頗訝其氣象不遠。後

解杭廳。將赴青社。以病泊舟楚州卒。

省中畫屏蘆雁

高堂傾動長江流。黃蘆羣雁滿滄洲。埽開長安塵土窟。寫出江南煙水秋。兩雁斜飛入空閣。四雁顧慕橫沙頭。高風拉折蒼玉幹。蘆花雪盡無人收。赤日飛光不敢近。但覺爽氣屏閒浮。嘗聞畫龍入神變。坐馳雲雨天地遊。只恐此雁亦飛去。瀟瀟萬里誰能留。聲畫集

采鳧茨

朝攜一筐出。暮攜一筐歸。十指欲流血。且急眼前飢。官倉豈無粟。粒粒藏珠璣。一粒不出倉。倉中羣鼠肥。宋文鑑

朱亥冢

高論唐虞儒者事。賣交負國豈勝言。憑君莫笑金椎陋。卻是屠酤解報恩。老學菴筆記

絕句

田家汨汨水流渾。一樹高花明遠村。雲意不知殘照好。卻將微雨送黃昏。能改齋漫錄

代探花郎一絕

嫩綠輕紅相向開。一番走馬探春回。青衫不管露痕溼。直入亂花深處來。茗溪漁隱叢話

春詞

小池春破玉玲瓏。聲觸簾鉤漸好風。閑繞闌干掐花樹。春痕已着半梢紅。錦繡萬花谷

蠡口絕句

千重越甲夜城圍。戰罷君王醉不知。若論破吳功第一。黃金只合鑄西施。

庚溪詩話吳門蠡口瀕太湖乃范蠡自
此乘扁舟泛五湖也鄭毅夫詩云云

雪晴

天外丹霞一抹紅。瓦溝已見雪花溶。前山未放曉寒散。猶鎖白雲三兩峯。後村千家詩。

恭和御製賞花釣魚

輦路鮮雲五色開。一聲清蹕下天來。水光翠繞九重殿。花氣濃熏萬壽杯。繡幕烟深紅會合。文竿風隱綠徘徊。蓬山絕頂無人到。詔許羣仙盡日陪。

寄程公闢

念昔都門手一攜。春禽幾向苧蘿啼。夢回金殿風光別。吟到銀河月影低。舞急錦腰迎十八。酒酣金盞照東西。何時得遂扁舟去。雪棹同君泛剡溪。以上瀛奎律髓

浮雲樓在安陸

樓在浮雲縹緲閒。浮雲破處見朱闌。山光對入鄖城紫。溪影橫飛夢澤寒。湖廣總志

上翰林

中使傳宣內翰家。君王令草侍中麻。紫泥金印封題了。銀燭纔燒一寸花。淵鑿類函

句

東飛江雲北飛燕。同寄青春不相見。夜來過嶺忽聞雨。今日滿溪俱是花。詩人玉屑

滕元發

元發初名甫字元發以避高魯王諱改字為名而字達道東陽人家蘇州皇祐五年進士第三神宗朝累官知開封府翰林學士出守外郡哲宗朝以龍圖閣學士知揚州卒諡章敏

梁溪漫志滕達道未遇時與諸生講學于僧舍主僧出諸生夜盜其犬而烹之事聞有司治其罪滕公為丐免守曰如能為盜犬賦則將釋之滕公即口占其詞曰僧既無狀犬誠可偷輟藍宮之夜吠充絳帳之晨羞搏飯引來喜掉續貂之尾索絢牽去

驚回顧免之頭守

大笑竟置不問

寄越州范希文太守

江山千里接仁風都在東南秀氣中為問玉皇香案吏蓬萊何似水晶宮

能改齋漫錄時

元發守吳興

送俞退翁致仕還鄉

清時冲節是身謀御史郎官不冝畱回首軒裳雙脫屣放懷天地一輕漚
下雲雪月柴門靜
菱雨蘋風野艇秋
仰羨冥鴻空自媿區區圖報未知休
湖州府志

句

萬國休兵外羣生奏凱中
皇祐五年御試吹律聽軍聲
寒日邊聲斷春風塞草長
傳聞漢都護歸奉萬年觴
西旅

來王。以上古今詩話。野色更無山隔斷。天光直與水相連。月波樓。竹坡詩話。

陳汝義

汝義，晉江人。皇祐五年進士。

寄題錢公輔衆樂亭

聞說湖亭又一新，不徒行樂樂斯民。水光賸占鷗鳧地，人意賞從桃李春。試展畫圖清俗眼，況聞几席傲天真。使君已陟螭頭貴，應爲烟雲入夢頻。延祐四明志。

韋驥

驥字子駿，錢唐人。皇祐五年進士。累遷主客郎中，出爲夔路憲。知明州，提舉洞霄宮。有韋先生集。

古金章

全椒民間二稚子得金章于野，分而競焉。入于縣，縣以獻州。

黃金鑄印龜爲鈕，埋沒郊原已綿久。春泥深處襯耕蹄，臘雪銷時經獵走。臘去春來幾百年，年年寂莫無資緣。不知何代何王賜，于此奚爲獨墜捐。由來至寶寧長棄，一旦光輝難自祕。牧兒羸子兩窺觀，不識彫章祇知利。里胥白官官爲收，歛從下邑歸之州。發囊啓襲生精彩，十目爭視寒星流。粲然五字分明在，蒼龍副將軍所佩。將軍安在惟空名，方寸堅剛終不潰。物否而通理所宜，在人誰謂殊于斯。請看金印雜瓦礫，未逢採拾無輕嗤。

登蓬萊閣

行盡東州到此州，登臨更盡北山頭。孤城突兀連滄海，三島參差聳暮秋。廣座下疑鼇負石，危簷遠學蜃

爲樓蓬萊方丈雖冥邈。高閣今朝亦勝遊。

賦牡丹黃齋

倚闌凋謝若爲情。旋拾殘紅入鼎烹。吞秀嚼香須細細。送春唯此一杯羹。以上章先生集。

蒲宗孟

宗孟字傳正。閬州新井人。皇祐五年進士。神宗朝擢翰林學士。拜尙書左丞。罷知毫杭鄆三州。徙河中卒。有集。

遊虎丘

長松遶步水灣環。寺據吳王家墓閒。瘦石千層開碧玉。疎篁十里裹青山。壁從池上嶄巖起。雲出門前自在閑。零落生公講臺下。無人說法但空還。

遊虎丘山書錢唐舊遊

失卻湖山恨去舟。新年無意作春遊。東風昨夜思龍井。曉雨全家入虎丘。望見遠峯疑石術。南高峯勝處。誤尋歸路認花樓。沙河勝處。明朝一出閶門去。清夢遙知在兩州。以上吳郡志。

題徐沖晦處士舊隱

沖晦先生不冝官。布衣謁帝布衣還。尙嫌姓字騰人口。惟恐文章落世閒。大隱不妨居市井。高吟何處問家山。平生寄意江湖上。雲自無心水自閑。興化府志。

錢藻

藻、字純老。臨安人。文穆王元瓘子儼曾孫。閣門祇候順之之子。家蘇州。皇祐五年進士。仕至翰林侍讀學士。權知開封府。

天平山白雲泉
白雲巖靜最深隈。泉溜泓溶石竇開。宿霧不生澄曉月。殘風輕漾蟄寒雷。源從天漢星邊落。流自鼇峯海上回。莫謂無心事。奔注曾隨霖雨下山來。吳郡志。

李先

先字淵宗。許州臨潁人。第進士。官至祕書監。

與杜秀才

南極多老人。及見九代孫。君今古儋州。氣質清且溫。今年八十二。頗覺行步奔。白鬚映紅頰。疑是羲皇人。
淵鑑類函。

吳處厚

處厚字伯固。邵武人。皇祐五年進士。初為將作丞。蔡確嘗從處厚學賦。及作相。處厚通牋乞憐。無汲引意。用王珪薦除館職。出知漢陽軍。上蔡確車蓋亭詩。擢知衛州。卒。紹聖中以元祐黨追貶。歛州別駕。有青箱雜記。

萍洲可談。吳處厚知漢陽軍。每謂鸚鵡洲沔佳處。欲賦詩未就。一日網吏來告覆舟。吳問所

在。吏曰鸚鵡堰。吳拊案連唱大奇。徐曰。吾經年為鸚鵡洲。尋一對不得。天俸汝也。因得末減。

九江琵琶亭

夜泊潯陽宿酒樓。琵琶亭畔荻花秋。雲沈鳥沒事已往。月白風清江自流。

送客西陵

若邪溪畔醉秋風。獵獵船旗照水紅。後夜錢唐酒樓上。夢魂應遠浙江東。

青箱雜記。王安國作詩。多使酒樓。嘗語余曰。楊文公詩有江南一酒樓。隄柳拂人頭。李白題詩徧酒樓。錢昭度詩亦有酒樓。長憶錢唐江上望。酒樓人散雨千絲。子詩有幾酒樓。余答曰。吾詩有二酒樓。安國曰。足矣。

題王正叔灑景亭

亂鶯啼處柳飛花。拍拍春流漲曉沙。正是江南梅子熟。年年離恨寄天涯。

宣和畫譜。王穀字正叔。居偃城之南城。有小亭。下臨灑水。榜曰灑景亭。南通淮蔡。北望箕穎。川原明秀。甚類江鄉景物。吳處厚詩云。

自諸暨抵剡

夷猶雙槳去。莫不辨東西。夕照偏依樹。秋光半落溪。風高一雁過。雲薄四天低。莽蕩孤舟卸。水村楊柳堤。出得雲門路。風悽日夕曛。船撐鏡湖水。路指沃洲雲。山色周遭見。溪流屈曲分。一觴復一詠。誰是右將軍。
剡錄。

李常

常字公擇。南康建昌人。皇祐中進士。元豐中。歷太常少卿。禮部侍郎。哲宗朝。拜吏部侍郎。御史中

丞出知成都。有集。

解雨送神曲

怒風兮揚塵。日燦石兮將焚。水泉竭兮厚地裂。嘉穀槁兮孰爇且耘。神龍兮靈壑。挹清波兮幽瀆。鳴鼉鼓兮舞神覲。庶下鑒兮霈祥氛。肅旂旆兮先驅。咽簫笳兮擁歸輿。椒醕甘兮牲幣潔。始肸蠃兮爲之躊蹰。瞻前山兮嗟峨。指去路兮縈紆。神德大兮報無以晦。徒感涕兮長吁。宋文鑑

馬雲

雲皇祐中。蘇州節度推官。

訪踞湖仇山人隱居

雞犬眠雲白日空。暮春花木滿川紅。茶甌香沸松林火。藥杵聲清石澗風。玉帛未聞招隱士。神仙今喜識臺翁。夕陽半局殘碁在。醉倚巖邊紫桂叢。

踞湖山

山臨太湖上。寺隱青蘿間。五塢洞壑邃。衆峯屏障環。濃嵐面光彩。驚波背潺湲。雲歸定僧寂。月伴樵夫還。林墅掩蒙密。級磴容躋攀。錢氏建茅社。此地爲家山。

條竹塢

檀欒徧巖川。幽谷氣象鮮。風玉自宮徵。秋籟成管弦。夕靄起碧霧。晨曦生綠烟。花繁紫鳳飽。質勁蒼蚪攀。

藤蘿交密蔭。仰不見雲天。欲訪桃源路。塢塢疑相連。

吳郡志。踞湖山。卽橫山也。錢氏有國。日造寺于山下。曰薦福寺。里人又以寺名。名之。山有五大塢。圖經又名五塢山。五塢舊名不雅。皇祐五年。節度推官馬雲三遊此山。求其林澗之美。峯壑之秀。雲景之麗。泉石之怪。因其物象。名之曰芳桂。飛泉。條竹。丹

霞。白雲。合踞湖

爲六題以詠之。

襄州太守王侯洙復峴山羊公祠

漢水舒舒山崇崇。峇然峴首稱清雄。南方強吳特割據。選命儒將登元戎。太康以來千餘載。荊州遺愛思羊公。江山襟帶號形勝。藉此因成輔晉功。公謂高賢事迹異。視之閑暇無怱怱。測知當日登臨意。景物亦與今朝同。新就峯嶺作亭舍。面勢豁若凌烟虹。蒼蒼雲木望不盡。浩蕩古意深何窮。盤回小逕至釣石。山下臨水有巨石。曰釣臺。俯視凝碧相連通。叢篁森束林蒼鬱。又從其下興祠宮。迅湍急瀨鳴濤濤。濃嵐翠靄霏濛濛。晦晴氣象隨變易。朝昏萬狀殊初終。閣老分符二千石。旃竿刻隼車畫熊。管內民租絕逋負。里社歌鼓懽年豐。府門晝扃官事退。時引賓佐嬉其中。崖條嶺蔓雜丹白。澗花滿眼羅青紅。磴道迤邐陟縈屈。飄若巾屨騰秋空。豈獨遊觀樂閑燕。圖樹佳政希前風。經由麤得究本末。強顏模寫慙非工。音辭鄙俚雖一唱。下詞寒苦無怡融。襄陽府志。

顧臨

臨字子敦。會稽人。皇祐中。舉說書科。爲國子監直講。元祐中。拜天章閣待制。河北都轉運使。召爲

刑兵吏三部侍郎兼侍讀翰林學士紹聖初以龍圖閣學士知定州因黨論奪職斥饒州居住

雞肋編顧臨子敦內翰姿狀雄偉少未顯時人以顧屠嘲之元祐中自給事中爲河北都運使蘇子瞻作詩送之云我友顧子敦軀膽兩雄偉便便十圍腹不但貯經史容君數百人一笑萬事已十年臥江海了不見愠喜磨刀向猪羊醜酒會鄰里歸來如一夢豐頰愈茂美平生批敕手濃墨寫黃紙會當勒燕然廊廟登劍履翻然向河朔坐念東郡水河來屹不去如尊乃勇耳顧得之不樂旣行羣公祖道郊外子瞻辭疾不往和前韻以送因以自解焉君爲江南英面作河朔偉人閒一好漢誰似張長史上書若留君言拙輒報已置之勿復道出處俱可喜攀輿共六尺食肉飛萬里誰言遠近殊等是朝廷美遙知別送處醉墨爭淋紙我以病杜門商頌空振履後會知何日一歡如覆水善保千金軀前言戲之耳

題招提院靜照堂

踏暑夏日長履霜冬日短乞詩賁新堂經年不辭緩虛院莓苔青客衣塵土滿自矜非俗求容色長衍衍盈篋寶珠璣東歸春正暖靜照名已傳主人宜亦反至元嘉禾志

駕幸太學

五紀寥寥舊典章一朝清蹕下膠庠旗常日月隨天轉文武衣冠列宿行拜老徒煩嗟漢室談經戒逸慕周王已叨法從陪臨幸安足賡諸詠在堂中州題詠集

句

如逢公釀年來富鬪虎匡螯稻正肥蟹略

胡瑗

瑗字翼之。泰州海陵人。仁宗朝。以布衣召拜校書郎。爲湖州學官。皇祐中。爲國子監直講。嘉祐中。遷太子中允。充天章閣直講。以太常博士致仕。

石壁并序

余嘗覽李翰林題涇川汪倫別業二章。其詞俊逸。欲屬和之。今十月自新安歷旌德。而仙尉曾公望同遊石壁。蓋勝境也。奇峯對聳。清溪中流。路出半峯。佳秀可愛。傳聞新建汪公所居不遠。掩映溪岫。率類于此。且欲尋訪。迫暮不獲。因思旌川卽涇川接境也。而幽勝過之。汪公亦倫之別派也。而儒雅勝之。豈可使諷詠不及于古乎。輒成一首。題于汪公屋壁。雖不及藻飾佳境。比肩英流。庶俾謫仙之詩不獨專美矣。

李白好溪山。浩蕩旌川遊。題詩汪氏壁。聲動桃花洲。英辭逸無繼。爾來三百秋。汪公亦蕃衍。宗支冠南州。其間新建居。林泉最清幽。竹聲滿道院。山光入書樓。仙氣旣飄飄。儒風亦悠悠。子孫多俊異。詞行咸精修。我來至石壁。賞之不能休。酣味碧溪水。苦飲黃金甌。因羨汪君居。復思汪君投。遇景清興發。浩與天雲浮。斐章異繡段。灑翰非銀鈎。庶與謫仙詩。千古同風流。寧國府志

王疇

疇字景彝。濟陰人。舉進士。皇祐中。召試直祕閣。英宗朝。累遷翰林學士。禮部侍郎。拜樞密副使。卒。贈兵部尚書。諡忠簡。

送同年蒲叔範察判杭州監

釋之久未調。王粲當從軍。謂言塞垣事。壯氣橫風雲。育材幸明代。薦賢無令君。如無漢酤冗。沈此荆山珍。萍氏本譏酒。周官有彝倫。孝武事卻攘。志清天地屯。連兵無時已。四海蕭然貧。官始操釀具。權之飽師人。利源一以洩。頽波蕩無垠。糜穀費耒耜。良藥爭清醇。酒禁著律令。犯笞及其身。狂藥乃陷穽。傷哉堯舜民。炎靈屬我后。天資英且仁。邦力早雄富。漢制仍相循。歲賦二千萬。經入固已勤。彌年擁武節。聚邊清國氛。雄雄百萬師。跨邁擊燕秦。仰給傾武庫。賞賚圖戎勳。加斂猶不足。返古當何云。杭城東南劇。地將湖海鄰。權利冠天下。旗亭壓重闔。彼雖斗筭職。亦擇才英臣。風露氣已肅。溪潭寒彌新。沙榜朝汎汎。吳濤暮沄沄。南州近牛斗。氣象雄霜旻。汀楓變老枿。赤葉晴相紛。嘗茶泊幽寺。觀魚下輕輪。行當收翹楚。寧復混蒸薪。無爲狎吳叟。坐戀秋江蓴。宋文鑑

陳泊

泊字亞之。彭城人。后山之祖。皇祐中。官鹽鐵副使。有詩集。

眉山李壘云。案陳公國朝正史實錄俱無傳。然常以歲月考求。公嘗歷知懷州審刑院。寶元閒。自屯田員外郎爲副端。尋陞臺端。已而出漕京西淮南京東。慶歷五年。轉吏部員外郎。加直史館。改使益梓路。六年。入爲度支使副。尋轉鹽鐵。后山集載。皇祐元年。以副使行河還卒。今史亦失書。曲阜顏復云。少子先子遺書中。得公啓問詩章讀之。往往意在棲退。若送行閩中詩。公時爲審刑官。朝中望譽始充大。已有乞醉墦間之歎。是知君子自重而不苟合者。詩稿一卷。詞格秀古。造句愈工。則入淡泊愈深。若借宅云。四壁舊貧寧畏盜。一枝雖小易容巢。贈無已師云。他年遠公社。若箇是遺民。藍溪閑適云。露侵僧履蘭三徑。秋入農歌雨一犁。秋居云。井臼貧雖樂。溪山遠未歸。貽漁者云。擬共停橈醉天幕。緩歌濯足不迴頭。詩大小二十二篇。閩中送行不預。

焉逸者

可知已

離郭店馬上迴寄鄉知

迴望離亭映楚山。慨然西笑入長安。貪程野僕擔書引。惜別鄉人駐足觀。霞襯曙光烘積靄。柳和春色蕩輕寒。遙知此地歸來日。迎取相如駟馬看。

過項羽廟

八千子弟已投戈。夜帳猶聞怨楚歌。學敵萬人成底事。不思一箇范增多。

寄寶臣寺丞

萬里扶靈宅壽阡。謝公純孝是家傳。廬開四尺成寒士。棖列三圍陋昔賢。先域定生連理樹。門人多廢蓼莪篇。我心罔極君應念。露白霜清泣昊天。

藍溪閒居

白鹿原東虎候西。結廬岑寂映藍溪。霜侵僧履蘭三逕。秋入農歌雨一犁。耽枕溜聲疑水宿。拂簷山色類巖棲。閉門養拙無人問。揭盡陳篇日又低。

開元寺凌虛閣對雪寄唐卿

瓊滴琳華一夜凝。凌虛雕檻曉來凭。眼觀銀色三千界。身到瑤臺十二層。玉灑砌塵供庾斛。粉融簷水妒房陵。化人宮好分明在。恨不同君把袂登。

雉媒

朱冠袞背一何鮮。聲厲情驕目悍然。若道物情皆錫類。雉媒爭似鳩媒賢。

還劉處士先令公鄒功名錄自注劉公事朱梁

當年力戰蕩妖氛。十萬雄師四七勳。將略妙欺班定遠。家聲高過李將軍。銘圖魏鼎文猶在。筆勒燕山蹟尚分。今日閑披有遺恨。可憐生不遇明君。

謝人惠三峯朱柿

烏稗珍果益丹明。新折紅林蒂尙青。漿冷夜凝仙掌露。味甘秋剖楚江萍。圓堆玉椀櫻難並。剩薦金尊酒易醒。應念茂陵消渴者。整籃封貯到雲扃。

過田文墓

當年聞奏雍門琴。話著池臺淚滿襟。何況今朝陵谷畔。池臺無迹可追尋。

對雪寄崔仲裕自注時在藍田聞崔在酒舍

春鶴韜霞勢漸濃。卷簾庭館好支筇。乘槎路闊寒凝凍。種玉畦平曉被封。天上瑤宮當月圃。海中銀闕聳鼇峯。思君不得同吟賞。知在旗亭第幾重。

南齊

曲江歡宴侍華裾。舞拍琴歌藝有餘。獨有純臣王叔寶。略陳封禪一篇書。自注南齊太祖曲江宴羣臣各使效伎藝

緒淵彈琵琶。王僧虔彈琴。沈文季歌。張敬兒舞。王敬則拍張。王儉曰。臣無所解。唯解誦書。因跪帝前誦相如封禪書。帝笑曰。此盛德之事。

吾何以堪之。

湖上逢漁者

雨蓑烟笠洞庭秋。獨繭綸輕一葉舟。擬共停橈醉天幕。緩歌濯足不迴頭。

秋日端居

暑退蟲雷靜。門閒雀刺稀。露莎蚤自急。星樹鵲何依。井臼貧雖樂。溪山遠未歸。時情似秋雁。一一背寒飛。
以上陳副使集。

蘇舜元

舜元、字才翁。舊字叔才。開封人。易簡孫。皇祐中為提點兩浙刑獄守。尚書度支員外郎。有集。

明道雜志才翁子美兄弟也。子美名籍甚。才翁人少稱之。然才翁書字清勁老健。實過子美。至為詩有嘉句。子美亦不逮也。

送梁子熙聯句

大榮大辱能生死人。叔才。二物不並以撓厥真。子美。之子病悶腸如車輪。叔才。勞憂到母。餓寒著身。子美。世俗鹵莽輒置莫親。叔才。文殺光豔伏不得伸。子美。悽吟哀號酸入四鄰。叔才。夜計破午。若燕作秦。子美。腹憤軋軋胸奇陳陳。叔才。淮國晚嶺吳渠春津。子美。去謝夙蘊歸逢故辛。子美。雌火相丑。刮鑿遜屯。叔才。駕風鞭霆以脫凡鱗。子美。

茗溪漁隱叢話山谷云二蘇文章。

豪健痛快如此潘陸不足吞也。

仙都山

龍車鳳輦入瑤天。轍跡高懸不可攀。唯有風吹鼎湖水。青蓮花葉落人閒。仙都山志。

青州資政寄示小楷伯夷頌許昌相公以詩跋尾因作詩謝二公兼呈永興觀文相公舜元上

法書遙逐使車還。嘉句新從相府頒。牢落二賢天地外。自注孤竹之二賢。風流三絕古今閒。台文競耀高逾

麗。化筆交揮老更閑。不用悲吟恐飛去。豈無神物護重關。鐵網珊瑚。

釣鼈石 在長樂當陽寺。

未窮雙佛刹。先到一漁家。山雨已殘葉。溪風猶落花。汲泉沙脈動。敲火石痕斜。應是任公子。竹閒曾煮茶。
福州府志。

句

斷香浮缺月。古像守昏燈。宿僧院。 明道雜誌。

陳 侁

侁、皇祐閒。袁州通判。

題鄭都官墳祠

公沒歲已遠。公名人競傳。榛蕪四尺土。風雅三百篇。世未泯斯道。天實生我賢。築宮古原上。一奠一悽然。

袁州府志。

管師復

師復、龍泉人。從胡安定學。隱居不仕。人稱臥雲先生。

句

滿塢白雲耕不破。一潭明月釣無痕。括蒼彙紀。



宋詩紀事卷二十

錢唐厲鶚輯

祁門馬曰璐同輯

傅堯俞

堯俞字欽之。鄆州須城人。徙孟州濟源。未冠舉。至和四年進士。英宗朝累遷起居舍人。同知諫院。哲宗朝拜中書門下侍郎。卒贈銀青光祿大夫。謚獻簡。紹聖中以元祐黨籍奪謚。有集。

讀書

吾屋雖誼卑。頗不甚蕪穢。置席屋中閒。坐臥羣書內。橫風吹急雨。入屋灑我背。展卷殊未知。心與古人會。有客自外來。笑我苦癡昧。何致雨侵衣。屢問我不對。必欲窮所因。起荅客亦退。聊復得此心。霑溼寧足悔。

宋文鑑

李清臣

清臣字邦直。魏人。韓魏公妻以兄子。舉進士。治平二年舉制科。歷尚書右丞。徽宗朝拜門下侍郎。出知大名府。卒入黨籍。有淇水集。

墨莊漫錄。李邦直有與韓魏公書云。前書戲問玉梳金篦者。侍白髮翁。幾欲淡死矣。玉梳金篦。邦直之侍姬也。或問命名之意。邦直笑曰。此俗云和尚置梳篦耳。

投韓太祝

公子乘閑臥絳幘。白衣老吏慢寒儒。不知夢見周公否。曾說當時吐哺無。

青瑣高議韓魏公知中山李清臣謁見其姪吏報曰太祝方寢清臣爲絕句云云魏公見之曰吾知此人久矣遂有東牀之選

題江干初雪圖

此身何補一毫芒。三辱清時政事堂。病骨未爲山下土。尙尋遺墨話存亡。石林詩話

沂山龍祠祈雨有應作

南山高峻嶒。北山亦嶮崿。坐看南山雲。出沒行如驅。歸巖呼始覺。山中有靈物。鬱鬱其焚蘭。覃覃其擊鼓。祝屢歌。巫屢舞。我民無罪神所憐。一夜雷風三尺雨。嶺木兮蒼蒼。溪泉兮央央。雲散諸峯互明滅。東阡西陌農事忙。廟閉山空音響絕。茗溪漁隱叢話

南遷作

居近城南樓。步月時散策。小市早收燈。空山晚吹笛。兒呼翁可歸。恐我意慘戚。從來堅道念。老去倦形役。皇天卒相予。休以南荒謫。宴坐及此時。聊觀鼻端白。

絕句

八尺方牀織白藤。含風漪裏睡曹騰。若無萬里還家夢。便是三湘退院僧。以上後村詩話

送劉貢父倅海陵

吾儕客京師。晨夕厭謹聒。僦舍八九椽。鬱溽增煩渴。有如轍中魚。噉啣不可活。百鳥趨高門。趨趨互揮喝。論辯若難裁。氣焰欵相奪。所喪或捐軀。所得未易撮。我聞江湖閒。連山翠如抹。山下走滄波。山巔富松栝。鳧鳴亂菰蒲。魚龍聚坡竭。世事劇飛電。人生真漂沫。誰其違樂遊。而此就顰額。君直祕書閣。日趨黃金闕。忽思雲水行。飄然詎能遏。朝出都門東。襟胷迴披豁。放舟下淮楚。天地頓空闊。莫苦道路難。暑令悅已末。君看日月疾。俯仰換裘葛。無謂監州微。孔孟猶短褐。時來發光華。春陽奮枯枿。惟君飽才術。流輩服穎脫。早作歸朝期。豈學弦與箏。揚州府志

蔡挺

挺字子正。宋城人。舉進士。神宗朝。歷樞密副使。判南京留司御史臺。卒。贈工部尚書。諡敏肅。

以南都種山藥法送介甫并序

蒙見索南都種山藥法。并以生頭百十莖送上。因成小詩。

青青正是中分天。區種何妨試玉延。卽見引鬢緣夏木。定知如蹠薦冬筵。俗傳種時以足按之。卽如人足。潤還御水冰霜結。蔭迨堯雲雨露偏。自裹自題還自媿。揠苗應笑宋人然。王荆文公詩自注。

皇子生獻詩

昨夜薰風入舜韶。君王方避正衙朝。陽暉已得前星助。陰沴潛隨夜雨銷。

耆舊續聞。熙寧六年。有司言四月一日。當日蝕。上爲徹樂避正殿。一夕微雨。明日不見日。食。是日有皇子之慶。百官入賀。蔡子正爲樞副。因獻此詩。其序事切當。時無能過之者。

章望之

望之字表民。浦城人。郇公得象之姪。以蔭爲校書郎。監杭州茶庫。移病去。歐陽修韓絳等薦之。除知烏程縣。固辭。以光祿寺丞致仕。有集。

夏晝

一日常百刻。轉若車輪忙。千日十萬刻。百年能幾長。達人齊古今。一生甚微茫。夏日豈爲永。而足以較量。人世不足惜。行善乃自彰。無及閑暇時。般樂爲淫荒。夷齊餓人者。顏閔非公王。其人品孰亞。周氏與虞唐。亦用仁義積。豈今身未亡。富貴無可恃。莫與公道強。夜思晝以力。四序皆流光。示君夏晝誦。惕惕其自傷。
宋文鑑

蘇洵

洵字明允。眉州眉山人。至和中。歐陽修薦除校書郎。以霸州文安縣主簿。與姚闢同修太常因革禮書。成而卒。有嘉祐集。

雲興于山

雲興于山。霧霧爲霧。匪山不仁。天實不顧。山川我享。爲我百訴。豈不畏天。哀此下土。斑斑鳴鳩。穀穀晨號。天乎未雨。余不告勞。誰爲山川。不如羽毛。

我客至止

我客至止。我迎于門。來升我堂。來飲我樽。羞鼈不時。冒我不勤。求我何多。請辭不能。客謂主人。惟子我然。

求子之多。責子之深。期子于賢。以上嘉祐集。

淨因大覺璉師以閣立本畫水官見遺報以詩

水官騎蒼龍。龍行欲上天。手攀時且住。浩若乘風船。不知幾何長。足尾猶在淵。下有二從臣。左右乘魚鼉。矍鑠相顧視。風舉衣袂翻。女子侍君側。白頰垂雙鬢。手執雉尾扇。容如未開蓮。從者八九人。非鬼非戎蠻。出水未成列。先登揚旗旛。長刀擁旁牌。白羽注強拳。雖服甲與裳。狀貌猶鯨鱣。水獸不得從。仰面以手攀。空虛走雷霆。雨雹晦九川。風師黑虎囊。面目昏塵烟。翼從三神人。萬里朝天關。我從大覺師。得此詭怪篇。畫者古閻子。于今三百年。見者誰不愛。予者誠以難。在我猶在子。此理寧非禪。報之以好詞。何必畫在前。聲畫集。

九日和韓魏公

晚歲登門最不才。蕭蕭華髮映金罍。不堪丞相筵東閣。閑伴諸儒老曲臺。佳節已從愁裏過。壯心偶傍醉中來。暮歸衝雨寒無睡。自把新詩百徧開。

瀛奎律髓詩話。謂韓魏公九日飲執政。老泉以布衣與坐。今

味閑傍諸儒老曲臺之句。卽是修太常禮之時。非布衣也。

涵虛閣

在南昌東湖。國子博士李寅建。

幽居少塵事。瀟灑似江村。苔蘚深三徑。衣冠盛一門。嶺雲時聚散。湖水自清渾。世德書芳史。傳家有令孫。
南昌府志。

胡歸仁

歸仁、至和中成都人。所爲詩。自號安定八體。

集句

一第知何日。無端意不移。欲爲青桂主。誰與白雲期。傍架齊書帙。翻瓢作酒卮。文明終有托。休把運行推。白沙溪繞白雲堆。但有何人把酒杯。專慕聖賢知志氣。可憐談笑出塵埃。碧山終日思無盡。清世難羣好自猜。風滿老松門晝掩。可憐高尙挾天才。

蔡寬夫詩話亦自精密。但所取多唐末五代人詩。無復佳話耳。

李宗易

宗易、字簡夫。宛丘人。歷官尙書屯田員外郎。知光化軍事。仕至太常少卿。有詩集。

閑居有感

進退荷君恩。孤懷豈易論。以閑銷日月。使力報乾坤。架上書千卷。花前酒一尊。相持兩成癖。此外盡忘言。

靜居

大都心足身還足。祇恐身閑心未閑。但得心閑隨處樂。不須朝市與雲山。以上宋文鑑。

題峴山石幢

叔子祠荒歲已深。異時賢守重登臨。峴山岑寂瞻風槩。漢水靈長想德音。奉詔始聞新締葺。有知那復歎

涇沈。又刊翠琰畱南夏。先後功名照古今。襄陽府志。

張伯玉

伯玉字公達。建安人。第進士。嘗爲蘇州郡從事。范文正公舉以應賢良方正。能直言極諫。科嘉祐中爲御史。出知太平府。後選司封郎中。有蓬萊集。

鐵圍山叢談。張端公伯玉。仁廟朝人也。名重當時。號張百杯。又曰張百篇。言一飲酒百杯。一掃詩百篇故也。

明月泉

至今千丈松。猶伴數巖雪。不見纖塵飛。寒泉湛明月。

墨客揮犀。張端公過姑孰。見李太白十詠。歎美久之。周流泉石間。後見一水清澈。詢地人曰。此名明月泉。公曰。太白不題此泉。將留以待我也。

贈陳虞卿

東吳王孫歸挂冠。玉絲紅鱸滿雕盤。狂吟但覺日月久。醉舞不知天地寬。小圃移花山客瘦。夜窗擣藥橘童寒。新書近日成多少。且告先生旋借看。中吳紀聞。

虎丘

東客從來過虎丘。橘花渡口維扁舟。闔閭宮殿不可見。但對古塔寒颼颼。憶昔夫差全勝日。水犀十萬橫吳鉤。楚山旣掘荆人冢。越嶺仍將句踐囚。豈謂西施能破國。誰知麋鹿上臺遊。唯有吳王在時月。夜深閑

照劍池頭。吳郡志。

遙題錢公輔衆樂亭

句章太守錢君倚。湖上新爲衆樂亭。花木豈徒遊子愛。笙歌長與郡人聽。坐來高韻天風起。飲罷餘香夕雨零。安得凭闌縱吟筆。玉觴遙對數峯青。延祐四明志。

張鑄

鑄官京東轉運使。

與葛提舉

提司坑冶是新差。職比催綱勝一階。若發薦章求腳色。下官蹤跡轉沈埋。

趙槩見聞雜錄。張鑄以京東轉運使。坐公事降通判太平州。葛洪爲提舉坑冶。取鑄脚色。欲發薦狀。鑄與詩云云。

梅堯臣

堯臣字聖俞。宣城人。詢從子。以蔭補齋郎。嘉祐初。召試。賜進士。擢國子直講。歷尙書都官員外郎。卒。有宛陵集。

宋子京筆記。余每見舊所作文。章憎之。必欲燒棄。梅堯臣曰。公文進矣。僕之詩亦然。

歐公詩話。聖俞子美齊名一時。詩體特異。子美筆力豪俊。以超邁橫絕。

爲奇。聖俞覃思精微。以深遠閑淡爲意。各極其長。雖善論者不能優劣。

歸田錄。梅聖俞以詩知名三十年。終不得一館職。晚年與修唐書。書成未奏而卒。其初受敕也。語其妻刁氏曰。吾之修書。可謂糊孫入布袋矣。刁氏對曰。君子仕宦。亦何異鮎魚上竹竿耶。聞者皆以爲善對。

韻語陽秋。張芸叟評梅聖俞詩云。如深

山道人。草衣捆屨。王公大人見之。屈膝。

茗溪漁隱叢話。舊說梅聖俞

日課一詩。寒暑未嘗易也。

敖陶孫詩評。梅聖俞如

關河放溜。瞬息無聲。

寄馬遵

三更醉下陵陽峯。仙舟江上去無蹤。槎牙鐵鎖漫橫絕。櫓溼不驚潭底龍。斷腸吳姬指如筍。欲剝玉榼將何從。短翎水鴨飛不遠。那經細雨山重重。卻顧舊埽病驄馬。塵沙歷盡空龍鍾。

隱居詩話。馬遵謫守宣州。及其去也。郡僚軍民爭欲駐留。至以鐵鎖絕江。遵于錢筵倚醉。令官妓剝榼實而食。眷眷若留連狀。及以所乘驄寄聖俞家。郡人皆不疑其去也。遵夜使人絕鎖解舟。以水沃櫓牙。使之不鳴。逮曉舟去遠矣。

舟中與家人飲

月出斷岸口。影照別舸背。且獨與婦飲。頗勝俗客對。月漸上我席。暝色亦少退。豈必在秉燭。此景亦可愛。

西清詩話。晏元獻守汝陰。梅聖俞往見之。將行。公置酒潁河上。因言古人章句中。全用平聲。製字穩貼。如枯桑知天風是也。恨未見側字詩。聖俞既引舟。遂作五側體寄公云云。

花娘歌

花娘十二能歌舞。籍甚聲名居樂府。荏苒其閒十四年。朝爲行雲暮爲雨。格高氣俊能動人。人能動之無幾許。前歲適從江國來。時因讌席相微語。雖有幽情未得傳。暗結慙懃度寒暑。去春從客出東城。舟中接膝心已傾。自從稍稍有期約。五月蓮航並釣行。曲隄別浦無人處。始笑鴛鴦浪得名。爾後頓逢殊燕婉。各恨從來相見晚。月下星前不暫離。暫離已抵銀河遠。青鳥傳音日幾回。雞鳴歸去暮還來。經秋度臘無纖失。愛極情專易得猜。前年南圃尋芳卉。小忿不勝投袂起。官司乘釁作威凌。督促倉皇出閭里。瀟瀟風雨滿長溪。一舸飄然逐流水。忽逢小吏向城東。泣淚寄言心欲死。願郎日日致青雲。妾已長甘在泥滓。更悲恩義不得終。世事難憑何若此。郎聞此語痛莫禁。天地無窮恨不已。我今爲爾偶成章。便欲緘之托雙鯉。

莫打鴨

莫打鴨。打鴨驚鴛鴦。鴛鴦新自南州落。不比孤洲老禿鷓。禿鷓尙有獨飛去。何況鴛鴦羽翼長。

侯鯖錄。宣城守呂士龍。好緣微罪杖營妓。後樂籍中得一客娼。妙麗善歌。有聲于江南。士龍眷之。一日復欲杖營妓并麗華。麗華曰。不避杖。但恐新到某人不安耳。士龍笑而從之。麗華短肥。故聖俞作莫打鴨以解之。

京師逢賣梅花

驛使前時走馬回。北人初識越人梅。清香莫把醪醑比。只欠溪邊月下杯。

茗溪漁隱叢話。東坡云。此梅二丈絕句。吾雖後輩。猶及與之周旋。覽其親書詩。如見其抵掌談笑也。

采石月下贈功甫

采石月下訪謫仙。夜披錦袍坐釣船。醉中愛月江底懸。以手弄月身翻然。不應暴落飢蛟涎。便當騎鯨上青天。青山有家人謾傳。卻來人間知幾年。在昔熟識汾陽王。納官貫死義難忘。今觀郭裔奇俊郎。眉目真似工文章。死生往復如康莊。樹穴探環知姓羊。

茗溪漁隱叢話。聖俞贈功甫云云。余謂李白從永王璘之辟。璘敗當誅。郭子儀請解官以贖其罪。有詔長流夜郎。聖俞用此事尤爲親切。若非姓郭亦難用矣。功甫母夢李白而生。功甫少有詩名。聖俞嘗曰。天才如此。真太白後身也。

陳恭公挽詞二首

位至三公有恩加錫諡無。再調金鉉鼎。屢刻玉麟符。已歎鸞同穴。還悲鳳少雛。擁塗看鹵簿。誰爲畢三虞。公在中書日。朝廷百事叢。王官多不喜。天子以爲忠。富貴人閒少。恩榮歿後隆。若非笳鼓咽。寂莫奈秋風。

東軒筆錄。陳恭公事仁宗兩爲相。悉心盡瘁。百度振舉。然性嚴重。語言簡直。與人少周旋。接賓客以至親戚骨肉。未嘗從容談笑。尤靳恩澤。士大夫多怨之。唯仁宗嘗曰。不昧我者。唯陳執中耳。及終也。韓維張洞諡之曰榮靈。仁宗特賜曰恭。薨後月餘。夫人謝氏繼卒。一子纔七歲。諸姪俱之官。葬日。門下之士。唯解賓王至墓所。世人嗟悼之。梅堯臣作挽詞兩首。具載其事。

劉丞相挽詞二首

處外諸侯重。居朝聖主知。祚逢庚子日。夢異戊丁時。歸棹江山遠。凝笳道路悲。欲傳千古迹。佐世本無爲。古今皆可見。富貴不常存。歌者未離席。弔賓俄在門。朱輪空返轍。淥酒尙盈尊。人事固如此。令名貽後昆。

東軒筆錄。劉丞相沆鎮陳州日。鄭獬經由丞相爲啓宴于外庭。使妓樂迎引至通衢。有朱衣樂人誤旨。公性卞急。遽杖于馬前。既而卽席酒數行。而公得疾。昇還府衙而終。先是張侍讀環夢公馬前有一朱衣人被血而立。至是果有此變。梅堯臣爲公挽

詞詩二首。

具載其事。

春雪

朔風三日暗吹沙。蛟龍卷沫噴成花。花飛萬里奪曉月。白日爛堆愁女媧。大月廣庭踏朝賀。雉尾不掃黏官鞞。宮中才人承聖顏。承觴稱壽呼南山。三公免責百姓喜。斗酒十千誰復慳。以上宛陵集。

六一詩話。蘇子瞻學士嘗于清井監得西南夷人所賣蠻布弓衣。其文織成梅聖俞春雪詩。此詩在聖俞集中未爲絕唱。而異域之人貴重如此。子瞻以余尤知梅聖俞者得之。因以見遺。余家舊畜琴一張。乃寶歷二年雷會所斲。其聲清越如擊金石。遂以此布更爲琴囊。二物真余家之寶玩也。

書竄詩

皇祐辛卯冬十月十九日。御史唐子方危言初造膝。曰朝有巨奸。臣介所憤嫉。願條一二事。臣職敢妄率。宰相文彥博邪行世莫匹。曩時守成都。委曲媚貴。暱銀璫插左貂。窮臘使馳驛。邦媛將夸中。黃金齎十鎰。爲我寄使君。奇文織織密。遂傾西蜀巧。日夜急鞭扶。紅經緯金縷。排料鬪八七。比比雙蓮華。篝燈戴心出。幾日成一端。持行如鬼疾。明年觀上元。被服穩稱質。燦然驚上目。遽爾有薄詰。既聞所從來。佞對以未失。且云奉至尊。于妾豈能必。遂回天子顏。百事容丐乞。臣今得粗陳。狡獪彼非一。偷威與賈利。次第推甲乙。

是惟陰猾雄。仁斷宜首黜。必欲致太平。在列無如弼。弼亦味平生。況臣不阿屈。臣言天下公。奚敢身自卹。君旁有側目。暗啞橫詆叱。指言爲罔上。廢汝還蓬華。是時白此心。尙不避斧鑕。雖令禦魑魅。甘且同飴密。既知弗可懼。復以強詞窒。帝聲亦大厲。論奏不容畢。介也容甚閑。猛士膽爲慄。立貶嶺外春。速欲爲異物。內外官洶洶。陛下何未悉。卽敢救者誰。襄執左右筆。謂此儻不容。盛美有所拂。平明中執法。懷疏又堅述。介言或似狂。百豈無一實。恐傷四海和。幸勿苦倉卒。亟許遷英山。衢路猶嗟咄。翊日宣白麻。稱快口盈溢。阿附連諫官。去若懷絮蝨。其閒因獲利。竊笑等蚌鷓。英州五千里。瘦馬行駉駉。毒蛇噴曉霧。晝與嵐氣沒。妻孥不同途。風浪過蛟窟。存亡未可知。雨館愁傷骨。飢僕時後先。隨猿拾橡栗。粵林多蔽天。黃柑雜丹橘。萬室同釀酤。撫遠無禁律。醉去不須錢。醒來弄鳴瑟。山水仍奇怪。已可消憂鬱。莫作楚大夫。懷沙自沈汨。西漢梅子真。出爲吳市卒。市卒且不慙。況茲別乘秩。

東軒筆錄。張堯佐以進士擢第。累官至屯田員外郎。知開州。會其姪女有寵于仁宗。册爲修媛。堯佐遂驟遷擢。一日中除宣徽節度。景靈羣牧四使。是時御史唐介上疏引天寶楊國忠爲戒。不報。又與諫官包拯吳奎等七人論列殿上。既而中丞御史留百官列班。以廷諫卒。奪堯佐宣徽使。知河陽。唐謂同列曰。是欲與以宣徽而假河陽爲名耳。我曹豈可終已耶。同列依違不前。唐獨爭之不能奪。仁宗諭曰。差除自是中書。介遂極言宰相文彥博。以燈籠錦媚貴妃。而致位宰相。今又以宣徽使結堯佐。請逐彥博而相富弼。又言諫官觀望挾奸。而言涉宮掖。語甚切直。仁宗怒。亟召兩府以疏示之。介猶諍不已。樞密副使梁適叱介使下殿。介諍愈切。仁宗大怒。玉音甚厲。衆恐禍出不測。是時蔡襄修起居注。立殿陛。卽進曰。介誠狂直。然納諫容言。人主之美德。必望全貸。遂貶春州別駕。翊日御史中丞王舉政救解之。改爲英州別駕。始上怒未已。兩府竊議曰。若重貶介。則彥博不安。彥博去。卽吾屬遞遷矣。既而果如其料。當是時梅堯臣作書竄詩云云。始堯臣作此詩。不敢示人。及歐陽修編其集。時有嫌避。

又削出此詩是以
少人知故全錄焉

贈王英英

山陽女子大字書。不學常流事梳洗。親傳筆法中郎孫。妙畫蠶頭魯公體。

隱居詩話。楚州有官妓王英英。喜筆札。學顏魯公體。蔡襄頃教以筆法。晚年作大字甚佳。梅堯臣贈之詩云云。英英貌甚陋。故有不事梳洗之句。中郎孫君謨也。

詠老人泉

泉中有老人。隱見不可常。蘇子居其閒。飲水樂未央。泉中必有魚。與子日倘佯。泉中苟無魚。子持玩滄浪。歲月不知老。家有雛鳳凰。百鳥戢羽翼。不敢呈文章。去為仲尼歎。出為盛時祥。方今天子聖。毋滯此泉旁。

茗溪漁隱叢話。東坡言先君與梅二丈遊時。軾與子由甚少。未有知者。梅公獨知之。家有老人泉。公作詩云云。聖俞歿今四十年矣。南遷至合浦。見其門人歐陽晦夫。出其詩彙數十幅。其遺晦夫詩云。我家無梧桐。安得久留鳳。晦夫年六十六。尚少余一歲。然白髮蒼顏。略相似。困窮亦不相遠。執手大笑曰。聖俞所謂鳳者。豈例皆窮如此乎。

句

不見分香妾。空餘鬪鴨闌。趙韓王故宅。竹陰過晚雨。林表見殘虹。納涼。鬢約寒鷓碧。衣輕舞蝶黃。會東堂。斜陽鳥外落。新月樹端生。泛江。綠草旋抽心。青梅猶帶萼。暮春。五更千里夢。殘月一聲雞。夢後寄永叔。雨過短亭雲。

斷續鶯啼高柳路西東。送趙徐州。有客過顏巷，無貧似阮家。和希深見過。曉漲林煙重，春歸野水平。廣福閣。好

峯隨處改，幽逕獨行迷。山行。晚雲連雨黑，秋水帶沙渾。朱家曲。山形無地接，寺界與波分。金山。衣霑寒食雨，

花發故宮牆。送人永寧。迸筍過幽草，吹香到別家。春日東齋。懸蟲低復上，鬪雀墮還飛。秋日家居。風雨幽林靜，

雲烟古寺深。遊嵩避雨。野色逼人寒，嵐光添酒綠。牛首山寺。霜氣冷侵被，月光斜入扉。省中初直。對山憐去鳥，

隔樹識遊人。泛西湖。長楊靜響千重瓦，太液寒生幾寸波。雨。南嶺禽過北嶺叫，高田水入低田流。經田家。野

鳧眠岸有閑意，老樹著花無醜枝。東溪。花寒蛺蝶猶相守，水冷鴛鴦不暫分。寄王學士。吟窗雜錄。

張獻民

獻民、宣城主簿，嘗與梅聖俞倡和。

朝陽洞

撇衣秉火捫石入，路硬磽确墨如漆。窮深不見瞿硎生，洞中依舊石藏室。

夕陽巖

屹嶮欲到倚山腳，涵雲洩雨摩半空。向晚呀然射頽照，疊石爛爛參差紅。以上寧國府志。

吳季野

季野、與梅聖俞同時倡和。

遊山門寺望文脊山

宣城百山閒，文脊尤奇峯。拔出飛鳥上，圖畫難爲容。聞昔有幽人，捫蘿追赤松。遺形此石室，孤坐鹿裘重。

寧國府志
人去邈不返。洞壑空藏龍。側行蒼崖烟。俯仰求靈蹤。逝者追可得。甘棄萬戶封。安能久塵土。傾倒相迎逢。

柳 紳

紳、官著作佐郎。

仙都山

獨出諸峯表。周圍一丈圓。千尋雄鎮地。萬仞上擎天。湖浪動星際。荷花生日邊。終當駕雲鶴。終頂會神仙。
仙都山志

陳若拙

若拙、處州守。

題仙都山

發地更擎天。根盤數畝烟。化工成突兀。轍迹似雕鐫。峭拔殊無倚。孤高衆莫肩。軒轅從此去。知復幾千年。
仙都山志

曾鞏

鞏、字子固。建昌南豐人。易占長子。嘉祐二年進士。調太平州司法參軍。召爲集賢校理。出知福明等州。神宗朝。加史館修撰。中書舍人。卒。有元豐類稿、續稿、外集。

麻姑山送南城尉羅君

麻姑之路摩青天。蒼苔白石松風寒。峭壁直上無攀援。懸磴十步九屈盤。上有錦繡百頃之平田。山中遺民耕紫烟。又有白玉萬仞之飛泉。噴崖直瀉蛟龍淵。豐堂廣殿何言言。階腳插入斗牛閒。樛枝古木不計年。空嗟枵然臥道邊。幽花自嬋娟。林深爲誰妍。但見塵銷境靜。翔白鶴。吟清猿。雛禽乳鹿。往往嗥荒顛。卻視來徑如緣絙。千重萬疊窮巖巒。下有荆吳粟粒之羣山。又有甌閩一髮之平川。奕棊縱橫遠近布。菽麥魚鱗參差高下分。岡原千奇萬異可意得。筆墨禿盡誰能傳。丈夫舒卷要宏達。世路俯仰多拘牽。偶來到此醒心目。便足洗耳辭蹶喧。羅夫子一日遠補東南官。愛此層崖峻壑之秀發。開軒把酒可縱觀。喜此披霧插漢之負起。出門舉足得往還。羅夫子一尉東南方。屈盤此邦之人衣食足。問境年年桴鼓閑。几案剗裁得休暇。山水登躡遺紛煩。我行送之思故國。引領南望心常懸。

金山寺

塵外岩堯鷲嶺宮。架虛排險出青紅。林光巧轉滄波上。海色遙涵白日東。夜靜神龍聽呪食。秋涼蒼鶴起搏風。連荆控蜀長江水。盡在迴廊顧盼中。

錢塘上元夜祥符寺陪咨臣郎中文燕席

月明如晝露華濃。錦帳名郎笑語同。金地夜寒消美酒。玉人春困倚東風。紅雲燈火浮滄海。碧水樓臺浸遠空。白髮蹉跎歡意少。強顏猶入少年叢。

鮑山 在濟南城東二十里。世傳鮑叔牙管仲分金處。下有鮑城。蓋叔牙食邑。

雲中一點鮑山青。東望能令兩眼明。若道人心似矛戟。山中那得叔牙城。

聖壽院昌山主靜軒

一峯瀟灑背城陰。碧瓦新堂地布金。花落禪衣松砌冷。日臨經帙紙窗深。幽棲鳥得林中樂。燕坐人存世外心。應是白蓮香火社。不妨籃輿客追尋。

凝香齋

在濟南郡。舊名西齋。文定公取韋應物燕寢凝清香之句更名。

每覺西齋景最幽。不知官是古諸侯。一尊風月身無事。千里耕桑歲有秋。雲水醒心鳴好鳥。玉砂清耳漱寒流。沈心細細紉黃卷。疑在香爐最上頭。

多景樓

欲收佳景此樓中。倚徙闌干四望通。雲亂水光浮紫翠。天含山氣入青紅。一川鐘唄淮南月。萬里帆檣海外風。老去衣襟塵土在。祇將心目羨冥鴻。

金線泉

玉甃常浮顥氣鮮。金絲不定路南泉。雲依美藻爭成縷。月照寒溪巧上弦。已繞渚花紅灼灼。更縈沙竹翠娟娟。無風到底塵埃盡。界破冰綃一片天。

能改齋漫錄。齊州城西。張諫議園亭。有金線泉。石甃方池。廣袤丈餘。泉亂發。

其下東注城壕中。澄澈見底。池心南北有金線一道。隱起水面。曾南豐有詩。

霧凇

園林初日靜無風。霧凇開花處處同。記得集英深殿裏。舞人齊插玉璫鬆。

墨莊漫錄。東北冬月寒甚。夜氣塞空如霧。著于林木。凝結如珠玉。見曉乃消。齊魯謂之霧凇。諺云。霧凇重霧凇。窮漢置飯甕。豐年之兆也。曾子固在齊州詩云云。

北歸

江海多年似轉蓬。白頭歸拜未央宮。堵牆學士爭相問。何處塵埃瘦老翁。以上元豐類稿。

將行陪貳車觀燈

行歌紅粉滿城歡。猶作常時五馬看。忽憶使君身是客。一時揮淚逐金鞍。

赴齊州

淮南蒙召鬢毛斑。乞得東秦慰病顏。曉整輕鞍汶陽北。卻衝微雨看青山。以上合璧事類後集。

曾布

布字子宣。鞏弟。與兄同年登第。熙寧初。除崇政殿說書。元豐初。累戶部尚書。哲宗朝。擢同知樞密院事。徽宗即位。以定策功。拜尚書右僕射。崇寧初。出知潤州。連遭貶竄。復提舉嵩山崇福宮。卒。贈觀文殿大學士。諡文肅。入黨籍。

能改齋漫錄。曾子宣以亥年亥月亥日亥時生。章子厚每以四亥公呼之。

表海亭

表海風流舊所聞。青冥飛觀一番新。山河十二名空在。簪履三千迹已陳。極目烟嵐九霄近。滿川樓閣萬

家春由來興廢南柯夢。且喜登臨屬後人。

東舉雜錄。青社表海亭。取太公表東海之義。元祐初。曾子宣為守。鼎新之。有詩云云。

布作高陽臺。衆樂園成。被命與金陵易地。兄弟待罪。侍從對更方面。實為私門之慶。走筆寄子開弟。樓臺丹碧照天涯。塞北江南未足誇。千里烟波方種柳。萬枝桃李未開華。一麾同下西清路。兩鎮高迎上將牙。回首林塘莫畱戀。風光還屬阿連家。

瀛奎律髓。此事古今希有。將吏交迎送于途。誠盛事也。後子宣相。子開當制。尤為盛事。又其後居京口。先後一日卒。惜子宣為小人之相。

靈泉寺

一掬寒泉照眼明。冰霜凜凜坐中清。生芻想見當時客。華屋空畱後世名。曉日淨涵金碧影。秋風暗動佩環聲。他年卜築南山下。白首何人共濯纓。撫州府志。

曾孝寬

孝寬字公綽。公亮子。以蔭仕。熙寧中。累官簽書樞密院事。吏部尚書。卒。贈右光祿大夫。

史院席上奉和首相吳公元韻

御府盼醇釀。君恩錫餽餘。賜筵遵故事。紬史重新書。燕飲難偕此。風流不偉歟。素殮非所職。媿附相君車。

揮塵後錄

馬端

端官太常博士通判延州軍州事。

司馬晉州待制哀辭石刻在夏縣司馬公祠堂

志古流難合。談高道自明。風波直恩分。公為羣牧倅。當曹之遷也。人以公始嘗堅辭其辟。當自為辨。公惻然謝曰。今日正宜從

其行也。卒不以辨識者難之。鍼石盡交情。公與人交。必盡規諫。始若不勝其言。退則敦義彌篤。讓節蒙知厚。公在鳳翔日。被召知

諫院。公辭之。自是深簡上心。華班絕綺榮。公生平特立。至為侍從。皆出宸選。賤生懷感遇。當路假晶熒。端辱公以八使慰薦。

遂蒙改官。累次青油幕。端在益昌及岐下。皆預賓席。中閒白玉京。吏文容議緩。端在幕府。每奉公議。特被優假。邦事卹言

輕。戊寅年。端輒奏疏言事。公時在京師。嘗見憫孤直。自此嗟流梗。何期苦見兵。是歲別公出宰郾城。明年移倅邊郡。塞垣心易

動。漳浦信彌驚。今春得三堂信。知公屬疾。玉蘂悲無驗。金臺望忽傾。歲闌雲慘淡。天迴淚縱橫。世有真忠亮。今

亡至直清。舊僚知葬日。投此弔佳城。嘉祐元年十月三十日著作佐郎管句河東路機宜文字雷憲書 求古錄

祖世英

世英字穎仲。浦城人。第進士。通判融州。

三學院在新城縣郭文舉捨宅為寺

洞庭之山天下奇。岡巒百轉盤青螭。金堂玉室白雲鎖。中有仙客來棲遲。方晴秀骨郭文舉。孤劍青鞵出巖戶。竭來此地訪禪翁。共掃松花談太古。拏雲忽駕升天行。西歸隻履埋巖坳。聲流影散遠如許。故山惟有松風清。道師懷古興不淺。堂宇橫陳迎翠巘。悠悠遐想山阿人。水帶雲衣猶在眼。涼飈五月吹浮埃。蕉

宋詩紀事卷二十一

錢唐厲鶚輯
海寧施謙勘定

蘇軾

軾字子瞻，洵長子。嘉祐二年進士乙科，對制策入三等，累除中書舍人、翰林學士，歷端明殿學士、禮部尚書。紹聖初，坐訕謗，安置惠州，徙昌化。徽宗立，赦還，提舉玉局觀。建中靖國元年卒于常州。高宗朝，贈太師，諡文忠。有《東坡前後集》、《和陶集》、《應詔集》。

明道雜誌：蘇惠州嘗以作詩下獄，再起遂徧歷侍從，而作詩每為不知者咀味，以為有譏訕，而實不然也。出守錢唐，來別潞公，公曰：願君至杭少作詩，恐為不相喜者誣謗，再三言之。臨別上馬笑曰：若還興也，便有箋云：時有吳處厚者，取蔡安州詩作注。蔡安州遂遇禍，故有箋云之戲。又云：願君不忘鄙言，某雖老悖，然所謂者希之歲不妨也善之言。

散陶孫詩評：蘇東坡如屈注天潢，倒連滄海，變取百怪，終歸雄渾。

庚溪詩話：光堯太上皇帝朝，盡復軾官，擢其孫符至尚書。今上皇帝尤愛其文，梁丞相叔子，乾道初任掖垣，一日內中宿直，召對，上曰：近有趙夔等注軾詩甚詳，卿見之否？命內侍取以示之。至乾道末，上遂為軾御製文集序贊，命有司刊之，因贈太師，諡

文忠又賜曾孫燾出
身擢為臺諫侍從

題韓康公家妓白團扇 曰瑄按續集作雜詩字句有小異

窗搖細浪魚吹日舞罷花枝蜂遶衣不覺南風吹酒醒空教明月照人歸

侯鯖錄韓康公絳子華謝事後自穎入京看上元至十六日私第會從官九人皆門生故吏盡一時名德如傅欽之胡完夫錢穆父東坡劉貢父顧子敦皆在坐錢穆父知府至晚子華不悅坡云今日為本殿燒香人多留住坐客大笑錢形肖九子母丈夫也方坐出家妓十餘人侍飲其專寵者曰魯生舞罷為遊蜂所螫子華意不甚懌久之呼出持白團扇從東坡乞詩坡書云云上句記姓下句書蜂事康公大喜坡曰惟恐他姬厮賴故云耳客皆大笑

題萬松亭

十年種木百年規好德無人助我儀縣令若同倉庾氏亭松應長子孫枝天公不赦斧斤厄野火解憐冰雪姿為問幾株能合抱殷勤記取角弓詩

復齋漫錄萬松亭在關山始麻城縣令張毅植萬松于道用以庇行者且以名其亭去未十年而松之存者十不及三四東坡元豐二年謫居黃州過而賦詩云崇寧以還坡文方禁故詩碑不復見而過往題詠者不可勝紀鄱陽倪左司濤傷之以詩云

舊韻無儀字蒼髯
有恨聲謂此也

何公橋 一名政和橋

天壤之間水居其多人之往來如鶉在河順水而行雲駛鳥疾惟水之利千里咫尺亂流而涉過膝則止

惟水之害。咫尺千里。沔彼濫觴。蛙跳鯨遊。溢而懷山。神禹所憂。豈無一木。支此大壞。舞于盤渦。冰拆雷解。坐使此邦。畫爲兩州。雞犬相聞。胡越莫救。允毅何公。甚勇于仁。始作石梁。其艱其勤。將作復止。更此百難。公心如鐵。匪石則堅。公以身先民。以悅使老。壯負石如負其子。疏爲玉虹。隱如金隄。直欄橫檻。百賈所棲。我來與公同載而出。驢呼闔道。抱其馬足。我嘆而言。視此滔滔。未見剛者。孰爲此橋。願公千歲。與橋壽考。持節復來。以慰父老。如朱仲卿。食于桐鄉。我作銘詩。子孫不忘。

容齋三筆。英州小市。江水貫其中。舊架木作橋。每不過數年。輒爲湍潦所壞。郡守建安何智甫。始疊石爲之。方成。而東坡還自海外。何求文以紀。坡作四言詩。凡五十六句。予侍親居英。與僧希賜遊南山。步過橋上。讀詩碑。希賜云。真本藏于何氏。此有石刻。經黨禁亦不存。今以板刻之。乃希賜所書也。賜因言何公初請記。坡爲賦此詩。既大書矣。而未遣送。郡侯兵執役者見之。以告何。何又來謁。坡曰。軾未到橋所。難以想像落筆。何卽命具食。拉坡偕往。坡曰。使君爲地主。宜先升車。何謝不敢。乃並轎而行。既至。坡曰。正堪作詩。晚當奉戒。抵暮送與之。蓋中云。我來與公同載而出。驢呼闔道。抱其馬足。故欲同行。以印此語耳。

呂與叔博士挽詞

言中謀猷。行中經。關西人物。數清英。欲過叔度。畱終日。未識魯山。空此生。論議凋零。三益友。功名分付。二難兄。老來尙有憂時歎。此涕無從何處傾。

耆耆年繼史。呂大臨字與叔。丞相大防之弟。監鳳翔府司竹。監東西省從官。列其行義修飭。文辭爾雅。除太學博士。著考古圖三十卷。其卒也。東坡作挽詩哭之云。

贈李委

山頭鳴鶴向南飛。載我南遊到九嶷。下界何人也吹笛。可憐時復犯龜茲。以上東坡前後集。

茗溪漁隱語話。元豐五年十二月十九日。東坡生日也。置酒赤壁磯下。踞高峯。俯鶴巢。酒酣。笛聲起于江上。客有郭古二生。頗知音。曰。笛聲有新意。非俗工也。使人問之。則進士李委。聞坡生日。作新曲曰鶴南飛。以獻。呼之使前。則青巾紫裘。膝笛而已。既奏新曲。又快作數弄。嘹然有穿雲裂石之聲。坐客引滿醉倒。委袖出嘉紙一幅。曰。吾何求于公。得一絕足矣。坡笑而從之。

太真妃帶詞

百疊漪漪水皺。六銖縱縱雲輕。植立含風廣殿。微聞環佩搖聲。

茗溪漁隱叢話。軾自蜀應舉京師。道過華清宮。夢明皇令賦太真妃帶詞。乃六言詩也。覺而記之。

端午帖子

上林珍木暗池臺。蜀產吳苞萬里來。不獨盤中見盧橘。時于糗裏得楊梅。

墨莊漫錄。玉臺新詠。徐君蒨共內人夜守歲詩。酒中喜桃子。糗裏覓楊梅。今人未見。以楊梅爲糗。東坡以角黍爲午日之饌。故借言之耳。

來鶴亭

鴻漸偏宜丹鳳南。冠霞披月羽毵毵。酒酣亭子來看舞。有客新名喚作耽。

袁褰楓窗小牖。余汴城故居。近陳州門內蔡河東畔。居後有圃。喬林深竹。映帶城隅。中有來鶴亭。王大父時。有野鶴來棲。遂馴狎不去。蘇子瞻有詩云云。每誦之。未嘗不淚滿青衫也。

大庾嶺村居題壁

鶴骨霜髯心已灰。青松夾道手親栽。問翁大庾嶺頭住。曾見南遷幾箇迴。

娛書堂詩話。東坡還至庾嶺上少憩。村店有一老翁出問從者曰。官爲誰。曰蘇尙書。曰是蘇子瞻歟。曰是也。乃前揖坡曰。我聞人害公者百端。今日北歸。是天祐善人也。東坡笑而謝之。因題一詩于壁。

贈妓李宜

東坡居士文名久。何事無言及李宜。恰似西川杜工部。海棠雖好不題詩。

庚溪詩話。東坡謫居齊安。樂籍中李宜者。色藝不下他妓。因讌席中有得詩曲者。宜以語訥不能有所請。人皆咎之。坡將移臨汝。于飲餞處。宜哀鳴力請。坡半酣笑謂之云云。

書劉君佐小女袿帶

任從酒滿翻香縷。不願書來繫綵牋。半接西湖橫綠草。雙垂南浦拂紅蓮。

春渚紀聞。每句皆用一事。尤可珍寶也。

戲書徐黃州侍人閤姬

玉筍纖纖揭繡簾。一心偷看綠羅尖。使君三尺毬頭帽。須信從來只有簷。

春渚紀聞。徐黃州之子叔廣嘗書先生醉墨一幅。乃是張無盡過黃州。而黃州有四侍人。適張夫人攜其一往壻家。爲浴兒之會。無盡因戲語云。厥有美妾。良由令妻。卽續之爲小賦云。道得徵章。鄭趙。姓稱孫妻。閻齊。浴兒于玉潤之家。一夔足矣。侍坐于冰清之側。三英粲兮。旣暮而張夫人復還其一。乃閻姬也。公復書絕句云云。

春帖子 元祐二年十二月五日進皇太妃閣。

東風弱柳萬絲垂。的皪殘梅尙一枝。蠶館乍欣蠶浴後。禩壇猶記燕來時。

式古堂書考。殿閣位次春帖。自歐公涑水之後。惟有坡老。因頌寓規。不但求工樂府而已。坡老欲以秦郎供帖子。豈非以其才調宜用于此耶。少遊不歷此官。莫知工拙。周美成亦有才思者。代內制春帖子卅首。率平平無奇。及讀楊廷秀詩云。玉堂著句轉春風。諸老從前亦寓忠。誰爲君王供帖子。丁寧綺語不須工。劉潛夫嘗充僦值。恨不得當筆措詞。以續古人。使果楊劉爲之。又不知能如坡否。若徒緝綺麗諛說之詞。則在太白清平樂王建和凝宮詞下風矣。噫。元祐往矣。咸淳而後。不見春帖者。四五十年矣。黃金臺下。白玉堂中。今揮翰手。代不乏人。太平典故。行當拭目。錢唐淳祐遺民仇遠謹書。

烏臺詩案

年譜云。元豐二年己未。先生四十四歲。七月太子中允權監察御史何大正。舒亶。諫議大夫李定。言公作爲詩文。謗訕朝政。及中外臣僚。無所畏憚。國子博士李宜之狀亦上。七月二日奉聖旨。送御史臺根勘。二十八日皇甫遵到湖州。追之過南京。文定張公上劄。范蜀公上書救之。八月十八日赴臺獄。時獄司必欲寘之死地。煨煉久之不決。子由請以所賜爵贖之。而上亦終憐之。促其獄。十二月二十四日得旨。責檢校尙書水部員外郎黃州團練副使。本州安置。

按舒亶論公云。陛下發錢本以業貧民。則曰。贏得兒童語音好。一年強半在城中。陛下明法以課羣吏。則曰。讀書萬卷不讀律。致君堯舜知無術。陛下興水利。則曰。造物若知明主意。應教斥鹵變桑田。陛下議鹽鐵。則曰。豈是聞韶解忘味。邇來三月食無鹽。

聞見錄。李定。王介甫客也。定不持所生母仇氏服。蘇子瞻以爲不孝。惡之。定以爲恨。後遂劾子瞻。作詩謗訕朝政云。

東坡云。昔年過洛。見李公簡言。真宗既東封。訪天下隱者。杞人楊朴能爲詩。召對。自言不能。上問臨行有人作詩送卿否。朴曰。唯臣妻有一首云。更休落魄耽杯酒。且莫猖狂愛詠詩。今日捉將官裏去。這回斷送老頭皮。上大笑。放還山。余在湖州坐作詩。追赴詔獄。妻子送余出門。皆哭。無以語之。顧謂妻子曰。子獨不能如楊處士妻作一詩送我乎。妻子不覺失笑。余乃出。

山村絕句

煙雨濛濛雞犬聲。有生何處不安生。但教黃犢無人佩。布穀何勞也勸耕。

詩案云。此詩意言是時販私鹽者多帶刀杖。故取前漢龔遂令人賣劍買牛。賣刀買犢曰。何爲帶牛佩犢。意言但得鹽法寬平。令民不帶刀劍而買牛犢。則民自力耕。不勞勸督。以譏鹽法太峻不便也。

老翁七十自腰鎌。慙媿春山筍蕨甜。豈是聞韶解忘味。邇來三月食無鹽。

詩案云。此詩意言山中之人。飢貧無食。雖老猶自採筍蕨充飢。時鹽法峻急。僻遠之人無鹽食用。動經數月。若古之聖賢。則能聞韶忘味。山中小民。豈能食淡而樂乎。以譏鹽法太急也。

杖藜裹飯去恂恂。過眼青錢轉手空。贏得兒童語音好。一年強半在城中。

詩案云。此詩意言百姓請得青苗錢。立便于城中浮費使卻。又言鄉村之人一年兩度夏秋稅。及數度請納和糶預買錢。今來更添青苗助役錢。因此莊家小子弟。多在城市不著次第。但學得城中語音而已。以譏新法青苗助役不便也。

塔前古檜

凜然相對敢相欺。直幹凌雲未要奇。根到九泉無曲處。世閒唯有蟄龍知。

石林詩話。元豐閒。蘇子瞻繫御史獄。神宗本無意深罪之。時相進呈。忽言蘇軾于陛下有不臣之意。神宗改容曰。軾固有罪。然于朕不應至是。卿何以知之。時相因舉軾檜詩云。根到九泉無曲處。世閒唯有蟄龍知。陛下飛龍在天。軾以爲不知已。而求地下之蟄龍。非不臣而何。神宗曰。詩人之詞。安可如此論。彼自詠檜。何預朕事。時相語塞。章子厚亦從旁解之。遂薄其罪。子厚嘗以語余。且以醜言詆時相曰。人之害物。無所忌憚。有如是也。

王定國聞見近錄。王和甫嘗言。蘇子瞻在黃州。上數欲用之。王禹玉輒曰。軾嘗有此心。唯有蟄龍知之句。陛下龍飛在天而不敬。乃反求知蟄龍乎。章子厚曰。龍者非獨人君。人臣亦皆可言龍也。上曰。自古稱龍者多矣。如荀氏八龍。孔明臥龍。豈人君也。及退。子厚詰之曰。相公乃欲覆人家族邪。禹玉曰。此舒亶言爾。子厚曰。亶之唾。其亦可食乎。

贈孫莘老

嗟余與子久離羣。耳冷心灰百不聞。若對青山談世事。當須舉白使浮君。

詩案云。任杭州通判日。轉運司差往湖州。相度隄岸利害。因與知湖州孫覺相見。作詩與之。某是時約孫覺并坐。客如有言及時事者。罰一大盞。雖不指言時事是非。意言時事多不便。不得說也。

天目山前綠浸裾。碧瀾堂下看銜鱸。作隄捍水非吾事。閑送茗溪入太湖。

詩案云某爲先曾言水利不便卻被轉運司差相度隄岸又云作隄捍水非吾事意言本非興水利之人以譏水利之不便也

趙彥材云先生倅杭以開運鹽河至湖其言作隄捍水非吾事意謂于此可以爲隄而事不在已也

秋日牡丹

一朵妖紅翠欲流。春光回照雪霜羞。化工只欲呈新巧。不放閑花得少休。

詩案云杭州一僧寺內開牡丹花數朶陳襄作絕句某和之此詩譏當時執政以化工比執政以閑花比小民言執政但欲出新意擘畫令小民不得暫閑也

寄子由

眼看時事力難任。貪戀君恩退未能。遲鈍終須投劾去。使君何日換龔丞。

詩案云某初到杭州寄弟轍詩此詩云眼看時事力難任時事謂新法青苗助役等事也言己才力不能勝任意亦是譏新法事煩難了辦也

八月十五觀潮

吳兒生長狎濤淵。冒利忘生不自憐。東海若知明主意。應教斥鹵變桑田。

詩案云時新有旨禁弄潮故云吳兒生長狎濤淵冒利忘生不自憐蓋言弄潮之人爲貪官中利物致其閒有溺死者故朝旨禁斷某爲主上好興水利因作此詩言東海若知明主意應教斥鹵變桑田意言東海若知此意當令斥鹵地盡變桑田此事

之必不可成者以譏
興水利之難成也

和李常韻

何人勸我此閒來。弦管生衣甑有埃。綠蟻濡脣無百斛。蝗蟲撲面已三回。磨刀入谷追窮寇。灑涕循城拾棄孩。為郡鮮歡君莫歎。猶勝塵土走章臺。

詩案云李常寄來字韻某依韻和之此詩譏新法減削公使錢太甚及造酒不得過百石致弦管生衣釜甑有塵及言蝗蟲盜賊災傷饑饉之甚以譏朝廷政事闕失及新法不便之所致也

題風水洞

山前乳水隔塵凡。山上仙風拂檜杉。細細龍鱗生亂石。團團羊角轉空巖。馮夷窟宅非梁棟。禦寇車輿謝轡銜。世事漸艱吾欲去。永隨二子脫譏讒。

詩案云熙寧七年八月望遊杭州風水洞留題此詩云世事漸艱吾欲去永隨二子脫譏讒意謂朝廷行新法之後世事漸以艱難小人多務譏謗某思之不可以合又不可以容故欲棄官求隱居之地也

趙彥材詩注云蓋言世態可厭欲從馮夷之水居禦寇之風馭為可以脫譏讒也詩集作欲出詩案作吾欲去今從詩案

和劉道原

敢向清時怨不容。直嗟吾道與君東。坐談足使淮南懼。歸去方知冀北空。獨鶴不須驚夜旦。羣鳥未可辨

雌雄廬山自古不到處。得與幽人子細窮。

詩案云。和劉道原見寄詩。意謂劉恕有學問。性正直。故作此美之。因以譏諷當今進用之人也。敢向清時恕不容。是時恕自館中出監稅。言非敢怨時之不容子也。馬融謂鄭康成吾道東矣。故以比之。汲黯在朝。淮南寢謀。又以比恕之直也。又使韓愈云。冀北馬羣遂空。言館中無人也。嵇紹昂昂如獨鶴在雞羣。又淮南子。雞知將旦。鶴知夜半。又以劉恕比鶴。謂衆人爲雞也。詩云。具曰余聖。誰知烏之雌雄。意言當今朝廷進用之人。君子小人雜處。如烏不可辨雌雄也。

習射放鷹

青蓋前頭點皂旗。黃茅岡下出長圍。弄風驕馬跑空立。趁兔蒼鷹掠地飛。回望白雲生翠巘。歸來紅葉滿征衣。聖朝若用西涼簿。白羽猶能效一揮。

詩案云。知密州日。因祭常山回。與同官習射放鷹。作此詩。意取西涼州主簿謝艾。本是書生。卻善用兵。意以自比。言聖朝若用某爲將。不減謝艾也。

和劉攽韻

白髮相望兩故人。眼看時事幾番新。曲無和者應思郢。論少卑之且借秦。歲惡詩人無好語。夜長繅守向誰親。少思多睡無如我。鼻息如雷撼四鄰。

詩案云。熙寧九年。劉攽寄秦字韻詩與某。尋和之。此詩云。眼看時事幾番新。以譏近日更立新法事多也。

十載漂然不可期。那堪重作看花詩。門前惡語誰傳出。醉後狂歌自不知。刺舌君今猶未戒。灸眉我亦更

何辭相從痛飲無餘事。正是春容最好時。

詩案云。劉攽聞人唱某小詞。作詩相戲。某和之。此詩引賀拔甚以錐刺其子舌。戒以言語事。以戲攽。又不合引王舒狂言爲王敦灸其眉事以自比。以譏時人不能容狂直之言也。

和李清臣韻

五斗塵勞尙足留。閉門聊欲治幽憂。羞爲毛遂囊中穎。未許朱雲地下遊。無事會須成好飲。思歸時亦賦登樓。羨君幕府如僧舍。日向城西看浴鷗。

詩案云。弟轍時在徐州。李清臣與詩。于詩後批云。可求子瞻共和。某次其韻。朱雲。漢成帝時。乞斬張禹。漢成帝欲誅之。朱雲曰。臣得地下從龍逢比干遊足矣。龍逢比干皆因諫而死。某爲屢言新法。不蒙施行。不合以朱雲自比。意言聖明之世。必無誅戮之事故。未許與朱雲地下遊。及王粲是魏武帝時人。因天下亂離。故粲在荊州。依託劉表。作登樓賦。中有懷鄉思歸之心。意亦欲作此賦也。

送李清臣

珥筆西歸近紫宸。太平典冊不緣麟。付君此事寧論晉。載我當時舊過秦。門外想無千斛米。墓中知有百年人。看君兩眼明如鏡。休把春秋坐素臣。

詩案云。李清臣差修國史。賦詩送之。某于仁宗朝。曾進論二十五首。皆論往古得失。賈誼漢文帝時人。追論秦之過失。作過秦論。史記載之。某妄以賈誼自比。意欲李清臣于國史中載所進論。

司馬君實獨樂園

元城先生語錄云。老先生于國子監之側。得故營地。創獨樂園。自傷不得與衆同也。以當時君子。自比伊周孔孟。公乃以種竹澆花事。自比晉唐間人。以揀其弊也。

胡荅溪云。元城所謂當時君子。

自比伊周孔孟者。意謂金陵也。

青山在屋上。流水在屋下。中有五畝園。花竹秀而野。花香襲杖屨。竹色侵盞罍。尊酒樂餘春。棊局消長夏。洛陽古多士。風俗猶爾雅。先生臥不出。冠蓋傾洛社。雖云與衆樂。中有獨樂者。才全德不形。所貴知我寡。先生獨何事。四海望陶冶。兒童誦君實。走卒知司馬。持此欲安歸。造物不我舍。名聲逐我輩。此病天所赭。撫掌笑先生。年來學喑啞。

詩案云。司馬光在西京葺一園。名獨樂園。作詩寄之。此詩言四海望光執政。陶冶天下。以譏見任執政不得其人。又言兒童走卒皆知其姓字。終當進用。緣光曾言新法不便。某亦曾言新法不便。既言終當進用光。意亦譏朝廷新法不便。終用光改變此法也。又言光卻瘖默不言。意望光依前上言攻擊新法也。

送劉放通判泰州

君不見阮嗣宗。臧否不挂口。莫誇舌在牙齒牢。是中唯可飲醇酒。讀書不用多。作詩不須工。海邊無事日。日醉。夢魂不到蓬萊宮。秋風昨夜入庭樹。蓴絲未老君先去。君先去。幾時回。劉郎應白髮。桃花開不開。

詩案云。此詩云。君不見阮嗣宗。臧否不挂口。莫誇舌在牙齒牢。是中唯可飲醇酒。言當學阮籍口不臧否人物。唯可飲酒。勿談時事。意以譏新法不便。不容人直言也。

送曾鞏通判越州

醉翁門下士。雜遝難爲賢。曾子獨超軼。孤芳陋羣妍。昔從南方來。與翁兩聯翩。翁今自憔悴。子去亦宜然。賈誼窮適楚。樂生老思燕。那因江膾美。遽厭天庖羶。但苦世論隘。聒耳如蝸蟬。安得萬頃池。養此橫海鱣。

詩案云。曾鞏通判越州臨行。館閣同舍舊例餞送。衆人分韻得然字韻。此詩云。但苦世論隘。聒耳如蝸蟬。以譏近日朝廷進用多刻薄之人。議論褊隘。誼亂如蟬。又云。安得萬頃池。養此橫海鱣者。以比曾鞏賢才也。後漢黃憲。汪汪如萬頃陂。言安得有度量如黃憲者。以容養此宏才也。熙寧五年。某寫書柬寄曾鞏。言賦役毛起。鹽法峻急。民不安命。以譏新法青苗助役。煩碎如毛。及鹽法峻急不堪也。

畱題風水洞

春山磔磔鳴春禽。此閒不可無我吟。路長漫漫傍江浦。此閒不可無君語。金鯽池邊不見君。追君直過定山村。路人皆言君未遠。騎馬少年清且婉。風巖水穴舊聞名。只隔山溪夜不行。溪橋曉溜浮梅萼。知君繫馬巖花落。出城三日尙透遲。妻孥怪罵歸何時。世上小兒誇疾走。如君相待今安有。

詩案云。熙寧七年二月二十七日。遊杭州風水洞。節推李似知軾到來。先行三日留彼見待。某到彼于壁上留題詩。末句云。世上小兒誇疾走。如君相待今安有。意以譏諷世之小人多務急進也。

先生詩話云。舊讀蘇子美六和塔詩云。松橋待金鯽。竟日獨遲留。初不喻此語。及倅錢唐。乃知寺後池中有此魚金色也。昨日復遊池上。投餅餌。乃略出不食。復入。則此魚自珍貴蓋久矣。

和劉道原寄張師民

仁義大捷徑。詩書一旅亭。相夸綬若若。猶誦麥青青。腐鼠何勞嚇。高鴻本自冥。顛狂不用喚。酒盡漸須醒。

詩案云。此詩譏近日朝廷進用之人。以仁義爲捷徑。詩書爲逆旅。但爲印綬爵祿所誘。則假捷徑以進。如莊子所謂。儒以詩禮發冢。故云麥青青。又言小人之顧祿位。如鴟鵂以腐鼠嚇鴻鵠。其溺于利。如人之醉于酒。盡則自醒也。

元城先生語錄。子弟固欲其佳。然不佳者亦未必無用處。元豐二年。東坡下御史獄。天下之士痛之。環視而不敢撓。時張安道在南京。憤然上疏。欲附南京遞。府官不敢受。乃遣其子恕持至。登聞鼓院投進。恕素愚懦。徘徊不敢投。後東坡出獄。見其副本。因吐舌色動久之。問其故。東坡不答。後子由亦見之云。宜吾兄之吐舌也。此事正得張恕力。或問其故。子由曰。獨不見鄭崇之。揀蓋寬饒乎。其疏有云。上無許史之屬。下無金張之託。此語正是激宣帝怒耳。且寬饒正以犯許史輩有此禍。今乃再許之。是益其怒也。且東坡何罪。獨以名太高與朝廷爭勝耳。今安道之疏乃云。其文學實天下之異才也。獨不激人主之怒乎。但一時急欲撓之。故爲此言耳。僕曰。然則是時撓東坡宜爲何說。先生曰。但言本朝未嘗殺士大夫。今乃開端。則是殺士大夫自陛下始。神宗好名而畏義。疑可以止之。詩案所載不止此。餘長篇詳見別集刊行。

御史獄中遣子由

聖主如天萬物春。小臣愚暗自亡身。百年未滿先償債。十口無歸更累人。是處青山可藏骨。他年夜雨獨傷神。與君今世爲兄弟。更結來生未了因。

本序云。予以事繫御史臺獄。府吏稍見侵。自度不能堪。死獄中。不得一別子由。故作詩授獄卒梁成。以遣子由。以上詩林廣記。

蘇轍

轍字子由。洵次子。與兄軾同登進士。舉制科。哲宗朝。代軾爲翰林學士。累拜尙書右丞。進門下侍郎。自紹聖初。至崇寧。再被謫貶。晚罷祠居許州。復大中大夫致仕。自號穎濱遺老。卒。追復端明殿學士。淳熙中。謚文定。有欒城前集。後集。應詔集。

南窗

京城三日雪。雪盡泥方深。閉門謝還往。不聞車馬音。西齋書帙亂。南窗朝日升。展轉守牀榻。欲起復不能。開戶失瓊玉。滿階松竹陰。故人遠方來。疑我何苦心。疎拙自當爾。有酒聊共斟。

容齋隨筆。此其少年時所作也。東坡好書之。以爲人間當有數百本。蓋閑淡簡遠得味外味。

題李公麟山莊圖并序

伯時作龍眠山莊圖。由建德館至垂雲泚。著錄者十六處。自西而南。凡數里。巖嶠隱見。泉源相屬。山行者路窮于此。道南溪山。清深秀峙。可遊者有四。曰勝金巖。寶華巖。陳彭澌。鵲源。以其不可緒見也。故特著于後。子瞻旣爲之記。又屬轍賦小詩二十章。以繼摩詰輞川之作云。

龍眠淨淥中。微吟作雲雨。幽人建德居。知是清風主。

建德館。

此心初無住。每與物皆禪。如何一丸墨。舒卷化山川。

墨禪堂。

佛口如瀾翻。初無一正定。畫作正定看。于何是佛性。

華嚴堂。

清溪便種稻。秋晚連雲熟。不待見新春。西風薌自足。

雲薌閣。

山開稍有路。水放亦成川。遊人得所息。真意方淡然。發真塢

山居少華麗。牽茅結淨屋。此閒不受塵。幽人亦新沐。蕪茅館

泉流逢石缺。脈散成寶網。水作瓔珞看。山是如來相。瓔珞巖

石室空無主。浮雲自去來。人閒春雨足。歸意帶風雷。棲雲室

世道自碎破。全理未嘗違。溪山亦何有。永覺平日非。祕全菴

共恨春不長。逡巡就搖落。一見洞中天。真知世閒惡。延華洞

石門日不下。潭鏡月長臨。細細溪風渡。相看識此心。澄元谷

層崖落飛泉。微風泛喬木。坐遣谷中人。家家有琴筑。泠泠谷

白龍晝飲潭。修尾挂石壁。幽人欲下看。雨雹晴相射。玉龍峽

倚崖開翠壁。臨潭置苔石。有所獨無人。君心得未得。觀音巖

未見垂雲泚。其如歸興何。路窮雙足熟。為我洗盤陀。垂雲泚

置馬步巖閒。巖前得平地。肴蔬取行簾。麕飽有遺味。勝金巖

團團寶華巖。重重蔭珍木。歸來得商鼎。試鬻溪邊綠。寶華巖

蒼壁立精鐵。縣泉瀉天紳。山行見自久。指與未來人。陳彭滌

深溪龜魚驕。石瘦椿楠勁。借子木蘭船。寬我芒屨病。鵲源

四時皆記伯時所畫。

秦虢夫人走馬圖二絕

秦虢風流本一家。豐枝穠葉映雙花。欲分妍醜都無處。夾道遊人空嘆嗟。
朱韁玉勒鞚飛龍。笑語喧嘩步驟同。馳入九重人不見。金鈿翠羽落泥中。

書郭熙橫卷

鳳閣鸞臺十二屏。屏上郭熙題姓名。崩崖斷壑人不到。枯松野葛相欹傾。
黃散給舍多肉食。食罷起愛飛泉清。皆言古人不復見。不知北門待詔白髮垂冠纓。袖中短軸纔半幅。
慘淡百里山川橫。巖頭古寺擁雲木。沙尾漁舟浮晚晴。遙山可見不知處。
落霞斷雁俱微明。十年江海興不淺。滿帆風雨通宵行。投篙椽杙便止宿。
買魚沽酒相逢迎。歸來朝中亦何有。包裹觀闕圍重城。日高困睡心有適。
夢中時作東南征。眼前欲擬要真物。拂拭東絹付與汾陽生。

李公麟陽關二絕

百年摩詰陽關語。三疊嘉榮意外聲。誰遣伯時開縞素。消條邊思坐中生。
西出陽關萬里行。彎弓走馬自忘生。不堪未別一杯酒。長聽佳人泣渭城。

周昉畫美人歌

深宮美人百不知。飲酒食肉事遊嬉。彈絲吹竹舞羅衣。曲終對鏡理鬢眉。
岌然高髻玉釵垂。雙鬟窈窕葉微。宛轉躑躅從嬰兒。倚楹俯檻皆有姿。擁扇執拂知從誰。
瘦者飛燕肥玉妃。俯仰向背樂且悲。九重深遠安得窺。周生執筆心坐馳。
流傳人間眩心脾。飛瓊小玉雲霧幃。長風吹開忽見之。夢魂清夜那復追。
老人衰朽百事非。展卷一笑亦相爲。持付少年良所宜。

奉使契丹寄子瞻

誰將家集過幽都。每被行人問大蘇。莫把文章動蠻貊。恐妨談笑臥江湖。

茗溪漁隱叢話。此樂城集中詩也。澠水燕談錄云。張芸叟奉使大遼。宿幽州館中。有題蘇子瞻老人行于壁閒者。聞范陽書肆亦刻子瞻詩數十篇。謂之大蘇集。芸叟題其後曰。誰傳佳句到幽都。逢著胡兒問大蘇。此二句與子由之詩全相類。疑好事者

改之而為

此說也。

使契丹題寺壁

亂山環合疑無路。小徑縈迴長傍溪。彷彿夢中尋蜀道。興州東谷鳳州西。以上樂城集。

池北偶談。古北口一寺。中有石刻蘇穎濱詩云云。蓋公元祐閒奉使契丹時所題。而遼人刻石者。

追和張文定公

少年便識成都尹。中歲仍為幕下賓。待我江西徐孺子。一生知己有斯人。

容齋四筆。張文定公在蜀。一見蘇公父子。即以國士許之。熙寧中。張守陳州南都。辟子由幕府。元豐初。東坡謫齊安。子由貶監筠酒稅。與張別。張悽然不樂。酌酒相命。手寫一詩。後七年。子由召還。猶復見之于南都。及元符末。自龍川還許昌。因姪叔黨出坡遺墨。再讀張所贈詩。其薨已十年。泣下不能已。乃追和之云云。哀而不怨。使人至今有感于斯文。

贈姜公弼

生長芸閒已異芳。風流稷下古諸姜。適從瓊管魚龍窟。秀出羊城翰墨場。滄海何曾斷地脈。白袍端合破天荒。錦衣他日千人看。始信東坡眼目長。

墨莊漫錄。東坡在海外。瓊州士人姜公弼來從學。坡題其扇云。滄海何曾斷地脈。白袍端合破天荒。公弼求足之坡云。候汝登科。當為汝足。後入廣陵。貢至京師時。坡已薨。乃謁黃門于許下。子由乃為足之云。

蘇隨

隨。晉江人。嘉祐二年進士。任博羅令。棄官歸里。號紫雲先生。葆神鍊氣。不與俗接。後數年端坐而逝。

紀夢

夢乘鸞鳳到仙家。侍女風流魏月華。琥珀盞斟千歲酒。琉璃瓶種四時花。金函藏籙文刊玉。石壁題名篆點砂。一枕北窗初睡覺。日移門外柳陰斜。泉南雜記。

方仲謀

仲謀。字公輔。淳安人。嘉祐二年進士。官殿中丞。有雉山集。

南峯亭

水色山光照曲闌。芳春時節稱遊觀。鶯花不為少年惜。尊俎莫辭終日歡。香逐好風來席上。景隨佳句落毫端。人間勝事今猶古。誰識相并四者難。青溪詩集。

黃履

履字安中，邵武人。嘉祐二年進士，累除知制誥。哲宗朝，歷翰林學士、御史中丞，拜尚書右丞，提舉中太一宮卒。入元祐黨籍。孫伯思，字長睿，著東觀餘論。

京州史院席上次首相吳公元韻

禮放三事宴，史發兩朝餘。偶綴金閨彥，來紬石室書。法良司馬不辭措子游，歟。盛事逢衰嬾，重須讀五車。揮塵後錄。

蔣之翰

之翰，之奇兄，守蘇州。

換蘇印和弟穎叔

從來疎拙嬾身謀，攬轡登車已倦遊。幸有醉鄉為樂地，何妨吟笑老東州。吳郡志。

蔣之奇

之奇，字穎叔，宜興人。嘉祐二年進士。哲宗朝，累擢翰林學士。徽宗朝，拜同知樞密院事，除觀文殿學士，出知杭州，提舉靈仙觀卒。入黨籍。有集。

春帖子

昧旦求衣向曉雞，蓬萊仗下日將西。花添漏鼓三聲遠，柳映春旗一色齊。丹陽集。

和鮑娘題兌溪驛

盡日行荒徑。全家出瘴嵐。鮑娘詩句好。今夜宿江南。清波雜誌。

和兄之翰寵換蘇印不日蘇州後蔣蘇州。吳郡志。

早同侍宦向長洲。今擁旌麾訪舊遊。自古風流詩酒地。韋蘇州後蔣蘇州。吳郡志。

題海陵天慶觀樂子長真人碑

瑤壇三級滿蒼苔。想像真人飲赤杯。颯颯仙風動杉檜。只應鸞馭暫歸來。徐神翁語錄。

和祕閣曝書會

宴豆追儒雅。簪纓成禮容。中天開壁府。左海見鼇峯。汗簡陳三館。緗圖煥九重。紫薇方思敏。十吏筆能供。

事文類聚後集。

奉敕宿齋于上清館儲祥宮

日月圓丘吉。前期告上清。竭來修祀事。齋潔奉祇明。靈囿賓瑤館。仙遊列玉京。丹青浮象魏。盛典照蓬瀛。

合璧事類外集。

寄米元章

京城汨沒興如何。歸棹翩翩返薜蘿。盡室生涯寄京口。滿牀圖籍鎖巖阿。六朝人物東流盡。千古山河北

固多。為借文殊方丈地。中間容箇病維摩。淨名齋帖。

即事

渭水岐山不出兵。卻攜琴劍錦官城。醉來身外窮通小。老去人間毀譽輕。捫蝨雄豪空自許。屠龍工巧竟

何成雅聞岷下多區芋聊試寒爐玉糝羹

詩林萬選

遊朝陽巖遂登西亭有序

朝陽巖在瀟江之西去治城不遠唐永泰二年元次山爲道州刺史避兵至零陵訪而得之以其東嚮遂名朝陽方是時結有盛名于世故永之守丞獨孤慚竇泌爲之翦荆棘建茅閣結又爲之銘與歌其後柳子厚繼爲之詩予以子厚詩考之正所謂西亭者也復爲之亭而系以詩

昔遊不在遠幽巖臨治城嶽岑俯瀟碧摩豁延陽明緣澗可徑入滑路偪仄行泉源自何來涓涓玉鏘鳴疑穿雲雷窟常帶魚龍腥寒江淨瀉鏡怪石坐開屏幽鳥馴可羅潛蛟深莫罾梯險接層棧冠巔聳危亭俯睨極元窅仰攀窮青冥蹇曠出物表高虛挹元英惜哉非吾土不得憩此生舊業寄陽羨故園依晉陵秋風瀉湖白春色頤山青一從紳笏去遂使猿鶴驚迂疎暗時機屏瑣叨官榮謫棄分所宜媿慙顏已盈人生詎有幾世累吾方輕願言解羈紲上疏還簪纓寧居召魂魄恬養休性情紛華屏外慕冲澹巖中局窮年伴農圃畢志先疇耕

澹巖

零陵水石天下聞澹山之勝難具論初從崖口入地底始見殿閣開重門乃知茲洞最殊絕洞中金碧開祇園寬平可容萬人坐仰視有若覆盎盆虛明最宜朝日照陰晦常有黑雲屯盤蚪天矯垂乳下巨獸突兀巨石蹲木香一株在巖壁人跡峭絕不可捫呀然雙穴露天半籠絡萬象將并吞只疑七竅混沌在五竅忘失兩竅存神奇遺跡未泯滅至今猶有斧鑿痕雲牀石屏極隈隩昔有居士常潛蟠避秦不出號徵

君美名遂入賢水源。咸通曾爲二蛇窟。元暢演法蛇輒奔。從茲其中建佛刹。棲隱不復聞世喧。惜哉此景久埋沒。但與釋子安枯禪。次山子厚愛山水。探索幽隱窮晨昏。朝陽迫迮若就狴。石角禿鬣如遭髡。豪篇矜誇過其實。稱譽珉石爲瓊璠。環觀珍寶欲掩有。不到勝處天所慳。嗟予至此誠未覩。不暇稱讚徒驚歎。恨無雄文壓奇怪。好事略與二子班。蕪詞願勒巖上石。勿使歲久字滅漫。以上零陵志。

清光亭

鄭圃僕射陂。漢陽郎官湖。郎官何爲名。張謂佩使符。泛觴江城南。乃與太白俱。明月一萬頃。清光天下無。

萍鄉卽事

地接長沙近。鄉名自古聞。毛山千嶂雪。玉女一堆雲。拱木扶霄上。飛泉觸石分。霜風萍實老。目斷楚江濱。以上湖廣通志。

重湖閣

宮亭彭蠡接揚瀾。浩蕩橫空六月寒。試問風波何似險。老僧只管倚闌干。廬山志。

水西示劉尉

役役塵埃倦客情。偶逢佳處得閑行。憑君爲把如椽筆。便向蒼崖記姓名。寧國府志。

題到氏田舍

到氏查林田舍。到洽到漑兄弟所居。

六朝冠蓋俱塵土。到氏今無苗裔存。當時任昉過田舍。野老猶記查林村。宜興縣志。

隲字公默。晉陵人。嘉祐二年進士。除太常博士。由儀曹出知處州。有集。

賡蘇東坡

秀出眉山有慶門。風流長與蜀山存。翰林未老生曾嫡。想見纍纍百世孫。

毘陵志。隲與二蘇同年。有女適二蘇從。

子彭孫得甥。東坡報以詩。隲寶云云。

呂惠卿

惠卿字吉甫。晉江人。璿子。嘉祐二年進士。爲真州推官。熙寧初。王安石薦于神宗。累官翰林學士。參知政事。元祐初。除建寧軍節度副使。建州安置。崇寧中。安置宣州。再移廬州。死有東平集。

復齋漫錄。子美詩。笠澤鱸肥人鱸玉。洞庭橋熟客分金。呂吉甫詩。魚出清波庖膾玉。菊含寒露酒浮金。呂勝于蘇。蓋人客兩字雖無亦可。

荅逢原

晨出趨長司。跪坐與之言。偶然脫齟齬。相送顏色溫。歸舍未休鞍。簿書隨滿門。相仍賓客過。敲午僅朝餐。平生性懶惰。應接非吾真。況乃重戕賊。良氣能幾存。就夜甫得息。閱我几上文。開卷未及讀。睡思已昏昏。自知小人歸。昭昭復何云。每于清夜夢。多見夫子魂。側耳聽高義。如飲黃金樽。覺來不得往。欲飛無羽翰。昨日得子詩。我心子先論。怪我書若遲。友道宜所敦。豈不旦夕思。實苦案牘繁。豈無同官賢。未免走與奔。相見鞅掌閒。有言無暇陳。嗟嗟茲世上。無食同所患。念我力難任。聞子謀更艱。久知爲之天。安能怨窶貧。

吾聞君子仕行義而已焉。亦將達吾義。有遂為利牽。東海有滄溟。西極有崑崙。古來到者誰。不過數子尊。子已具車航。吾亦為楫輪。欲一從子遊。不知何時然。王令廣陵集附。

戲題風乞兒扇

無人官作原注音佐。除非乞沒藥。堪醫最是風。求乞害風都占斷。算來世上少如公。

賓退錄。趙鑑堂朝野遺事云。呂吉甫在趙韓王南園。京

師句。人風乞兒者。持大扇造呂求詩。呂即書扇上云。

畱題興安王廟

翦葉疏封意。歸禾協濟心。遺風固唐遠。積德本周深。逝水悲興廢。浮雲閱古今。祠宮尙翬翼。鳴玉漱松陰。

晉祠石刻。

許廣淵

廣淵、杭州新城人。嘉祐二年進士。

淨名院

杖錫窮危頂。茅菴構白雲。軒窗半峯出。鐘磬別山聞。海月曉同色。爐煙晝雜熏。莫教深靜處。思慮落塵氛。
咸淳臨安志。

王韶

韶字子純。江州德安人。嘉祐二年進士。熙寧中。歷龍圖閣學士。知熙州。拜觀文殿學士。樞密副使。

罷知洪州卒諡襄敏有敷陽集

詠裕老菴前老松

綠皮皴剝玉嶙峋高節分明似古人解與乾坤生氣槩幾因風雨長精神裝添景物年年別裨闔窮愁日日新惟有碧霄雲裏月共君孤影最相親

復齋漫錄王公韶少日讀書于廬山東林裕老菴菴前有老松

因賦此詩王荆公為憲江東過而見之大加稱賞遂為知己

張載

載字子厚先世大梁人後居鳳翔之橫渠鎮學者稱橫渠先生嘉祐二年進士以薦為崇文院檢書同知太常禮院卒有崇文集

絕句

渭南涇北已三遷水旱縱橫數畝田四十二年居陝右老年生計似初年

兩山南北雨冥冥四牖東西萬木青面似枯骸頭似雪後生誰與屬遺經後村詩話

移疾

移疾謝華省問耕還弊舍扶持便疎慵曠僻逃將迓晝棊莎徑側暮粥桐陰下久矣澄清心永媿桑弧射

濂洛風雅

林希

希字子中號醒老福州人嘉祐二年進士哲宗朝累遷翰林學士同知樞密院事建中靖國初罷知揚州徙舒州卒贈資政殿學士諡文節

詔修兩朝國史開局日史院賜筵首相吳公席上有作奉和元韻
調元台極貴。頌宴帝恩餘。昔副名山錄。今裁史觀書。天心憂作者。國論屬誰歟。寂寞懷鉛客。容瞻相府車。
揮塵後錄。

初至吳門示諸弟兼呈伯原教授

夢寐家山忽五春。君恩乞與守符新。便推白傅爲前政。更得梁鴻作部民。入境喜逢餘秉穗。舉杯無復歎鱸尊。左司西掖誠非據。非是詩情媿昔人。

將之宣城畱別吳門效白樂天體

被召守東吳。夜渡揚子津。拭目迎家山。洗我京洛塵。此邦多賢豪。況復平生親。初欲循故事。公宴月三旬。庶以敍契闊。豈徒樂吾身。臨州未閱月。吏牘方紛紜。避嫌俄得請。主地翻爲賓。尊酒未重持。行樂知何因。物理可勝歎。俯仰迹已陳。趣整震澤帆。遙挹敬亭春。五月而報政。速哉彼齊人。今我若置郵。何德于吳民。舉手謝吳民。自笑行役頻。使君不能詩。煩汝迎送勤。來慙白太守。去媿謝宣城。以上吳郡志。

吳興

遶郭芙蕖拍岸平。花深蕩槳不聞聲。萬家笑語荷花裏。知是人閒極樂城。方輿勝覽。

賀滕元發守吳興

清風樓下兩溪春。二十餘年一夢新。自注。元發初第。卽倅湖州。距是三十年矣。欲識玉皇香案吏。水晶宮裏謫仙人。湖州府志。

馮山

山字允南。蜀之普州人。初名獻能。嘉祐二年進士。熙寧末。爲祕書丞。通判梓州。終祠部郎中。有安岳集。

山路梅花

傳聞山下數株梅。不免車帷暫一開。試向林梢親手折。早知春意逼人來。何妨歸路參差見。更遣京風次第催。莫作尋常花葉看。江南音信隔年回。

西縣道中

溪水引我行。梁山邀我坐。山水已清絕。春容碧相和。下馬取酒餘。梅飄酒中墮。日落醉不去。青茸草閒臥。
謝人惠堯墨

故人山東來。遺我數丸墨。握丸大如指。盥水重拂拭。濃磨向日看。古瓦增潤澤。經屑不見紙。清光隱深黑。書云舊所祕。聞今已難得。庭珪死已久。至寶世罕識。御府從近存。人間萬金直。堯州擅高價。比歛固少抑。古松亦將盡。神奇漸衰息。文章不見貴。筆研豈可擲。牢落況此君。雖精淡無色。憐君情好古。投贈兼以臆。世事持此觀。噫嗟共冥默。

晁氏墨經。兗沂登密之山。總謂之東山。東山之松。色澤肥膩。性質沈重。品惟上上。舊以十月煎膠。十一月造墨。工則兗州陳朗。朗弟遠。子惟進。惟迨。與易水奚氏並稱。

元豐九域志。潞州兗州。

絳州皆貢墨一百枚。

荅江安尉鮮于頃野翁

寶峯首相聚。錦屏袂一判。音容阻良覲。歲月嗟易換。我官潼江曲。君尉瀘水岸。到處逢酒徒。無人作詩伴。南風灑襟袖。佳句適我願。汶蜀幾萬里。信息偶中斷。三軒風雅會。蕭條各分散。孤吟少儔侶。衆喙易嘲噴。念君同所嗜。路近聲可喚。唱酬實相眷。牽率豈辭憚。疊疊郊籍心。無爲簿書亂。

八陣磧

永安宮前瀼西磧。萬流峽口爭奔激。秋濤捲地裂山谷。水落依然陣圖出。陣形聚拳六十四。傳是武侯親手跡。斯人管蕭豈足道。身在巴東心漢室。從容所遇皆法制。浩蕩胸中萬分一。陰機暗與天地合。壯氣曾將鬼神役。至今千載屹不動。渺莽幾深難致詰。豈徒豪傑重嗟賞。應有神靈長護惜。廟偏裸裎七壯士。酒炙紛紛走巫覡。萬事顛倒皆偶然。臥龍無處霑餘瀝。以上安岳集。

趙袞

袞字希甫。以殿中丞致仕。歸隱嘉禾。

平江亭邀馮允南同作

文公昔記滕王閣。氣象終天拂寥廓。崔顥題詩黃鶴樓。今日聲華還磊落。安漢城頭有佳處。江山清氣歸簾幕。少陵無人謫仙死。不遇材豪終寂寞。蒼苔滿地荆棘生。梁棟塵埃喧鳥雀。風流賢守一登臨。久倚闌干情不薄。夜來風月覺澄清。天意人心如素約。仙葩當見浮空來。幾百年來無此作。嗟予好古今白頭。到底支離材力弱。木桃或見致瓊瑤。免對江山負慙怍。四朝詩。

鄧潤甫

潤甫字溫伯。建昌人。嘗避高魯王諱。以字行。別字聖求。第進士。累除知制誥。翰林學士。進承旨。紹聖初。歷尚書左丞。卒。贈開府儀同三司。諡安惠。

春帖子

晨曦澹灩上簾櫳。金屋熙熙歌吹中。桃臉似知宮宴早。百花頭上放輕紅。丹陽集。

道中詠懷奉寄利州馮允南使君

交印夔人國。分襟汴水隄。十年難會合。一夢頓乖睽。官序潘生拙。詩文庾信齊。諸公多汲引。憲府屢提攜。不肖乘驄馬。那能出寶雞。安恬輕世味。灑落見天倪。照物聰明決。爲邦聞望躋。笑譚清岸獄。暇豫勸耕犁。不忍爲鉤距。何嘗設町畦。燕堂傳夜燭。遊轂碾春泥。衆服題鸚鵡。疇將食馱騏。草黃思隼擊。梧碧值鸞棲。欲問無來使。開編有舊題。君方安玉壘。予亦遠金閨。地隔江波闊。書傳鳥翼稽。豈知雙鬢白。相見兩當西。內顧微他技。殊私牧遠黎。辭親愁不斷。叱馭意空迷。吳苑飛雲杳。春城北斗低。南山千里雪。劍閣萬盤溪。夜宿星邊驛。朝行石上谿。深疑窺地軸。高駭躡天梯。看岫時敲帽。聽泉或杖藜。蕭蕭黃葉下。裊裊冷猿啼。

蜀道無艱險。人心漫慘悽。永懷持後橐。遙想綴朝圭。直北瞻天日。征西疊鼓鼙。相期郡齋冷。清話看揮犀。
全蜀藝文志

田開

開嘉祐初知封州。

臨封雜詠

我愛臨封好。詩人興味長。嶺南蕉子國。海上荔支莊。民有百年壽。家藏十載糧。宦遊無遠近。樂處是仙鄉。
我愛臨封好。賓朋日往還。年來甘白酒。老去益朱顏。引鶴遊西寺。攜琴上北山。君恩雖未報。公外且偷閑。
肇慶府志

趙挺之

挺之字正夫。密州諸城人。舉進士。徽宗朝。歷右僕射。中書門下侍郎。再除觀文殿大學士。佑聖觀使。卒。贈司徒。諡清憲。

題朱樸隱居天和堂

華亭山水佳。秀色宛如畫。前賢有遺迹。卜築俟來者。高人養天和。放浪寄林野。安知歲月徂。但喜名利捨。傳家得之子。流輩推博雅。春風振客衣。逸擢東南下。賦詩臺閣彥。落筆珠璣瀉。持觴拜親鄰。喜色動鄉社。都城十二衢。塵土翳車馬。一夢逐君行。茲懷已蕭灑。
松江府志

范百祿

百祿字子功華陽人鎮姪舉進士終中書侍郎謚文簡祖禹其姪也

中秋待月夜分乃見

十二周流數經行自不違長圓非物理暫晦亦天時人欲終宵玩雲纔逐族移祗應逢此景無足累心期
古今歲時雜詠

楊壽祺

壽祺官著作郎合江令

將過益昌先寄馮允南使君

袞袞京華志氣低歸心長伴日輪西蒼顏白髮因新選明月清風思舊溪屈指光陰時節晚舉頭霄漢路歧迷巴陵太守應憐我準擬經過醉似泥
馮山安岳集附

李時亮

時亮字端夫博白人嘉祐中進士累官御史大夫與陶弼相賡和有李陶集

蟠龍山

獨臥粵南天盡頭吐吞清氣壓林丘風雲上下三千丈霧雨西南十六州古礪有泉穿石冷陰崖無暑滿山秋我來結構林亭下時復凭欄看未休
名勝志

宋詩紀事卷二十二

王觀

觀字通叟。高郵人。一作如皋人。嘉祐二年進士。累遷大理丞。知江都縣。嘗著揚州賦及芍藥譜。

莫惱翁

穀垂乾穗。豆垂角。雨足年登。不勝樂。烏巾紫領。銀鬚長。白酒滿杯。翁自酌。翁醉不知秋色涼。兒捋翁鬚。孫撼牀。莫惱翁。翁年已高。百事慵。

竹坡詩話。此詩可

與張文昌爭衡。

李渤

渤字子文。樂昌人。嘉祐二年進士。官至朝奉郎。知白州。

韶州府志。渤世業儒。有聲嶺表。郡人號李夫子。嘗

試南昌。作聞伯夷之風頑夫廉賦。人稱為李伯夷。

武溪

扁舟初汎入瀧船。隱約乘槎上漢年。岸狹束成三級浪。山高分得一毫天。掃開盤石那無酒。流出桃花恐

錢唐厲鶚輯
休寧汪垧勘定

有仙青史若能留姓字，直須來此釣溪烟。韶州府志。

邨 亶

亶字正夫，太倉人。嘉祐二年進士，初授睦州團練推官，除司農寺丞，提舉兩浙水利。元祐初為太府寺丞，出知溫州，卒。有吳門水利書。

鍾山訪王荆公時遣其子僑就學。

十里松陰蔣子山，暮烟收盡梵宮寬。夜深更向紫微宿，坐久始知凡骨寒。一派石泉流沆瀣，數庭霜竹顛琅玕。大鵬汎有搏風便，還許鷦鷯附羽翰。中吳紀聞。

王 回

回字深父，福州侯官人。嘉祐二年進士，補亳州衛真縣主簿，歲餘自免去。治平初，以薦知南頓縣，命下而卒。有集。

浙江有感

候潮門外浙江西，曾憶浮舟自此歸。萬古波濤今日是，一身蹤跡昔人非。愁侵壯齒頭先白，淚入秋風眼易眇。日暮徬徨不能去，連隄疎柳更依依。咸淳臨安志。

呂大鈞

大鈞字和叔，大防弟。嘉祐二年進士乙科，終于鄜延路漕司屬官。從橫渠張子學，有誠德集。

會點

函丈從容問且酬。展才無不至諸侯。可憐曾點推鳴瑟。獨對春風詠不休。宋文鑑

黃通

通字介夫。邵武人。嘉祐二年進士。除大理寺丞。

元夕

春樓十二玉梯橫。紫府千門夜不扃。疑是嫦娥弄春色。彩雲移下一天星。邵武府志

劉輝

輝元名幾。字之道。鉛山人。嘉祐四年進士第一。官大理評事。有東歸集。

文獻通考。陳氏曰。輝文體奇澀。歐陽公惡之。下第。及是在殿廡。得其賦。大喜。既唱名。乃輝也。公愕然。堯舜性仁賦。至今傳誦。

與客遊太平僧舍

兩道翠陰迎騎合。四圍清氣逼人來。林端有路雲千級。物外忘機酒一杯。翰府名談

豐稷

稷字相之。明州鄞人。嘉祐四年進士。徽宗朝歷官御史中丞。工部尚書兼侍讀。以樞密學士出守

越州。入元祐黨籍。安置台州。徙建州。卒。建炎中追復學士。謚清敏。

運司園亭詩和章質夫

玉谿堂

一水從何來。應是崑山頂。醜成綠玉池。虛堂逗清影。公退冷然賞。了非心外境。魚泳陽光動。鳥啼春晝永。
潺玉亭

養源在西山。如玉抱精白。引之落錦渠。歷耳不可擇。風雨雜鳴球。珠璣寫雲液。恰似偃溪聲。醒悟迷途客。
以上成都文類

題朱樸隱居天和堂

路左漿先饋。門前屨幾重。勇歸塵事擲。恬處道心濃。弄水知幽谷。觀雲想妙峰。夜深孤鶴唳。清露滴高松。
至元嘉禾志

駕幸太學

鳳幄雲開日月光。九霄鳴蹕下虞庠。朝元進士鴻成列。拱極名臣玉照行。問道賈生稱五學。乞言戴聖美三王。上心夙悟周公戒。天下安危自一堂。
中州題詠集

朱長文

長文字伯原。其先越州剡人。家吳郡。嘉祐四年進士。授祕書省校書郎。改許州司戶參軍。充蘇州教授。築室郡西。表曰樂圃。鄉人稱爲樂圃先生。紹聖閒除祕書省正字。兼樞密院編修卒。有樂圃文集。

避暑錄話。元豐閒淮浙士人。以疾不仕。因以行義聞鄉里者。二人。楚州徐積。仲車。蘇州朱長文。伯原。仲車以顰。伯原以跛。

奉陪太守及諸公遊虎丘

何必襄陽孟浩然。苦吟自可繼前賢。虎丘合去十二度。見白公詩。熊軾再遊三百年。雲閣爲君追舊額。飛雲閣本名齊雲樓。今追復之。霓裳從古播朱弦。白公在蘇作霓裳曲。此行不減唐人樂。暢飲惟無八酒仙。

次梅評事韻

餅盃蕭灑似村家。任有籛金豈足誇。自入醉鄉頭不白。新詩何用祝蒼華。以上樂園餘稿。

胡宗愈

宗愈字完夫。常州人。宿從子。嘉祐四年進士。哲宗朝歷尙書右丞。終吏部尙書。

寄題錢公輔衆樂亭

平湖拍岸海潮通。亭在平湖杳靄中。花豔含春雲島晚。波光照夜玉壺空。動搖人影雙橋月。洗滌塵襟四面風。野老半酣亭下笑。漁樵今日與民同。延祐四明志。

章惇

惇字子厚。浦城人。嘉祐四年進士。元豐中歷門下侍郎。哲宗卽位。遷知樞密院事。左僕射。兼門下侍郎。遷特進。封申國公。徽宗朝責潭州安置。再貶雷州司戶參軍。徙湖州居住。

揮塵餘話。章惇之父愈。郇公族子。早歲無行。妻之母楊氏早寡。愈與之通。已而生子。以一合置水。緘置其內。持以還愈。愈得之。云。此兒五行甚佳。將大吾門。旣長登第。卽惇也。東坡先生送其出守湖州詩云。方丈仙人出淼茫。高情猶愛水雲鄉。惇以爲譏。已怨之。紹聖中爲相。坡渡海。蓋修怨也。

遊虎丘次韻

闔閭城外小層巒。瘦竹寒松數里閒。並岸逢僧知近寺。入門鑿石漸登山。純鉤劍化空池在。幽獨詩成白日閑。遊客幸無官事束。何須齋舫斂昏還。

和蒲宗孟遊虎丘山書錢唐舊遊

傳聞城角艤行舟。自擁笙歌選勝遊。偶爲寒江阻潮汐。再容清賞矚林丘。燕回吳苑風和雪。夢斷錢唐月滿樓。盡把蘇杭好烟景。醉吟將去詫東州。以上吳郡志。

題李邦直家江行初雪圖

江頭微雪北風急。憶泊武昌舟尾時。潮來浪打船欲破。擁被醉眠人不知。退齋閑雅錄。

過石槽鋪在邵陽

瘴癘潛銷瑞氣和。梅峯千里潤烟蘿。人逢雙堠雖云遠。路在好山寧厭多。方輿勝覽。

梅山歌

開梅山。開梅山。梅山萬仞摩星躔。捫蘿鳥道十步九曲折。時有僵木橫崖巔。肩摩直下視南岳。迴首蜀道猶平川。人家迤邐見板屋。火耕礮确多畬田。穿堂之鼓堂壁懸。兩頭擊鼓歌聲傳。長藤酌酒跪而飲。何物爽口鹽爲先。白巾裹髻衣錯結。野花山果青垂肩。如今丁口漸繁息。世界雖異如桃源。熙寧天子聖慮遠。命將傳檄令開邊。給牛貸種使開墾。植桑種稻輸緡錢。不持寸刃得地一千里。王道蕩蕩堯爲天。大開庠序明禮教。撫柔新俗威無專。小臣作詩備雅樂。梅山之崖詩可鐫。此詩可勒不可泯。頌聲千古長潺湲。

湖廣總志長沙國漢高帝始王吳芮芮將梅銷時以益陽梅林爲家號梅山後爲蠻王扶氏據之
至宋熙寧六年章惇諭平五寨分其地爲二始以下梅山地安化縣屬武安軍惇有梅山歌云云

張芻

芻字聖民嘉祐四年進士官度支員外郎守登州又爲淮南轉運使

題招提院靜照堂

樵李舊禪扉叢林自翠微寺居天外靜僧向日邊歸野水涵齋几閑雲宿釣磯庭前祖來意誰爲柏依依
至元嘉禾志

陸仲

題招提院靜照堂

閑房增締構宴坐隔囂埃屋木不加飾庭花時自開虛明殊止水寂絕等寒灰齋外無餘事欣逢高士來
至元嘉禾志

徐徽

徽字仲元滁州人嘉祐四年進士歷官提舉利州改常平抗疏致仕居獨山號獨山翁編滁陽慶

歷集

襄城

胙土分茅奠此岡金根玉輅總輝光誰知三百餘年後老樹殘蟬送夕陽
滁陽志

蔡確

確字持正。晉江人。嘉祐四年進士。歷知制誥。御史中丞。參知政事。元豐五年。拜尙書右僕射。兼中書侍郎。哲宗立。轉左僕射。元祐中。罷知陳州。奪職。徙安州。又徙鄧州。坐譏訕。責英州別駕。新州安置。

題王維江行初雪畫

吳兒龜手網寒川。急雪鳴蓑浪拍船。青弋渡頭曾臥看。令人卻憶十年前。聲畫集。

春日

十二天街雨壓沙。秋千咿喔響人家。東風會勸十分酒。寒食初開百玉花。年少斬新金絡馬。柳陰無數畫輪車。春來誰道遲遲日。尤覺春來日易斜。後村千家詩。

崇政殿放榜

黃帕開封出奏篇。銀袍二百玉階前。威顏咫尺瞻中扆。名姓傳呼下九天。宮墨旋題黃甲字。禁門已蒞杏花韉。孤臣拜賜交悲喜。相望光芬十五年。合璧事類前集。

楊花

楊花三月暮。撩亂送春歸。盡日閑相逐。無風亦自飛。輕輕攔乳燕。故故撲征衣。莫上高樓望。徘徊滿落暉。

合璧事類別集。

悼侍兒

鸚鵡言猶在琵琶事已非傷心瘴江水同渡不同歸

侯鯖錄持正謫新州侍兒從焉名琵琶常養一鸚鵡甚慧丞相呼琵琶卽扣一響板鸚鵡傳言呼之琵琶逝後誤扣響板鸚鵡猶傳言丞相大慟感疾不起嘗爲詩云云

夏日登車蓋亭

公事無多客亦稀朱衣小吏不須隨溪潭直上虛亭裏臥展柴桑處士詩
一川佳景疎簾外四面涼風曲檻頭綠野平流來遠棹青天白雨起靈湫
紙屏石枕竹方牀手倦拋書午夢長睡覺莞然成獨笑數聲漁笛在滄浪

茗溪漁隱叢話蔡確守安州夏登車蓋亭作十絕句爲吳

處厚箋注得罪調新州其一絕云云殊有閑適自在之意

靜中自足勝炎蒸入眼兼無俗物憎何處機心驚白鳥誰人怒劍逐青蠅
西山髣髴見松筠日日來看色轉新聞說桃花巖石畔讀書曾有謫仙人
風搖熟果時聞落雨滴餘花亦自香葉底出巢黃口鬧波閒逐隊小魚忙
來結芳廬向翠微自持杯酒對清暉水趨夢澤悠悠過雲抱西山冉冉飛
矯矯名臣郝甌山忠言直節上元閒古人不見清風在歎息思公俯碧灣
溪中曾有戈船士溪上今無佩犢人病守翛然唯坐嘯白鷗紅鶴伴閑身
喧豗六月浩無津行見沙洲束兩濱如帶溪流何足道沈沈滄海會揚塵

堯山堂外紀。蔡確以弟碩贓敗。謫守安州。夏日登車蓋亭。作此十絕。時吳處厚知漢陽軍。箋注以聞。其略云。五篇涉譏諷。何處機心驚白鳥。誰人怒劍逐青蠅。以譏譏諂之人。葉底出巢黃口。波閒逐隊小魚忙。譏新進用事之人。睡起莞然成獨笑。方今朝廷清明。不知確笑何事。矯矯名臣郝甌山。忠言直節上元閒。按郝處俊封甌山公。唐高宗欲遜位天后。處俊上疏諫。此事正在上元三年。今皇太后垂簾。遵用章獻明肅故事。確指武后以比太后。沈沈滄海會揚塵。謂人壽幾何。尤非佳語。宣仁盛怒。令確分晰。終不自

明。遂貶新州。

楊傑

傑字次公。無為軍人。嘉祐四年進士。元祐中。歷禮部員外郎。出知潤州。除兩浙提點刑獄卒。有無為集。

勿去草行

勿去草。草無惡。若比世俗俗浮薄。君不見長安公卿家。公卿盛時客如麻。公卿去後門無車。又不見千里。萬里江湖濱。觸目悽悽無故人。唯有芳草隨車輪。一日還舊居。門前草先鉏。草與主人實無負。主人于草。宜何如。勿去草。草無惡。若比世俗俗浮薄。

謝公約惠墨竹圖

幽人噴墨寫成竹。變化琅玕作元玉。公約贈我兩大軸。不比丹青凡草木。六月都城苦炎燠。車馬紛紛正馳逐。曲臺官冷晝掩關。淨埽虛堂展寒綠。簾閒忽有微風來。不動纖枝清滿屋。憶得扁舟載雪時。曾寄會稽江上宿。

二妃廟

黃陵三妃廟。客過動愁顏。湘水有時盡。帝車何日還。血斑千畝竹。魂斷九疑山。欲問蒼梧事。白雲生棟閒。以上無為集。

雨花臺

梁武帝時有雲光法師講經于此。

空書來震旦。康樂造淵微。貝葉深山譯。曼花半夜飛。香清雖透筆。藁散不霑衣。舊社白蓮老。遠公應望歸。六朝事蹟。

淨居寺

在建昌新城縣南。

達人到岸不須船。留寄寒雲幾百年。欲問上方多少遠。為言先過淨居天。輿地紀勝。

西湖參寥山房

我愛參寥一味閑。巖房占得畫屏閒。斫開東廡數枝竹。放入西湖十里山。石底酌泉清徹骨。門前逢客強為顏。白雲幽鳥應相信。出本無心倦即還。咸淳臨安志。

元祐元年六月十六日還自海上入佛日山淨慧道場瞻禮懷禪師塔時長老弼公即阿育王大覺

禪師之嗣也送予出山酌甘泉而別因留詩

佛日山前水。行人甘露杯。須知源派遠。直自四明來。鐵網珊瑚。

劉子秘

秘官奉職與楊次公倡和。

贈傅神歐陽价

筆妙今為第一人心期造化奪天真精神形骨從來一移入青縑似兩身古今詩話

李山顛

舟泊太湖

旋經義興境頓棹石蘭渚震澤為何在今惟太湖浦圓經縈五百盼目眇無覩高天森若岸長津雜如縷窈窕尋灣碕迢遞望巒嶼驚飈揚飛湍浮霄漾懸岨輕禽翔雲漢遊鱗憩中滸黯靄天時陰曉巖舟航舞馮河安可馴靜觀戒行旅震澤編

關景仁

景仁字彥長錢唐人魯之子嘉祐四年進士

贈小蘇

昔日聞蘇小今朝見小蘇未知蘇小貌得似小蘇無

泗上錄元居中作宿守郡有官妓小蘇善

歌舞令就座客關彥長求詩贈之云云

李定

定字資深揚州人舉進士元豐閒官御史中丞哲宗朝謫居滁州

詩話總龜李定字仲求洪州人又李定字資深揚州人元豐中御史中丞又李定濟南人嘉祐中老于正卿同姓名者凡三人

老學菴筆記潘子賤題蔡奴傳神云嘉祐閒風塵中人亦如此嗚呼盛哉蔡實元豐中人也仇氏初在民間生子為浮屠曰了元即佛印禪師又為廣陵國子博士李問妾生定出嫁郗氏生蔡奴故京師人謂蔡奴為郗六

東軒筆錄司農少卿朱壽昌在襁褓所生母被出治平中棄官入關中尋訪得于陝州蘇子瞻作詩序且譏切世之不養者李定見之大惋恨會為中丞劾軾作詩訕謗將致不測賴上保持之止黜為黃州團練副使

海棠

輕紅如杏素遮梨直似佳人照碧池已是化工教豔絕莫嫌青帝與開遲烟滋綽約明雙臉雨借妖饒入四支西蜀有名須得地瓊林高壓百花奇海棠譜

琴溪

芳草茸茸襯馬蹄兩陪憲節過琴溪東風又屬梨花月膏雨新調燕子泥郵舍亭空蒼蘚合釣臺人去暮雲棲此行不憚驅馳遠千里江山入品題寧國府志

邵雍

雍字堯夫河南人嘉祐中詔求遺逸授將作監簿復舉逸士補潁州團練推官稱疾不起名其居曰安樂窩自號安樂先生元祐中諡康節有擊壤集

安樂窩

半記不記夢覺後。似愁無愁情倦時。擁衾側臥未欲起。簾外落花撩亂飛。

聞見前錄。司馬溫公

愛此詩。請書紙簾上。

謝司馬君實諸公買園

重謝諸公為買園。買園城裏占林泉。七千來步平流水。二十餘家爭出錢。嘉祐卜居終是僦。熙寧受券遂能專。鳳凰樓下新閑客。道德坊中舊散仙。洛浦清風朝滿袖。嵩岑皓月夜盈軒。接羅倒戴芰荷畔。談麈輕揮楊柳邊。陌徹銅駝花爛漫。隄連金谷草芊綿。青春未老尚可出。紅日已高猶自眠。洞號長生宜有主。窩名安樂豈無權。敢于世上明開眼。會向人間別看天。盡送光陰歸酒盞。都移造化入詩篇。也知此片好田地。消得堯夫筆似椽。

聞見前錄。康節先公。慶歷閒過洛。愛其山水風俗之美。始有卜築之意。至皇祐元年。洛人為買宅于履道坊西天慶觀東。康節復還葉縣。嘉祐七年。王宣徽尹洙。就天津橋南五代節度使安審秀故宅。基為屋三十間。請康節還居之。富韓公命其客孟約

買對宅一園。皆有水竹花木之勝。熙寧初。行買官田之法。天津之宅亦官地。勝三月。人不忍買。諸公曰。使先生之宅。他人居之。吾輩蒙恥矣。司馬溫公而下。集錢買之。先生以詩謝溫公。諸公云云。今宅契司馬溫公戶名。園契富韓公戶名。莊契王郎中戶

名。康節初

不改也。

寄呂獻可

一別星霜二紀中。升沈音問不相通。林閒談笑須歸我。天下安危且係公。萬乘几前當蹇謬。百花洲上略相從。不知月白風清夜。能憶伊川舊釣翁。

和司馬君實過天津居

風背河聲近亦微。斜陽淡泊隔雲衣。一雙白鷺來烟外。將下沙頭卻背飛。

春遊吟

人閒佳節惟寒食。天下名園重洛陽。金谷煖橫宮殿碧。銅駝晴合綺羅光。橋邊楊柳細垂地。花外秋千半出牆。白馬蹄輕草如剪。爛遊于此十年狂。

小車吟

自從三度絕韋編。不讀書來十二年。大鑿子中消白晝。小車兒上看青天。閑爲水竹雲山主。靜得風花雪月權。俯仰之間無所媿。任他人謗似神仙。以上擊壤集

張嶠

嶠字子望。滎陽人。與兄岫同登進士。受學于邵康節。

洛陽觀花

平生自是愛花人。到處尋芳不遇真。祇道人閒無正色。今朝初見洛陽春。

王直方詩話。此詩

蓋託意邵堯夫。

曹確

確、常州人。嘉祐四年進士。

題季子墓

人閒不記吳王事。江上今存季子宮。壞壁亂飄青蘚雨。破檐時蕩白榆風。衣冠何處堆春草。雞酒長年任野翁。下馬一看思舊德。浮名應與暮雲空。咸淳毘陵志。

程珣

珣字伯溫。西洛人。兵部侍郎羽之曾孫。以祖任為郊社齋郎。嘗知龔鳳磁漢四州。積遷大中大夫。

漢州作

濯纓泉潔存遺跡。促軫亭空想舊風。公暇未應無客會。春遊更喜與民同。方輿勝覽。

程顥

顥字伯淳。珣之子。舉進士。神宗朝。以薦為太子中允。監察御史裏行。罷知扶溝縣。責監汝州鹽稅。卒。文潞公題其墓曰明道先生。嘉定中。追諡曰純。封河南伯。從祀宣聖廟庭。有明道集。

林下偶談。山谷稱周濂溪曾次如光風霽月。又云。西風壯士淚。多為程顥滴。東坡為濂溪詩云。夫子豈我輩。造物乃其徒。蓋蘇氏師友。未嘗不起敬于周程如此。惜乎後因嘻笑而成仇敵也。

長嘯巖中得冰以石敲。滄甚佳。

車倦人煩渴思長。巖中冰片玉成方。老仙笑我塵勞久。乞與雲膏洗俗腸。

送呂晦叔赴河陽

曉日都門颭旆旌。晚風饒吹入三城。知公再為蒼生起。不是尋常刺史行。

西湖

溪水橋邊鴨子陂。樓臺只在郡城西。煙波乍見心先快。鳥嶼將尋路欲迷。盡日無風橫舴艋。有時經雨飲虹霓。如何咫尺塵埃地。不使遊人續杖藜。

陳公廩園修禱事席上賦

盛集蘭亭舊。風流洛社今。坐中無俗客。水面有清音。香篆來還去。花枝泛復沈。未須愁日暮。天際是輕陰。
以上河南程氏文集

顏復

復字長道。太初子。嘉祐中訪有道之士。京東部使者以復應詔。賜進士為校書郎。元祐中累官國子祭酒。天章閣待制卒。

寄雲門靈運禪師

雲門山嶺櫻葉青。雲門山下陰溪鳴。山翁毀服悖世榮。此心圓靜無能名。松閒一飯養槁形。石壁幾見秋苔生。愛山不免搜其情。掇拾短闕成長行。施子傳來奇可驚。爽闔空谷天外聲。高峯擺蕩疑莖英。
雲門集

劉摯

摯字莘老。永靜東光人。家于東平。嘉祐中擢甲科。神宗朝累遷禮部侍郎。哲宗即位。歷官門下侍

郎以觀文殿大學士出知鄆州。紹聖初，以黨論貶光祿卿，分司南京，再貶鼎州團練副使，新州安置卒。紹興中，贈少師，諡忠肅，有集。

孫少卿鹿頭山詩并畫圖

使君真愛鹿頭山，圖畫歌吟共爲傳。塵世那知武陵事，時人爭誦永嘉篇。行春游醉常勞夢，按部登臨又隔年。有客平生志林壑，坐憐雙眼隔雲烟。聲畫集

夜直中書省寄左丞子容公

膺門早歲預登龍，儉幕中閒託下風。敢謂彈冠煩貢禹，每思移疾避胡公。論文青眼今猶在，報國丹心老更同。夜直沈迷坐東省，齋居清絕望南宮。

卻埽編：蘇子容留守南都，莘老時爲判官。蘇大器愛之後，同秉政，因祠事各居本省，致齋，寄語云云。

湖上口號

綠荷深不見湖光，萬柄清風動晚涼。莫恨細葩猶未爛，葉香元是勝花香。能改齋漫錄。

易元吉畫猿

檨林秋葉青玉繁，枝閒倒挂秋山猿。古面睢盱露瘦月，毳毛勻膩舒元雲。老猿顧子稍留滯，小猿引臂勞攀援。坐疑跳擲避人去，彷彿悲嘯生壁閒。巴山楚峽幾千里，寒巖數丈移秋軒。渺然獨起林壑志，平生願得與彼羣。吾知畫者古有說，神鬼爲易犬馬難。物之有象衆所識，難以僞筆淆其真。傳聞易生近已死，此

筆遂絕無幾存。安得千金買遺紙。真偽常與識者論。聲畫集。

絳帳臺在江陵。東漢馬融教授弟子于此。

馬融號耆舊。太守南郡來。橫經坐絳帳。自處何崔嵬。帳前列徒弟。帳前歌管陪。書生貧賤志。遽以聲色回。
方輿勝覽。

王巖叟

巖叟字彥霖。大名清平人。仁宗初。置明經科。鄉舉省試。廷對皆第一。元祐中。拜簽書樞密院事。罷。
爲端明殿學士。出知鄭州。徙河陽。卒。紹聖中。坐黨論。追貶雷州別駕。有大名集。

柳絮

銀毬拋出翠烟深。聚散高低不自禁。飄去長教迎暖日。飛來深院怯春陰。全芳備祖。

和公齊臨替有感見寄

孤宦邊城見衆賢。及瓜能不動依然。風號古木葉堆地。雲攪遙山水拍天。籬菊高時寒有信。賓鴻過後暑
無權。古今惜別君須念。乘暇何妨倒酒船。瀛奎律髓。

駕幸太學

享餘精意煥龍章。就促鑾輿視上庠。億萬圍觀人作堵。三千迎拜士成行。虛心訪道資洪業。異禮尊儒冠
百王。四海嚮風知自勸。足應愚魯亦升堂。中州題詠集。

揚州感舊懷古

隱隱蕪城枕碧流。繁華曾是帝王州。一聲水調滿明月。十里春風半畫樓。白鳥不離圖上去。江雲長在鑑中遊。廢興屈指千年事。何異行人寄傳郵。揚州府志

陪孫之翰太博登成都樓

齷齪古之人。傷心廣陵廢。遂弦蕪城歌。半夜一揮涕。薰紈隨草衰。藻黼歸塵翳。魂石斂丘封。歌堂從水逝。薰光杳沈滅。吞恨徒千歲。我懷吳蜀國。禍亂若符契。目覽臺殿墟。心感君王世。干戈日馳逐。狼虎爭吞噬。山河寶天塹。城闕巍地腋。霸力不久炎。倏忽如焚薶。空餘萬雉城。岌倚寒雲際。麋鹿玩苹陰。狐狸棲棘衛。江漢含嗚咽。岷峨抱迢遞。荒村烟火遙。落日寒風厲。因知朝市人。自古悲興替。全蜀藝文志

霧山 在邛州

霧山環合自雲川。戶有青溪種玉田。萬樹桃花不知處。幾人曾得問秦年。方輿勝覽

王俊民

俊民字康侯。萊州掖縣人。嘉祐六年進士第一。

句

寒窗一夜雪。紛紛來朔風。之子動歸興。輕袂飄如蓬。問子何所如。家在濟水東。問子何所學。上庠教化宮。

齊東野語。世俗所謂王魁之事。殊不經。且不見于傳記雜說。疑無此事。後見初虞志所集養生必用方。戒人不可妄服金虎碧霞丹。云狀元王俊民。為應天府發解官。得狂疾。于貢院中。嘗對一石碑。呼叫不已。碑中若有聲之者。亦若康侯之奮怒也。病甚。

不省取書冊中交股刀自裁及寸左右抱持之遂免出試院未久疾勢亦已平復予與康侯有鄉曲之舊童稚共筆硯傳聞可駭亟自汶擊舟抵彭城康侯亦起居飲食如故但惜惜不樂歲暮予北歸康侯有詩送予云云予既去徐醫以爲有涎以碧霞金虎丹吐之積久爲寒中洞泄而死康侯父知舒州太湖縣遣一道士來作醮書符傳道冥中語云五十年前打殺謝吳留不結案有妄人托夏噩姓名作王魁傳欲市利于少年狹邪輩其事皆不然

喬孝本

孝本嘉祐中福州簽判

題三山郡圃會稽亭元給事絳建

元侯選勝重經營地取園心正且平揆日募工踰再浹創亭合樂落初成面開西向緣忠孝榜揭新封紀寵榮隱隱湖山藏故國漫漫煙水隔都城低迷壘嶂回峯抱繚繞芳叢列豔迎臺上臨風共蕭灑花閒夢蝶助淒清枕流小檻歌前沼散綺幽軒接後薨舊景周環如有待夕陽偏照似多情縈紆碧沚通潮浦左右修篁拂畫楹自昔甘棠雖足愛會稽從此擅佳名淳熙三山志

孔文仲

文仲字經父臨江新喻人嘉祐六年進士哲宗朝官中書舍人後入黨籍與弟武仲平仲有清江三孔集

早行

客興謂已旦出視見落月瘦馬入荒陂霜花重如雪海風吹萬里兩耳凍幾脫歲晏已苦寒近北尤凜冽

況當清曉行。迺此原野闊。笠飛帶繞頭。指直不得結。農家烟火微。炙手粗可熱。豈能迂我留。而就苟且活。仰頭視四字。夜氣亦漸豁。苦心待正晝。白日想不缺。宋文鑑

朱伯虎

伯虎字才元。華亭人。嘉祐六年進士。官江東運判。

題佘山普照寺聰道人月軒

愛月開軒絕頂閒。岬然巍剌壓層巒。翦除羣卉當簷盡。添得清光滿檻看。亂石雲堆秋色冷。老松風入夜聲寒。十年夢寐江鄉景。杖屨終期日倚闌。松江府志

曾宰

宰字子翊。鞏第五弟。嘉祐六年進士。官舒州司戶參軍。湘潭縣主簿。

舒州寄王介甫

官居隱几望瀟山。不似茅簷舊日閑。顧我塵沙添白髮。憐君道路失朱顏。江涵秋老鱸魚美。岸入春風荻筍斑。此味總佳吾不樂。惟思一馬返鄉關。

李壁王荆文公詩注予居撫州

訪遺文于其孫極止得此詩

許將

將字冲元。福州閩人。嘉祐八年進士第一。神宗朝。累遷知制誥。翰林學士。紹聖初。拜尙書左丞。中

書侍郎徽宗朝進門下侍郎加觀文殿學士告老爲佑神觀使卒贈開府儀同三司謚文定

成都運司西園亭詩和章質夫

雲峯樓

重樓起城陰乘高望西極列峯橫青天飛雪千里積疑是空素山冬夏海中白莫怪頻東向上有思歸客

水閣

飛閣出方池修曲見空莽低臨花塢近平覺春波長返景澄餘暉夕陰帶浮爽從容觀魚樂不減遊濠上

成都文類

沈括

括字存中錢唐人嘉祐八年進士編校昭文館書籍爲館閣校勘熙寧中遷翰林學士龍圖閣待制坐事謫均州團練副使徙秀州復光祿少卿分司南京居潤州有長興集夢溪筆談

方輿勝覽沈存中宅在潤州朱方門外存中嘗夢至一處小山花如覆錦喬木覆其上山下有水夢中樂之後守宣城有道人無外者爲言京口山川之勝郡人有地求售以錢三十萬得之又六年坐邊議謫官廬于溇陽元祐初道京口登所買地即夢

中所遊處遂築

室焉名曰夢溪

延州詩

二郎山下雪紛紛旋卓穹廬學塞人化盡素衣冬未老石煙都似洛陽塵

夢溪筆談鄜州延州境內有石油。舊說高奴縣出脂水。即此也。生于水際沙石。土人以雉尾裏之。乃采入缶中。頗似淳漆。燃之如麻。但烟甚濃。所需幄幕皆黑。予疑其烟可用。試掃其煤以爲墨。黑光如漆。松墨不及也。遂大爲之。其識文爲延州石液者是也。

嘗茶

誰把嫩香名雀舌。定來北客未曾嘗。不知靈草天然異。一夜風吹一寸長。

夢溪筆談。茶牙謂之雀舌。麥顆。言其至嫩也。今茶之美者。新牙一發。便長寸餘。其細如針。惟牙長者爲上品。以其質韌。土力皆有餘故也。北人不識。誤爲品題。如雀舌麥顆。極下材耳。

陳丞相故宅

丞相旌旗久不歸。虛堂寧止嘆伊威。綠槐樓閣山蟬響。青草池塘野燕飛。

夢溪筆談。丞相陳秀公治第于潤州。極爲閎壯。池館綿亘數百步。完成。公已疾甚。唯肩輿一登西樓而已。

潤州甘露寺

丞相高齋半草萊。舊時風月滿亭臺。地從日月生時見。天到江山盡處回。三國是非春夢斷。六朝城闕野花開。心隨潮水漫漫去。流徧煙村半日來。

歸計

住山人少說山多。空只年年憶薜蘿。不是自心應不信。眼前歸計又蹉跎。以上宋文鑑。

開元樂詞

鶴鵲樓頭日暖。蓬萊殿裏花香。草綠烟迷步輦。天高日近龍牀。樓上正臨宮外。人閒不見仙家。寒食輕烟薄霧。滿城明月梨花。按舞驪山影裏。回鑾渭水光中。玉笛一天明月。翠華滿陌東風。殿後春旗簇仗。樓前御隊穿花。一片紅雲鬧處。外人遙認官家。

侯鯖錄。裕陵

賞愛此詞。

漢東樓

野草黏天雨未休。客心自冷不關秋。塞西便是猿啼處。滿目傷心悔上樓。方輿勝覽。

光化道中遇雨

望遠初翻葉。隨風已結陰。雨篷宜倦枕。鄉夢入寒衾。莎笠侵鄖俗。溪山動越吟。烟波千里去。誰識魏牟心。

錦繡萬花谷

鞦韆

香入熏爐禁火天。芙蓉深苑鬪鞦韆。身輕幾欲隨風去。卻恨恩深不得仙。後村千家詩。

在當塗作

豹塘春水綠泱泱。謝市烟深柳線長。捲幔夕陽留不住。好風將雨過橫塘。輿地紀勝

秀州秋日

草滿池塘霜送梅。林疎野色近樓臺。天圍故越侵雲盡。潮上孤城帶月回。客夢冷隨風葉斷。愁心低逐雁聲來。流年又喜經重九。可意黃花是處開。至元嘉禾志

仙都山

苔封輦路上青山。鶴馭遼天去不還。惟有銀河秋月夜。鼎湖烟浪到人閒。仙都山志

蘇小小墓

古木寒鴉噪夕陽。六朝遺恨草茫茫。水如香篆船如葉。咫尺西陵不見郎。嘉興府志補

江南曲

新秋拂水無行跡。夜夜隨潮過江北。西風卷雨上半天。渡口微吟含曉碧。城頭鼓響日脚垂。天際籠煙鎖山色。高樓索莫臨長陌。黃竹一聲無北客。時平田苦少人耕。惟有蘆花滿江白。宋藝圃集

遊花山寺

經旬飄雨喜新晴。病馬衝泥取次行。老態只應隨日至。春心無意與花爭。山川滿目浮烟合。樓閣侵天暮靄橫。嗟我有身無處用。強攜樽酒入崢嶸。鎮江府志

袁默

默無錫人。嘉祐八年進士。

人與剛中適甫遊惠山
雨過山前翠欲飛。水雲高下正含暉。魚跳細浪千花碎。蟬倚清陰一嘒微。沈李浮瓜吟齒盡。清風明月滿船歸。超然不負尋幽興。拂得荷香在葛衣。惠山集

蘇唐卿

唐卿官寺丞。宰費縣。善小篆。嘉祐中。嘗書歐陽文忠公醉翁亭記。刻石于費之縣齋。記後有倡和詩。

唐卿既篆歐公侍郎滁州琅琊山醉翁亭記上石。訖思莫能致之滁上。因斧官之隙地。衆材堪梁棟者。枝其椽桷。構堂于廡舍西偏。高三仞。植記于中楹。若屏然。圖悠久也。因成長句五十六字。兼寄獻歐公侍郎。

醉翁亭記醉翁堂。遠取琅琊卽費鄉。高世雄文刊翠琰。老山孤幹負虹梁。左鄰鼇海三神島。西倚儒宮數仞牆。雖媿篆工非墨寶。英辭終與借輝光。篆書醉翁亭記石刻

龔敦

敦鄉貢進士。

和

滁守南遷記醉狂。篆刊移近舞雩鄉。當年寓興臨山水。今日希風構棟梁。吏部喪文辭避席。陽冰閣筆讓循牆。東沂從此遺聲迹。迴掩桐廬翰墨光。范公希文守桐廬。嘗作嚴先生祠堂記。邵先生篆以刊石。光絕一時。篆書醉翁

亭記石刻。

邵忱

忱、鄉貢進士。

和

歐公頃歲守滁陽。題記蒼顏入醉鄉。賢宰特將刊古篆。舊碑不免棄山梁。安屏筆札難通似面牆。異日智仙來輦去。退蒙從此謝聲光。

舊碑乃陳知明所書。篆書醉翁亭記石刻。

史辭

辭、武昌人。

和

昔日歐公鎮永陽。構亭直在水雲鄉。醉翁嘯傲曾為記。賢宰風流別架梁。老筆健逾刊琬琰。晴嵐滴瀝照門牆。更吟新詠深堂祕。相伴崑山片玉光。

篆書醉翁亭記石刻。

張頌

頌、為登州防禦判官。

和

重惜歐公滁記好。模刊翠琰費堂新。文華起焰衝星斗。篆法通靈動鬼神。觀妙每多師道客。仰高常有慕賢人。燦然輝目如辰象。不朽宜為萬世人。

篆書醉翁亭記石刻。

宋詩紀事卷二十三

錢唐厲鶚輯

江都陸鍾輝勘定

范祖禹

祖禹字淳父鎮之從孫嘉祐八年進士甲科哲宗朝累擢右諫議大夫遷給事中拜翰林學士出知陝州貶謫以終有范太史集

資山在資陽縣治平中宰龍水作

資山巖谷多神仙鸞車鳳馬隨飛煙神女蕭蕭來暮雨浮丘往往下雲駟

龍水縣齋作

縣門倚巖石終日對青峯初仕借為宰讀書過三冬忘機狎鷗鳥觀稼親老農訟庭可羅雀銅印苔蘚封

月夜船行入資州

憶昨臥碧山蒼蒼叢桂閒白雲為屏石為枕綠蘿長挂明月閑忽乘輕舟泛江水山月隨人還在此白鷺驚飛宿靄閒青山倒臥蒼波底此時孤櫂發中流川后停波聽櫂謳不學子猷中夜返欲乘明月向資州

資州路東津寺

山行無晨暮日暝崖谷昏哀猿落客淚永路驚旅魂憑陵高山巔俯視大江奔迴環島嶼合縈轉洲渚屯

行雲赴楚天。飛鳥下蜀門。地遐怪物聚。寺古深殿存。憶昔李氏末。煙塵暗中原。姦雄競草竊。割據窮海根。干戈百年後。見此敗屋垣。我來屬清秋。登覽無俗喧。山深虎豹歸。水靜蛟鼉騫。臨風獨嘯吒。浩蕩欲飛翻。以上范太史集。

孔武仲

武仲字常父。嘉祐八年進士。元祐中。歷官禮部侍郎。出知洪宣二州。坐黨籍奪職。居池州卒。

鄂州

綠柳陰陰蔽武昌。汀州如畫引帆檣。一江見底自秋色。千里無風正夕陽。暫別勝游渾老大。追思前事只淒涼。賢豪況有遺蹤在。欲買溪山作漫郎。

張秉叔出紫雲回鑾圖以示坐客因爲賦之

開元太平無兵戎。真人味道希夷中。人閒之樂已饒足。唯有青霄未追逐。坐中誰似葉先生。以氣爲糧常辟穀。朝登員嶠夕崑崙。只與神游不要人。忽逢邀攜看月去。縹緲虛空生紫雲。蟾宮竟不容久住。仙樂飄飄送回去。歸來宮漏未移更。甲帳明釭宛如故。汾水悲歌仙不成。梨園空沒有遺聲。紅塵如海漲朝市。從此無人游玉京。

和李時發春日見寄

聞道重湖路未通。悠然身在碧湘中。崎嶇水國猶千里。牢落春花已半空。江浪濺寒侵小睡。岳雲篩雨響疎篷。君詩亦說清幽趣。便覺年來氣味同。以上清江三孔集。

郭

附

附字明仲。吳郡人。嘉祐八年進士。知洪州新建縣。後以朝奉大夫致仕。

吳郡志：明仲致仕後，幅巾策杖，窮山林

詩：酒之適十八年。東南高士皆願從游。

楓橋

師子山雲漠漠。越來溪水悠悠。鐘到客船未曉。月和漁火俱愁。咫尺橫塘古塔。連綿芳草長洲。一老翛然自在時。時來繫扁舟。吳郡志

周

邪

邪字開祖。錢唐人。嘉祐八年進士。元豐中為溧水令。仕至朝請大夫。輕車都尉。蘇軾倅杭。多與酬倡。所謂周長官者是也。

新月

落照西山夜色浮。彎彎寒挂碧雲頭。寶奩新樣橫眉黛。珠箔斜懸半額鉤。丹桂一枝初淺露。金波千里未圓流。嬋娟三五纔成魄。散滿清光四百州。合璧事類前集

訪慧山錢道人

不遇

登山穿破亂雲堆。不見高人眼倦開。門掩水聲閑白日。路無車跡長蒼苔。牆頭五柳空搖曳。池上雙鳧自往來。卻擢扁舟自回去。過江思上子陵臺。咸淳毘陵志

湖中聞有美堂上歌笑聲寄蘇公

堂上歌聲想遏雲。主人休整碧紗裙。妝殘粉落胭脂暈。飲劇杯深琥珀紋。簪履定知高楚客。笑談應好卻秦軍。莫辭上馬玉山倒。已是遲留至夜分。

聞蘇公獨游淨慈謁本長老以詩奉寄仍邀遊靈隱

放歸騶騎獨尋山。直入青蘿翠靄閒。謝客杖藜方自適。阮公蠟屐許誰攀。何愁白髮能添老。須信黃金不買閑。應向林泉真得趣。徜徉終日未經還。以上咸淳臨安志

曹輔字子方華州人

字子方。華州人。登嘉祐八年乙科。官提點廣南西路刑獄。福建轉運使。朝奉郎。守司勳郎中。號靜常先生。

困學紀聞。攻媿跋曹子方書。以為祐陵時上書論時事。靖康至樞筦。愚謂有兩曹。輔其一字子方。與蘇黃游。若論事為樞筦者。字載德。龜山為銘。合為一人。非也。

次韻无咎戲贈兼呈同舍諸公

少年落魄走四方。看山聽水興難忘。深林誰復知孤芳。十載江湖稱漫郎。紫溪風月幽思長。綠水如鏡煙蒼蒼。追隨豪雋多清狂。春風爛醉胥山堂。下瞰羣峯聳如槍。吳儂棹歌笛靈羌。攀蘿捫壁疲獲臧。經旬選勝行齋糧。客兒經臺倚高岡。共臥明月吟胡牀。投身忽落崑崙傍。征西萬馬隨騰驤。官軍夜半填賊隍。食盡師老催歸裝。將軍數奇漫鷹揚。斬捕不能酬失亡。曲突徒薪語莫償。幕中病客非智囊。扁舟夷猶憶吳

鄉鬼侯平日丈人行生駒。今始見驢驢。伯樂一盼過老商。恐是稟質蒼龍房。尤工吳語放降王。叔敖抵掌對燭光。秋英落盡金鈿黃。玉甕浮春醅。潑香九天廣樂來。新涼笑談聊此共。一觴天街六翮將。翱翔正值羿殼遊中央。我老委翅無復望。洞庭橘熟千林霜。行當拂衣解銀章。買取百花洲畔莊。世外日月何曾忙。翛然一室生吉祥。車馬還能過我牆。夜具茗飲與柘漿。更看君詩雲錦張。同文館倡和詩。

上祖擇之龍學

此生飄泊任乾坤。南北東西豈更論。萬里欲封防墓土。十年重到李膺門。少驚人事時千變。盡付羈愁酒一樽。主上思賢厚風俗。如公終未老丘園。祖龍學集附。

題白氏莊

白序字聖均。自言白侍郎之後。有莊在樊川。

浮雲萬態變朝昏。疊嶂尋常翠滿門。錦里先生多勝事。香山居士有賢孫。春風樓閣聞棊響。晚雨池塘見屐痕。寄謝世閒無此樂。起予歸興憶江村。陝西通志。

松江亭

塵路長迷眼。江亭一散襟。始驚天地闊。更覺水雲深。點點鷺鷥影。疎疎橘柚林。扁舟他日興。誰共此登臨。吳江縣志。

遊劉道人巖

故老能將舊事傳。仙翁蹤迹尙依然。方知物外壺中景。隱隱烟霞有洞天。粵西詩載。

陳軒

軒字元輿建陽人嘉祐八年進士元豐閒知汀州元祐中為中書舍人至龍圖閣學士

題志添禪師

車輪馬足走塵煙競看成都萬炬然獨我踏開亭下雪伴師同坐一菴禪補續高僧傳

汎青溪

曉煙如練曳平津一櫂東風兩岸春島鷺沙鷗休戀我北堂歸有白頭親嚴州府志

題蓬萊觀

白鵝乘去人何在青鳥飛來信已遙若使何郎有仙骨也須同引鳳凰簫

汀州府志寧化劉氏女生不茹葷美而慧以不嫁自誓父母許石城何氏子卜吉聚族往送之甫越境白鵝從天下乘之飛去眾共剏祠郡以狀聞賜為蓬萊觀守陳軒題詩觀中

馬默

默字處厚單州成武人第進士調臨濮尉知項城縣治平中以薦為監察御史神宗朝累官戶部侍郎寶文閣待制告老提舉鴻慶宮卒入元祐黨籍

孔平仲談苑馬默為臺官彈奏輕薄劉貢父曰既云馬默不合驢鳴

思郭真人

郭也三峯秀文章似性淳汶陽初識面謂我舊相親題詩敍游隱於今經幾春有家歸未得西望涕霑巾

王臨

臨字大觀。大名成安人。舉進士。治平中。歷戶部副使。以寶文閣待制知廣州府。徙河中卒。

題司空表聖王官谷

夫君久逐夜舟移。依舊巖扃鎖翠微。位至文昌還避世。身甘幽谷是知機。清風未泯隨流水。遺像空存伴落暉。百有餘年同俯仰。白雲猶繞故亭飛。熙寧壬子六月二十日書。王官谷集。

潘興嗣

興嗣字延之。慎修之孫。丁謂之甥。家新建。以廕授將作監主簿。初調德化尉。投劾去。築室豫章城南。自號清逸居士。熙寧初。召為筠州推官。辭不就。有文集及詩話補遺。

戲郭功甫

休恨古人不見我。猶喜江東獨有君。盡怪阿戎從幼異。人疑太白是前生。雲閒鸞鳳人閒現。天上麒麟地上行。詩律暮年誰可敵。筆端談笑埽千兵。

潘子真詩話。袁世弼。南昌人。宦游當途。時功甫尙未冠也。世弼愛其才。薦于梅聖俞。自爾有聲。功父嘗謂吾大父清逸云。數載汲引。梅二丈力也。蒿埋三尺。不敢忘其賜。功甫既壯。頗恃其才。下筆曾不經意。論者或惜其造語無刻厲之功。清逸云。如功甫

豈易得。但置作者中。便覺有優劣耳。清逸嘗有詩戲之云云。

題濂溪

鱗鱗負郭田。漸次郊原口。其中得清曠。貴結林泉友。一溪東南來。激澗翠波走。清響動靈粹。寒光生戶牖。峩峩雙劍峯。隱隱插牛斗。疎雲互明晦。嵐翠相妍醜。恍疑座中客。卽是關門叟。爲歌紫芝曲。更擊秦人缶。窅然忘得喪。形骸與天偶。君懷康濟術。休光動林藪。得非仁知樂。夙分已天有。捉鼻固未免。安能混真守。日暮車馬徒。橋橫莫回首。廬山紀事

滕王閣春日晚眺

重疊西屏對面開。巍城穹閣信雄哉。眼中孤鶩雲邊沒。望裏長江檻外來。蛺蝶圖成春未晚。柘枝筵動客多才。休論今古興亡事。時倒金尊醉一回。

秦山洞

秦人當日避風煙。自種桑麻老洞天。綠竹橫溪雞犬靜。不知門外漢山川。以上江西通志

胡宗炎

宗炎字彥聖。宿子。舉進士。徽宗朝。官至直龍圖閣。知潁昌府。

句

飛禽避軒蓋。殘果落莓苔。

娛書堂詩話此二

句歐陽公深賞之

宋史本傳宗炎爲詩薄思清婉陽修守學與客游郡圃或誦其詩修賞味不已以爲有鮑謝風致

李中師

中師字君錫開封尹

奉別堯夫先生承見留數刻瀆梅酒磨沈水飲別聊書代謝

磨湯瀆酒重分攜景霽風和二月時莫忘天津別君處黃梅庭下半離披擊壤集附

陳大雅

大雅張表臣外祖

絕筆

胡柳陂中過令人念戰功兵交千騎沒血滌一川紅朱氏皆豚犬唐家盡虎龍壯圖成慷慨擲劍向西風

珊瑚鉤詩話外祖陳公大雅爲人剛果文章似之再舉不第能詩爲趙清獻所知踰八十乃死死翌日復蘇索筆題詩云云題畢乃逝味其言豈葛從周王彥章之徒歟

陳知默

句

平地風煙橫白鳥半山雲木卷蒼藤雲埋山麓藏秋雨葉脫林梢帶晚風

王直方詩話田承君云歐陽公晚年最喜陳知默詩至云修方且欲學之陳詩不多但見兩聯

張洵

蒙亭倡和長句有序

嘉祐中經略吳公及卽伏波巖之左以爲亭名蒙漕使李公師中記之而鑿於巖之崖亭久埋廢記亦湮滅紹聖改元龍圖閣胡公宗回帥桂林憲使梁公出其家藏蒙亭記以觀由是知其亭之詳胡公斥基而新之遂爲殊偉之雄觀

桂林山水冠衡湘蒙亭正在灘水旁清流洄洑眩波光高崖古木爭蒼蒼下有菱荷滿橫塘面面風來面面香新詩一詠酒一觴爽氣渾如秋氣涼酒闌巖下踞胡牀汲泉煮茗沈煙長從容談笑聲琅琅水光山色增輝芒東山蘭亭各一方風流兼追謝與王回頭塵事皆茫茫爲計不若行樂良恨我到此情難忘遙指白雲思故鄉粵西詩載

尙用之

和韻

江亭勝概冠三湘仁智所樂皆其旁翠岫俯映青蘿光上有喬木摩穹蒼亭下川蓮覆銀塘水面風來笑語香騷人相值喜飛觴雄辯清談五月涼飲餘相與坐方牀論文日暮興何長佳篇疾讀韻琅琅真疑星斗煥光芒格高調古說奇方況復筆法追二王事業無窮歎茫茫丹鉛點勘策非良與公致道心可忘浩歌直造無何鄉粵西詩載

呂源

和韻

九溪灘水接瀟湘。萬壑千崑羅水旁。七星高聳生輝光。連天一色皆蒼蒼。倚江景物似錢塘。況有萬戶新
醅香。古洞相對笑舉觴。文淵遺迹徒悲涼。安得石枕與藤牀。夢想昔人風味長。滿車薏苡勝琳琅。流傳千
載事微芒。男兒生卽志四方。將軍異代猶封王。感時撫事心茫茫。願我豈有籌策良。報國志願不敢忘。此
身未暇歸江鄉。粵西詩載

李彥

和韻

桂江繚繞通湖湘。佳山四插江之旁。嵐光滴翠漾波光。岸頭秀木皆青蒼。誰人築室枕西塘。新荷敲風柄
柄香。君嘗招我來攜觴。登臨樂臆生清涼。倏思伏波離空牀。且及尊前飲興長。紛劇雄辯聲何琅。客傳俗
事江亭芒。蠻歌蠻曲笑遐方。應無夢怪楚襄王。但驚歲月去茫茫。報國宜多爲畫良。功名未白何時忘。此
心疇敢憶家鄉。粵西詩載

葉宗嚮

和韻

我行幾許踰沅湘。直抵八桂灘水旁。千山倒影搖溪光。秀色不借草木蒼。茲亭構勝俯回塘。野花風遞羅
綺香。崑前伏波航羽觴。一洗塵思生清涼。疑有仙人白玉牀。壺中景迴日月長。步此仙籟音琅琅。世閒名
利真毫芒。此景不獨冠南方。恨不築室輕侯王。回首塵迹空渺茫。瞥去未必計非良。其如樽酒情難忘。恍

然一夢五雲鄉。粵西詩載。

崔唐臣

唐臣、閩人。

書刺末

集仙仙客問生涯。買得漁舟度歲華。案有黃庭尊有酒。少風波處便為家。

避暑錄話。唐臣與蘇子容呂晉叔同學相好。二公先登第。唐臣遂罷舉。久不相聞。嘉祐中。二公在館下。一日忽見艤舟汴岸。坐於船窗者。唐臣也。亟就見之。邀與歸。不可問其別後事。曰。初倒篋中有錢百千。以其半買此舟。往來江湖閒。意所欲往。則從之。以其半居貨。閒取其贏以自給。粗足即已。差愈于應舉覓官時也。二公相顧太息而去。翌日自局中還。唐臣有留刺。乃攜酒具舟往謁之。則舟已不知所在矣。歸視其刺。末有細字。小詩云云。訖不復再見。

章友直

友直字伯益。得象族子。嘉祐中與楊南仲篆石經於太學。除將作主簿。不就。

書史會要。章氏煎友直之女。工篆書。傳其家學。友直執筆。自高壁直落。至地如引繩。而煎亦能如其父。以篆筆畫棋盤。筆筆勻正。縱橫如一。

和祖擇之咏震山巖彭徵君釣臺。唐宜春彭構雲隱處。

巖因更號震山居。臺上猶存舊釣磯。一派滄浪真隱處。澄清尚可濯塵衣。祖龍學集附。

陳烈

烈字季慈。侯官人。少以鄉薦詣闕。不第。與陳襄、周希孟、鄭穆稱海濱四先生。嘉祐中。以薦除國子

直講元祐中詔爲本州教授卒。

題福唐津亭

溪山龍虎蟠。溪水鼓角喧。中有鄉夢破。六月夜衾寒。風雨生殘樹。蛟螭喜怒瀾。殷勤祝舟子。移櫂過前灘。

皇朝類苑陳烈嘗與蔡君謨同硯席時君謨出鎮福唐東吏治民毫髮不容一日烈往見之維舟亭下聞其嚴察不往謁但留詩云云吏不敢隱錄詩呈公自是少霽威棱

題燈

富家一碗燈。太倉一粒粟。貧家一碗燈。父子相聚哭。風流太守知不知。唯恨笙歌無妙曲。

淳熙三山志元豐中劉待制瑾爲守元夕不問貧富每月科燈十盞陳先生以詩題鼓門大燈籠云云瑾聞而謝之

蔡準

準仙遊人京之父官郎中。

來賢巖在大滌洞秀峯之前東坡倅杭同準等七人來遊賦詩故號來賢。

大滌洞沈沈天柱峯業業人世悲落花巖松無易葉朝夕樵風生雲鶴閑情愜何當采玉芝仙蹤從此躡。

彭汝礪

汝礪字器資鄱陽人治平二年進士第一元豐初提點京西刑獄哲宗朝再遷中書舍人進權吏

部尙書言者謂附會劉摯出知江州有鄱陽集

寄君時四章章四句

我脂我車陟彼高岡母也吾懷匪居或忘
我帆我舟汎彼大江母也吾憂食匪或遑
我池有魚亦可以羹何必鮪及魴叔兮其歸哉
我田有菽苟可以食何必稻與粱叔兮其歸哉

送宗文先輩

夫子聲名二十年塵埃嘆息欲華顛相如舊有凌雲賦靖節今無種秫田南國寂寥歸見鴈北風悲壯屢聞蟬思量世事真如幻合置窮愁頓酒邊

二月己亥曉出代祀高禩

塵沙騎馬聽溪流淡薄春風卻似秋坐憶洞庭波萬頃灘聲長在釣魚舟
塵土冥冥二月風寥寥天外有歸鴻松陰想見芝山路隔浦溪花岸岸紅

泊真州新河亭

鬢毛垂雪欲穆穆道路風波老不堪繫纜短亭聊自慰青山數點見江南

燕姬

有女天天稱細娘真珠絡臂面塗黃南人見怪疑爲瘴墨吏矜誇是佛裝

張舜民使遼錄婦人以黃物塗面謂之佛裝

雞肋編北方士族女子冬月以括蕪塗面謂之佛裝但加傅而不洗至春暖方滌去久不為風日所侵故潔白如玉也

燕

一雙掠水燕來初萬點飛花社雨餘辛苦成巢君勿笑從來吾亦愛吾廬

湖湘道中見梅花

滴葉開花妙入神酥盤憶看北堂春瀟湘此日堪腸斷隨處幽香著莫人以上鄱陽集

舒 亶

亶字信道明州慈谿人治平二年進士試禮部第一神宗朝為御史中丞徽宗朝累除龍圖閣待制有集

村居

水遠陂田竹遶籬榆錢落盡槿花稀夕陽牛背無人臥帶得寒鴉兩兩歸墨莊漫錄

題慶安寺

門前屏障遶潺湲付與林僧夜定還松蓋作雲遮十里竹龍行雨出千山白公香火蓮開後謝氏池塘草夢閒我亦鳳凰臺上客圖閑卻笑未能閑陳郁話腴

和馬粹老四明雜詩

百粵喧華外。三江指顧中。耕桑遺俗在。草木故城空。即鄞郭也。近澤知田美。俗重近澤田。多魚驗海豐。由來形

勢地。越絕控遼東。宿蠶迎豆熟。俗有蠶豆。江雪伴梅消。抵虎螯經夏。里語八月蝓蚌可抵虎。跳沙蛤趁潮。里語有跳

沙蛤。酒罌雙印貴。俗重雙印酒。藥肆萬金饒。謂馮樓也。未覺西風遠。二溪好采樵。慈溪小溪藍溪也。

巷陌隨橋曲。閭閻占水窮。郡樓孤嶺對。古謂鎮明樓。市港兩潮通。開在城東隅。春暖雞鳴嶼。在慈谿。秋寒鴨信風。

江湖所呼。家家人富足。擊壤與吾同。

稻飯雪翻白。魚羹金鬪黃。鮎埼千蚌熟。在奉化。花嶼一村香。在慈谿。海近春蒸溼。湖靈夜放光。廣德湖每現光采。

北窗休寄傲。大隱即吾鄉。大隱山乃楊適先生所居。以上乾道四明圖經。

詠蔗

瑤池宴罷王母還。九芝飛入三仙山。空餘絳節留人閒。雲封露洗無時閑。節旄落盡何爛斑。野翁提攜出

茅菅。吳刀戛戛鳴雙環。截斷寒水何潺潺。相如賦就空上林。倦遊渴病長相侵。劉伶愛酒真荒淫。狂來欲

倒滄溟深。此時一嚼輕千金。壚邊何用文君琴。五斗一石安足斟。坐想毛髮生清陰。蕭瑟甘滋欲誰讓。檀

梨橘柚紛殊壯。冷氣相射杯盤上。顧郎不見休惆悵。佳境到時還不妄。詩成雖媿陽春唱。全勝乞與將軍

杖。合璧事類別集。

和石尉早梅

霜林盡處碧溪傍。小露檀心媚夕陽。天下三春無正色。人閒一味有真香。相思誰向風前寄。更晚那辭雪

後芳。朝夕催人頭欲白。故園正在水雲卿。瀛奎律髓。

湖心寺

吹落清香縹緲風。樓臺彷彿水邊紅。人間誰是丹青手。畫取春湖細雨中。

崇福寺

龕燈隱隱夜初分。落果猿啼枕上聞。客夢欲成成不得。一窗殘月半牀雲。

題太白峯

千峯下視盡兒孫。仙事寥寥不可聞。長作人間三月雨。請看膚寸嶺頭雲。以上延祐四明志。

句

春禽得意千般語。澗草無名百種香。墨莊漫錄。

游師雄

師雄、字景叔。京兆武功人。治平二年進士。授儀州司戶參軍。趙高帥延安。辟為屬。朝廷使與邊臣

措置。破洮州。擒鬼章。為陝西轉運副使。除直龍圖閣。攝帥熙河。移知陝州。卒。有集。

賀岷州守种誼破鬼章二首

王師一舉疾於雷。頃刻俄聞破敵迴。且喜將門還出將。檻車生致鬼章來。

圍合洮州敵未知。煙雲初散見旌旗。忽驚漢將從天下。始恨羌酋送死遲。陝西通志。

孫升

升字君孚高郵人治平二年進士元祐中歷侍御史中書舍人天章閣待制知應天府紹聖中謫汀州安置卒名入黨籍劉延世嘗從升游錄其言論為孫公談圃

送鄭待制閔中歸閩

清曉都門祖帳開路人相與歎賢哉流塵幾翳看山眼落日休停別酒杯何待諸生留北闕自存遺直在東臺連江四老嗟誰在白首今朝只獨來

孫公談圃鄭待制穆字閔中福州人與劉彝陳襄皆以德行為世所重號四先生鄭歸閩公有詩送之

宋史鄭穆傳元祐五年穆為祭酒以寶文閣待制請老給事中范祖禹言古者大夫七十而致仕有不得請則賜之几杖祭酒居師資之地正宜處老成願毋聽其去不報太學之士千餘人以狀詣宰相請留亦不從於是公卿大夫各為詩賦贈行空學

出祖汴東門外都人觀者如堵歎未嘗見

索劉述之新釀

稍覺香熏鼻還思酒入脣盈缸止三斗可撥甕頭春孫公談圃

句

玉筍千官散珠簾一夜空宣仁后挽詞來書占喜鵲落日聽鳴蜩峽口送人若與蛟龍爭角黍應同漁父啜糟醪屈原宅睡須山鳥喚酒聽竹枝掛述懷窮搜詩句熟老練世情通長陽道中白雲每逐晨光出紅鶴長隨暮

靄還。袁州道中。梁臺歌吹餘衰草。溢浦琵琶悵晚風。自南京和彭九江。慈竹筍抽疑夏籜。木犀花發認春香。在汀州作。

孫公談圃公嘗學詩于孫莘老嘗曰近世作詩無復有唐人風余嘗得公詩今略誦數聯云云在汀州避謗不作詩有一聯道盡汀州景物

練 恣

恣延平人。治平二年進士。元祐初。知旌德縣。雅負清操。民間凡飲酒。清者輒稱練長官。

鳧山廟

雲煙深處路縈紆。元是真人舊隱居。我亦放情丘壑者。官閑時得命籃輿。寧國府志

羅 適

適字正之。台州寧海人。治平二年進士。官提點兩浙京西刑獄。有赤城集。

送致政太師文潞公

曾將故老較量看。五福如公信是難。潞國封來多有歲。太師以上更無官。應留妙算安神器。必得人才薦將壇。他日宋家青史上。始終臣節雪霜寒。瀛奎律髓

試 筆

金門秃筆積如山。黃閣磨煤夜不乾。試借薦賢書彙看。應無一字及孤寒。前賢小集拾遺

過遠橋

長憶西橋避暑時。天風六月襲人肌。水隨地脈來無盡。雲過山頭去不知。拂面稚松應偃蓋。當年遊子已龐眉。憑師莫動溪邊石。留與東歸題好詩。台州府志

孔平仲

平仲字毅父。治平二年進士。元祐中提點京西刑獄。坐黨籍。安置英州。徽宗卽位。召爲戶部員外郎。遷金部郎中。出使陝西。帥鄜延環慶奉祠卒。

孔平仲談苑院中有雙鵲栖於玉堂之後海棠樹。每學士會食。必徘徊翔集。或鳴噪。必有大詔令。或宣召之事。因謂之靈鵲。故晁翰林詩云。卻聞靈鵲心應喜。并予詩云。靈鵲先依玉樹栖。蓋謂此也。

泛漣水

漣漪二十里。清淡得我性。微風不復搖。天水相與淨。秋容入崖柳。晚色依漁艇。髣髴會稽遊。南湖似明鏡。

出城

駐馬河之西。送車皆已返。郊原人漸少。風物秋將晚。身如獨鳥輕。意與青山遠。

寄內

試說途中景。方知別後心。行人日暮少。風雪亂山深。以上清江三孔集

藥名體

鄙性常山野。尤甘草舍中。鉤簾陰卷柏。障壁坐防風。客土依雲實。流泉駕木通。行當歸去矣。已逼白頭翁。此地龍舒骨。池隍獸血餘。木香多野橘。石乳最宜魚。古瓦松杉冷。旱天麻麥疎。題詩非杜若。牋膩粉難書。

茗溪漁隱叢話。

句

斜拖闕角龍千尺。淡抹牆腰月半棱。館中咏雪。冷齋夜話。

葛闕

闕治平三年以職方郎中知台州。

顯孝南山寺。在臨海縣。

六時香火集宗雷。日上雲收紫翠開。應笑守麾公暇少。二年官滿一曾來。台州府志。

常秩

秩字夷甫。潁州汝陰人。屏居里巷。以經術稱。屢授以官。不受。神宗即位。三使往聘。始詣闕。拜右正言。幹國子監。進寶文閣待制。卒贈右諫議大夫。

句

凍殺汝陰常處士也。來騎馬聽朝雞。

石林詩話。常待制秩居汝陰。與王回深父皆有盛名。于嘉祐治平之間。屢召不至。雖歐陽文忠公亦重推禮之。其詩所謂笑殺潁川常處士。十年騎馬聽朝雞者是也。熙寧初。荆公當國。力致之。遂起判國子監太常禮院。聲譽稍減于前。嘗一日大雪趨朝。

與百官待漏于仗舍。秩已來。寒甚不可忍。唱

然若有所恨者。乃舉文忠詩以自嘲云云。

許安世

安世、襄邑人。顛之世父。治平四年進士第一。為都官員外郎。卒於黃州。

詠史

天下有誅賞。固非君所私。太宗泣君集。意恐勞臣疑。至公一以廢。智術相維持。哀哉功名士。汲汲尙趨時。
許彥周詩話。

張景修

景修、字敏叔。常州人。治平四年進士。元祐末。浮梁令。兩為憲漕。五領郡符。大觀中。遷祠部郎中。詩幾千篇。號張祠部集。

寄葉□□自湖南憲請宮祠歸葉夢得大父也。

聞說年來請洞霄。江湖奉使久勤勞。有神仙處閑方得。用老成時退更高。借宅但須新種竹。尋仙想見舊栽桃。浮梁居士塵埃甚。鬚鬢而今也二毛。
石林燕語。

送朱天錫童子

黃金滿籬富有餘。一經教子金不如。君家有兒不肯娛。口誦七經隨卷舒。渥洼從來產龍駒。鸞鷲乃是真鳳雛。一朝過我父子俱。自稱窮苦世為儒。雪窗夜映孫康書。春隴晝荷兒寬鉏。翻然西入天子都。出門慷慨曳長裾。神童之科今有無。談經射策皆壯夫。古來取士凡數塗。但願一一令吹竽。甘羅相秦理不誣。世人看取掌中珠。折腰未便賦歸歟。待君釋褐還鄉閭。

中吳紀聞。初景修爲浮梁縣令。作此詩。天錫旣到闕。忘取本州公據。爲禮部所卻。因擊登聞鼓。繳景修詩爲證。神宗大稱賞之。翌日以語宰相王珪。而恨四方有遺材。卽令召對。珪言不欲以一詩召人。恐長浮競。不若俟其秩滿。然後擢用之。遂止。令中書籍記姓名。比罷官。而神宗已升遐矣。景修歷事三朝。每登對。上必問。聞卿作朱童子詩。試爲舉似。由此詩名益著。

貧居

茅檐月有千錢稅。稻飯年無一粒租。生事蕭條人問我。水芭蕉與石菖蒲。中吳紀聞。

睡香花

曾向廬山睡裏聞。香風占斷世間春。竊花莫撲枝頭蝶。驚覺南窗半夢人。

能改齋漫錄。廬山瑞香花。天聖中始傳。張祠部以瑞爲睡。其詩云云。

游九鎖

九鎖山中多隱仙。洞門終古掩雲煙。茶生東塢偏迎日。松老西巖不記年。翠箬久藏千歲藥。碧池終納半山泉。蒼崖縱使秦驅得。未信能移一柱天。洞霄詩集。

更高亭

在浮梁縣。

稚子山妻伴老翁。重陽尋徧菊花叢。明年把酒知何處。卻憶高亭是夢中。饒州府志。

句

洗竹放教風自在。傍溪看得月分明。題集清軒。 中吳紀聞。

蔣 槩

槩字康叔。江西龍泉人。治平閒進士。

登權州北門

壯士未酬志。乘秋感慨多。幽燕新種落。秦漢舊山河。塞月沈青冢。邊聲起白波。如何得萬騎。玉壘夜經過。

詩話總龜。

徐 積

積字仲車。楚州山陽人。治平四年進士。授楚州教授。事母極孝。政和中賜諡節孝處士。有集。

茗溪漁隱叢話。東坡云。仲車古之獨行也。於陵仲子不能過。然其詩文則怪而放。如玉川子。此一反也。耳噴甚。畫地爲字。乃始通語。終日面壁。坐不與人接。而四方事無不周知其詳。雖新且密。無不先知。此二反也。

淮之水示門人馬存

淮之水。淮之水。春風吹。春風洗。青于藍。綠染指。魚不來。鷗不起。激激灑灑。天盡頭。祇見孤帆不見舟。殘陽欲落未落處。盡是人閒今古愁。今古愁。可柰何。莫使騷人聞櫂歌。吾曹盡是浩歌客。笑聲酒面春風和。

愛愛歌

吳越佳人古云好。破家亡國可勝道。昨日閑觀愛愛歌。坐中歎息無如何。愛愛本是娼家女。金魂玉魄沈塵土。歌舞吳中第一人。綠鬢雙鬢纔十五。耳聞目見是何事。不謂其人乃如許。操心危兮勵志深。半夜窗

前淚如雨。假饒一笑得千金。何如嫁作良人婦。桃李不爲當路花。芙蓉開向秋風渚。忽然一日逢張氏。便約終身不相棄。山不磨兮海可枯。生唯一兮死難二。有如樗櫟叢中木。忽然化作瀟湘竹。又如黃鳥春風時。遷喬林兮出幽谷。文君走馬來成都。弄玉吹簫從幾曲。不聞馬上琵琶聲。忽作山頭望夫哭。去年春風還滿房。昨夜明月還滿牀。行人一去不復返。不念關山歧路長。前年猶惜縷金衣。今年不畫深臙脂。今年今日萬事已。鮫綃翡翠春如泥。一女二夫兮。妾之所羞。不求所事兮。志將何求。蛾眉皓齒兮。妾之所憂。不如無生兮。庶幾無尤。嗚嗚草蟲趨趨阜螽。靡不有初。鮮克有終。鴛鴦于飛兮。畢之羅之。人閒所恨兮。何休時。深山人跡不到處。病鸞斂翼巢空枝。

麗情集楊愛愛錢唐娼女也。垂髻喜歌舞。初學胡琴數曲。遂通他調。七月七日。泛舟西湖。採荷香爲金陵少年張暹所調。相攜潛遁。旅于京師。逾年。暹爲父捕去。愛留巷中。好事者百計圖之。不可得。念暹之勤。感疾而死。

貧女扇

妾有一尺絹。以爲身上衣。自織青溪蒲。團團手中持。朝攜麥隴去。暮汲井泉歸。無人不看妾。不使見蛾眉。

釣者

有人口誦浮雲曲。手把瀟湘一竿竹。荻花洲上作茅庵。坐看江頭浪如屋。以上節孝先生集。

章 棗

棗字質夫。浦城人。得象之姪。治平四年進士甲科。哲宗朝。歷集賢殿修撰。知渭州。進端明殿學士。徽宗立。拜同知樞密院事。授資政殿學士。中太乙宮使。卒諡莊簡。

運司園亭詩并序 存三首

成都轉運司園亭蓋僞蜀時權臣故宅也。清曠幽靜。隨處皆有可樂者。輒爲十詩。粗記領略。以備他日遺忘。庶幾讀其詩足以省憶髣髴云爾。

西園

古木鬱參天。蒼苔下封路。幽光無時歇。醜石終朝踞。水竹散清潤。煙雲變晨暮。何必憶山林。直有山林趣。

玉谿堂

堂因水得名。方沼當其後。漪瀾蕩榱桷。窗戶挹花柳。蟲魚不避人。鷗鷺若相友。午枕夏簟涼。此樂亦奚有。

小亭

花邊二小亭。雙跨清渠上。規模雖甚隘。幽僻良可賞。信依佳木陰。未羨大廈廣。不足延賓朋。攜筇常獨往。

以上成都文類

楊怡

成都運司園亭詩 和章質夫

西園

池臺密相望。曾是故侯宅。賞心知幾人。喬木已百尺。低花拂烏帽。古蘚駁蒼石。欲問昔豪華。秋風掃無迹。

小亭

方亭惟四柱。對峙花竹閒。下有雪嶺水。淙流日潺潺。宛如雙綵舸。纜向春波灣。欲起江湖心。而柰風濤艱。

以上成都文類

鄒極

極字適中。宜黃人。治平四年進士。擢度支員外郎。除江西提刑。丁外艱。服除。丐祠。得洪州玉隆觀。自號一翁。有宜川集。

石碧潺湲亭宜黃縣南二十里石梁數十丈橫空跨於兩崖曰石碧

危亭跨幽澗。澗水日潺湲。響與鼓鐘應。靜無車馬喧。布金因利物。漱玉自澄源。練引千尋遠。珠輕萬斛繁。倚空橫石壁。夾岸帶山樊。漲駭天河決。湍流地軸翻。僧棲真夢覺。客至滌塵煩。不盡登臨意。忘言媿有言。
撫州府志

江公著

公著字晦叔。睦州建德人。治平四年進士。歷提點湖南刑獄。京西轉運使。

久旱微雨作

雲葉紛紛雨脚勻。亂花柔草長精神。雷車卻碾前山過。不灑原頭陌上塵。

能改齋漫錄。江公著初任洛陽尉。作久旱微雨詩。司馬文正公見之。修刺謁江。且為稱薦。由是知名。

胡時中

時中字伯正。永州人。治平中進士。

清明行

憶昔父母康健時。清明攜我上丘壠。如今清明我獨來。卻將小兒拜先冢。凝情東風淚滿衣。江山雖是昔人非。兒兒問我悲何事。此意他年汝自知。前賢小集拾遺

陳 繹

繹字和叔。開封人。舉進士。神宗朝。歷祕書監。集賢學士。知廣州。貶建昌軍。

碧溪軒在建昌軍壽昌寺

蕭疎華薄隱山村。清淺浮桁帶郭門。竹倚闌干水邊寺。興來題作碧溪軒。輿地紀勝

羅尚友

尚友字明善。萍鄉人。治平四年進士。授鄂州軍事推官。

句

人閒酒客兼詩客。天上文星與將星。謁閣門使蕭注令賦 袁州府志

毛 漸

漸字正仲。衢州江山人。治平四年進士。哲宗朝。歷陝西轉運使。攝涇原帥。進直龍圖閣待制。

桃源洞

洞門流水日潺湲。桃塢依然枕水邊。春色年年花自好。遊人誰復遇嬋娟。天台山志

鄭 俠

俠、字介夫。福州福清人。治平四年進士。神宗朝。調光州司法參軍。入京監安上門。坐上書詆王安石。呂惠卿謫英州編管。徽宗卽位。除監潭州南獄廟。卒。自號一拂居士。入黨籍。有西塘集。

苞苴行

苞苴來。苞苴去。封書裹信不得住。君不見箕山之下有仁人。室無杯器以手捧水。不願風瓢挂高樹。

煙雨樓

仙人居處卽鼇宮。更作層樓峭倚空。羣岫西來煙漠漠。大江南去雨濛濛。花鑣柳策熙怡裏。耘笠漁蓑笑語中。別有夜楹千里月。凭闌清興與誰同。以上西塘集。

和王荊公何處難忘酒

何處難緘口。熙寧政失中。四方三面戰。十室九家空。見佞眸如水。聞忠耳似聾。君門深萬里。焉得此言通。翠屏筆談。

曾肇

肇字子開。易占子。布弟。牟阜嘉祐二年。宰六年。肇治平四年。皆舉進士。初調黃巖尉。用薦擢崇文校書。累遷國史編修官。元祐初。擢起居舍人。徽宗卽位。遷翰林學士。安置汀州。歸潤州。卒。諡文昭。入黨籍。有曲阜集。西掖集。

題王晉卿所藏鄭虔著色山水圖

曾訪江南烏爪仙。悞隨塵網落人閒。紅泉碧澗春風裏。尙記麻源谷口山。

上王荆公墓

天上龍胡斷，人閒鵬鳥來。未應淮水竭，所惜泰山頽。華屋今非昔，佳人閉不開。白頭門下士，悵望有餘哀。

海陵春雨 知泰州時作

公事無多使客稀，兩時衙退吏人歸。沈煙一炷春陰重，畫角三聲晚照微。桑雉未馴慚報政，海鷗相近信忘機。只將宴坐收心念，嬾向人閒問是非。

靈壽同年兄再以杞屑分惠復成小詩以代善謔

場居十年長鈴齋，一笑歡微言師水籬。交分托金蘭，腹飽仙人杖。心存姪女丹，他時玉京路。同綴侍宸官。

寄呂南公

主人第一河南守，之子無雙江夏才。會見吹噓上雲漢，可能憔悴隱蒿萊。風騷寓興垂金薤，翰墨傳家富玉杯。傾蓋相知勝白首，扁舟臨別重徘徊。

滁州瑯琊山茶仙亭

山僧獨好事，爲我結茅茨。茶仙榜亭中，頗宗樊川詩。

題多景樓

屈曲危樓倚半空，詩情無限景無窮。江聲逆順潮來往，山色有無煙淡濃。風月滿樓供一醉，乾坤萬里豁雙瞳。片雲迴逐斜陽去，知落淮山第幾重。 以上曲阜集

邇英閣侍講筵作 哲宗元祐中

二閣從容訪古今。諸儒葵藿但傾心。君臣相對疑賓主。誰識昭陵用意深。
邇英閣前槐後竹。雙槐極高而柯葉拂地。狀如龍蛇。或謂之鳳尾槐。
鳳尾扶疎槐影寒。龍吟蕭瑟竹聲乾。漢皇恭默尊儒學。不似公孫見不冠。以上墨莊漫錄。

句

鼎湖弓劍仙遊遠。渭水衣冠輦路新。階除翠色迷宮草。殿閣清陰老禁槐。

庚溪詩話。元祐閒。東坡與曾子開同居兩省。扈從車駕。赴宣光殿。子開有詩。其略云云。語亦佳。

何平仲

平仲、合州人。

聞周茂叔中年有嗣以詩賀之

慶門崇構已多時。五百年方是此期。樹長瓊枝生較晚。珠根驪頰得來遲。桓温貴骨天然別。韋相傳經道不衰。衡岳維高湘水闊。共知長與福爲基。濂溪集附。

劉恕

恕字道原。筠州人。渙子。舉進士。英宗朝。司馬光編次資治通鑑。薦爲局僚。官至祕書丞卒。

題靈山寺

早晚報衙蜂擾擾。友朋相和鳥關關。餘香滿袖花驚眼。空翠霑巾雨暝山。西江詩話。

費琦

呈謝通判殿丞寵示游山之作

夫君落筆盡珠璣，不比相如意思違。從此合陽須紙貴，夜來新有愛山詩。

濂溪集附。



平明看山人

同平曉

謝通判殿丞寵示游山之作

夫君落筆盡珠璣，不比相如意思違。從此合陽須紙貴，夜來新有愛山詩。

同

謝通判殿丞寵示游山之作

夫君落筆盡珠璣，不比相如意思違。從此合陽須紙貴，夜來新有愛山詩。

宋詩紀事卷二十四

錢唐 厲鶚 緝
臨潼 張四科 勘定

周延雋

延雋字仲章。鄒平人。治平閒。以職方郎中知台州。累遷太常少卿。

經臺

幽致極東南。清陰潤客衫。林深纔辨徑。雲滿欲藏巖。琴想山猿伴。花憎谷鳥銜。孤標如可挹。墜橐悵開緘。
台州府志

王誥

誥字晉卿。開封人。選尚英宗女秦國大長公主。為利州防禦使。以黨籍貶均州。歷定州觀察使。開國公。駙馬都尉。贈昭化軍節度使。諡榮安。

劉後村西園雅集圖跋云。本朝威晚。惟李端愿王晉卿二駙馬。好文喜士。世傳孫巨源三通鼓眉山。公金釵墜之詞。想見一時風流醞藉。未幾烏臺鞠詩案。賓主俱謫。而囀春鶯輩。亦流落于他人矣。

後唐莊宗廟

代梁繼李號良圖。卻惑歌兒便喪軀。試拂塵埃覘遺像。元來滿面是髭鬚。
侯鯖錄

湖上贈別并序

余前年恩移清潁。道出許昌。前途小阻。留西湖之別館者幾一月。常與韓持國、范景仁、汎舟嘯詠。使人頓忘去國流離之恨也。韓公德性溫厚。風度高雅。固已可愛。范公雖老而精神不衰。議論純正。白鬚紅面。動輒醺酣。時余有所賦詠。公卽取紅蓮葉命筆疾書。初不經思。佳辭麗句。頃刻而成。坐客莫不驚歎也。比聞朝廷就除端明殿學士以寵之。因思方今進任老成如公者。若再起之。亦足以厚風俗耳。清影十分月。暗香千柄蓮。不知從此別。高會復何年。

奉和子瞻內翰見贈長韻

帝子相從玉斗邊。洞簫忽斷散非煙。平生未省山水窟。一朝身到心茫然。長安日遠那復見。掘地寧知能及泉。幾年漂泊漢江上。東流不舍悲長川。山重水遠景無盡。翠幙金屏開目前。晴雲冪冪曉籠岫。碧嶂溶溶春接天。四時爲我供畫本。巧自增損媼與妍。心匠構盡遠江意。筆鋒耕徧西山田。蒼顏華髮何所遣。聊將戲墨忘餘年。將軍色山自金碧。蕭郎翠竹夸嬋娟。風流千載無虎頭。於今妙絕推龍眠。豈圖俗筆挂高詠。從此得名因謫仙。愛詩好畫本天性。輞口先生疑宿緣。會當別寫一匹煙霞境。更應消得玉堂醉筆揮長篇。

子瞻再和前篇非唯格韻高絕而語意鄭重相與甚厚因復用韻荅謝之

憶從南澗北山邊。慣見冷雲和野煙。山深路僻空弔影。夢驚松竹風蕭然。仗藜芒屨謝塵境。已甘老去棲林泉。春籃採朮問康伯。夜竈養丹陪穉川。漁樵每笑坐爭席。鷗鷺無機馴我前。一朝忽作長安夢。此生猶

欲更問天歸來未央拜天子。枯荻敢自期春妍。造物潛移真幻影。感時未用驚桑田。醉來卻畫山中景。水墨想像追當年。玉堂故人相與厚。意使嫫母齊聯娟。豈知憂患耗心力。讀書嬾去但欲眠。屠龍學就本無用。只堪投老依金仙。更得新詩寫珠玉。勸我不作區中緣。佩服忠言匪論報。短章重次木瓜篇。以上式古堂書考。

句

佳人已屬沙叱利。義士今無古押衙。

許彥周詩話。晉卿得罪外謫。後房善歌者名囀春鶯。爲密縣馬氏所得。後還朝。尋訪微知之。作詩云云。僕在密縣。與馬縉輔遊。知之最詳。縉輔在其兄處猶見之。西清詩話云。過潁昌見之。誤也。

章 峴

峴治平中廣南西路提點刑獄轉運使。

丁未上巳重遊龍隱巖

溪干橫棹訪巖扉。危磴攀躋不欲歸。垂乳滴聲當佛座。宿雲留潤在僧衣。聊開禊席臨流水。閑擲文竿到落暉。旅宦天涯甘寂寞。送春無意惜芳菲。桂勝。

蔡 覲

覲治平中定海縣尉。

正覺寺清風軒在定海縣西北。

海風拍枕燈初暗。山雨打窗人正寒。料得此軒秋更好。怒濤推月上闌干。延祐四明志。

滿執中

執中字子權。廣陵人。治平中為萬壽令。

石屏路

石屏月如水。石壁雲不動。閑中敲枕臥。天地同一夢。

明月溪

月出溪水清。月落溪水黑。茫茫溪上人。笑與月為客。以上滁陽志。

馬道

道吉州人。

啄木

翠翎迎日動。紅鬚響煙蘿。不顧泥丸及。唯貪得食多。纔離枯朽木。又上最高柯。吳楚園林闊。忙忙爭奈何。

翰府名談。治平中有為吉水令。忘其姓名。治邑嚴酷。野人

馬道為啄木詩。諷之。令見詩。稍緩刑。時人目曰馬啄木。

薛唐

唐鄞人。有田閒集。

田舍作

世業存五畝。家風守二南。適情無過睡。幽事不妨貪。母老廚增肉。朋來樹選柑。每慙躬稼穡。未及野農諳。
甬上耆舊集

蕭介夫

介夫字純臣。泰和人。英宗朝。官萍鄉簿。

將進酒歌

勸君莫累黑山土。累得黑山竟何補。勸君莫勒燕然石。勒得燕然又何益。百年歲月能幾何。螢燭光中都瞬息。我今安得萬丈梯。騰騰直上天街墀。剪折金烏翅。截下玉兔蹄。使玉兔不能走。金烏不得飛。然後舉泰山爲肉林。東海爲酒池。君不見吳下秋風悲。金谷園中春草衰。不如相逢且飲酒。齊聲拍掌大唱金縷衣。
吉安府志

錢忠

句

滿目生涯千頃浪。全家衣食一綸竿。

吳郡志。治平中。錢忠過吳遊賞。遙見一好女子。獨棹煙波閒。忠悅之。贈詩云云。女攜詩呈父。父以女妻忠。汎舟同入烟波。不知所往。

錢信

句

安得神仙術。試爲施康濟。使此平望村。如吾江子匯。

齊東野語。錢信平望蠶詩云云。吳興獨

江子匯無蠶。舊傳馬自然泊舟於此。

王安禮

安禮字和甫。安石弟。早登科。累官知制誥。翰林學士。知開封府。尚書左丞。紹聖初。罷知太原府。卒。
有王魏公集。

恭和御製上元觀燈

鑾輿清曉出瑤臺。羽衛瞻迎扇影開。鳳闕張燈上天坐。雞林獻曲海邊來。修文可笑秦無策。能賦休誇楚有才。星漢未斜鈞樂闋。君王宣示萬年杯。

瓊林苑賜宴餞留守太尉輒繼高韻

名德曾來重四夷。朝廷今日見官儀。陪祠自冠三公位。分陝猶爲百辟師。金谷望塵多眷舊。瓊林賜餞盡巫疑。都人喜見旆旌美。寧識勳名在鼎彝。
以上瀛奎律髓

王安國

安國字平甫。安禮弟。神宗召試。賜第。爲祕閣校理。呂惠卿引連鄭俠獄。奪官。卒。有集。

耆舊續聞。熙寧中。高麗遣使入貢。且求王平甫學士京師題詠。有旨令權知開封府元厚之內

翰抄錄以賜。厚之自詣平甫。求新著。平甫以詩戲之曰。誰使詩仙來鳳沼。欲傳賈客過雞林。

題滕王閣

滕王平昔好追遊。高閣依然枕碧流。勝地幾經興廢事。夕陽偏照古今愁。城中樹密千家市。天際人歸一葉舟。極目滄波吟不盡。西山重疊亂雲浮。

能改齋漫錄王

平甫年十三作

記夢

萬頃波濤木葉飛。笙簫宮殿號靈芝。揮毫不似人間世。長樂鐘聲夢覺時。

冷齋夜話王平甫熙寧癸丑歲直宿崇文院夢有邀之至海上見海水中宮殿甚盛其中作樂笙簫鼓吹之妓甚衆題其名曰靈芝宮邀之者欲俱往有人在宮側隔水謂曰時未至且令去他日當迎之至此恍惚夢覺時禁中已鳴鐘平甫頗自負不凡

為詩

記之

杭州呈勝之

遊覽須知此地佳。紛紛人物敵京華。林巒臘雪千家水。城郭春風二月花。彩舫笙歌吹落日。畫樓燈燭映殘霞。如君援筆宜摹寫。付與塵埃北客誇。

瀛奎律髓云此平

甫作誤入荆公集

西湖春日 日瑄按以下二首誤入林逋集

爭得才如杜牧之。試來湖上輒題詩。春煙寺院敲茶鼓。夕照樓臺卓酒旗。濃吐雜芳薰蠟燭。溼飛雙翠破漣漪。人間幸有蓑兼笠。且上漁舟作釣師。

春陰

似雨非晴意思深。宿醒牽率臥重衾。苦憐燕子寒相並。生怕梨花晚不禁。薄薄簾帷欺欲透。遙遙歌管壓來沈。北園南陌狂無數。祇有芳菲會此心。以上瀛奎律髓

句

海鵬未擊三千里。天馬須歸十二閑。茗溪漁隱叢話風暄翠幕春沾酒。露溼筠籠夜賣花。洛中聞見前錄

當時徐氏擅筆墨。夜圍夢墮空中筵。

金玉詩話王師弔伐江左城破或夢夬角女子行空中以巨篚篚物散落如豆著地皆成人問其故曰此當死於難者後見貴人盛冠服繼墮于地云此徐舍人也既寤聞徐錯死圍城中王文公兄弟在金陵和王微之哲登高齋詩押篚字平甫有句云

云此事奇譎而風曲強韻中可謂搏虎手也

官殿影搖河漢外。江湖夢斷曉鐘邊。館中題壁忽吟佳句詩驅暑。遠勝前人檄愈風。病中答蘇子容九月清霜

送陶令。千年白日見滕公。王繹學士挽詩以上隱居詩話

沈遼

遼字睿達。錢唐人。遯弟用兄。任監壽州酒稅。熙寧中。以太常寺奉禮郎。監杭州軍資庫轉運使。攝華亭縣。他使者以夙憾文致其罪。下獄。奪官。流永州。徙池州。有雲巢編。

揮塵餘話。遼尤工翰墨。登科之後。遊京師。偶爲人書扇帶詞。頗

不典。流傳達于宮禁。近幸嬪御服之。遂塵乙覽。後削籍爲民。

奉陪穎叔賦鎖院牡丹

昔年曾出洛城中。玉腕金盤深淺紅。行上荆溪溪畔寺。愧將白髮對東風。

池陽

寒煙寂寂鎖青谿。圓月亭亭上曲隄。小杜風情遙可想。閑調絲竹舞金泥。

陸機宅

朝日欲出已復西。人閒興廢那可知。崑山陵谷久已變。水傍惟有將軍碑。

龜茲舞

龜茲舞。龜茲舞。始自漢時入樂府。世上雖傳此樂名。不知此樂猶傳否。黃扉朱邸晝無事。美人親尋教坊譜。衣冠盡得畫圖看。樂器多因西域取。紅綠裯結坐後部。長笛短簫形製古。雞婁楷鼓舊所識。饒貝流蘇分白羽。玉顏二女高髻花。孔雀羅衫金畫縷。紅鞞玉帶踏筵出。初驚翔鸞下元圃。中有一人奏羯鼓。頭如山兮手如雨。其閒曲調雜晉楚。歌詞至今傳晉語。須臾曲罷立前廡。歎息平生未嘗覩。清都閨苑昔有夢。寂寞如今在何所。我家家住滄海涯。上國樂事殊未知。玉顏邀我索題詩。它時有夢與誰期。以上雲巢編。

王欽臣

欽臣字仲至。洙之子。用蔭入官。文彥博薦試學士院。賜進士及第。歷集賢殿修撰。知和州。徙饒州。斥提舉太平觀。徽宗立。復待制。知成德軍。卒。入黨籍。有廣諷味集。

宿華岳觀

凌空老樹雲垂葉。壓屋梨花雪照人。深愧地仙教俗客。慙慙留看華山春。

再題華岳觀

石壇流水共蒼苔。青竹林閒一徑開。可惜梨花飛已盡。前年遊客始重來。以上江鄰幾雜志。

召試學士院試罷作

翠木陰陰白玉堂。老來方此試文章。日斜奏罷長楊賦。閑拂塵埃看畫牆。

西清詩話。制公見之甚歎賞。為改作。

奏賦長楊罷。且云詩家語如此乃健。

戲書長老院

蜀國相如最好詞。武皇深恨不同時。凌雲賦罷還無事。寂寞文園興可知。

能改齋漫錄。熙寧中。王仲至自河北被召用。荆公薦對。神宗問所與遊從。公奏宋

敏求帝默然。遣任公因留一詩書長老院中云云。荆公愛其詩。自題於所執扇。

與秦少遊于恭敏李公燕閑堂聯句

黃葉山頭初帶雪。綠波尊酒暫回春。王已聞璧月瓊枝句。更著朝雲暮雨人。秦老愧紅妝翻曲妙。喜逢佳客放懷新。王天明又出桃源去。仙境何時再問津。秦能改齋漫錄

次韻蘇子由詠李伯時所藏韓幹馬

天閑不遇頭亦垂。真姓本不求青絲。由來奇骨類奇士。立見俱似囊中錐。鳳頭初踏蔥嶺至。繡膊東由青海馳。春風宛轉白玉鐙。晚日照耀黃金羈。李侯對此意匠發。造物真比毫端奇。方郵之相豈可擬。顛倒未免雄稱雌。翰林相繼寫高韻。何止羊何共和之。玉花照夜古稱美。顏色乃是論其皮。固知神駿不易寫。心與道合方能知。文章書畫固一理。不見摩詰前身應畫師。聲畫集

使遼回謁恭敏李公席上作

穹廬三月已淹留。白雪黃雲見卽愁。滿袖塵埃何處洗。李家池上海棠洲。詩人玉屑

遊王官谷

鐘鼎山林出處明。中間不合枉高情。有錢須買王官谷。流水聲中過一生。王官谷集

安燾

燾字厚卿。開封人。舉進士。神宗朝。歷官同知樞密院事。哲宗朝。拜門下侍郎。落職。知大名府。徽宗朝。知河南。降祁州團練副使。還洛。卒。入元祐黨籍。

重題江干初雪圖

事詳韓忠彥詩下

曾遊滄海困驚瀾。晚涉風波路更難。從此江湖無限景。不如祇向畫圖看。石林詩話

韓忠彥

忠彥字師朴。琦子。以父任為將作監。復舉進士。元祐中。同知樞密院事。徽宗朝。進左僕射兼門下侍郎。封儀國公。謫磁州團練副使。致仕。卒。入元祐黨籍。

題江干初雪圖

諸公當日聚巖廊。半謫南荒半已亡。唯有紫樞黃閣老。再開圖畫看瀟湘。

石林詩話。江干初雪圖真蹟。藏李邦直家。唐蠟紙本。世傳王摩詰所作。元豐間。王禹玉、蔡持正、韓玉汝、章子厚、王和甫、張邃明、安厚卿七人題詩。建中靖國元年。韓師朴相。邦直厚卿同在二府。時前七人者。所存惟厚卿而已。持正貶死嶺外。禹玉追貶子厚。方貶。玉汝和甫。邃明則死久矣。故師朴題其後云云。紫樞黃閣。謂邦直在門下。厚卿在西府也。厚卿復題。邦直亦自題云。

駕幸太學

恢崇儒教頓生光。天子親來幸上庠。星弁煌煌環帝座。霜袍密密綴周行。廟祠稽首尊先聖。書義終篇勸嗣王。學道深慙非入室。此辰榮事亦升堂。中州題咏集

許遵

遵字仲塗。泗州人。第進士。熙寧間。判大理。出知潤州。提舉崇福宮。

遊風水洞

水洞連風洞。精藍兩洞前。山高易藏日。樹老不知年。板有華宗什。名留少傅篇。煙波門外境。寂寞變桑田。

沈立

立字立之。歷陽人。舉進士。歷江淮發運使。知越杭二州。

英韶在前徒矜下里之曲。風雅未喪。豈繫擊轅之音。不圖綴綺靡之辭。抑將導敦厚之旨耳。海棠雖盛於蜀人。不甚貴。因暇偶成五言百韻律詩一章。知我者無加焉。

岷蜀地千里。海棠花獨妍。萬株佳麗國。二月豔陽天。叢萼勻如布。脩蕤巧似編。彤雲輕點綴。赤玉碎雕鐫。瑟瑟光輸瑩。猩猩血借鮮。淺深相向背。疎密遞句牽。輕倩重重染。丹砂細細研。蕊纖金粟拱。鬚嫩紫絲拳。紅蠟隨英滴。明璣著穎穿。初莖爭袅娜。翹幹共蹁躚。絕代知無價。生香不減籛。分靈應桂苑。鍾粹定星躔。木帝經邦相。花王入室賢。祥飈如剪拂。卿靄共陶甄。真宰陰推轂。句芒與著鞭。不須憂薄命。好爲惜流年。贊翼施生柄。扶持煦嫗權。主張韶令正。調燮淑威宣。和氣高低洽。芳心次第還。金釵人十二。珠履客三千。雲南迷巫峽。風波怒洛川。娉婷宜住楚。妖冶合居燕。繡被通層展。華燈徹曙燃。橫披前檻外。半出假山巔。暗羨遊蜂採。偷輸蟻穴沿。瘦嫌□網織。柔怯女羅纏。蓄恨憑誰訊。無言只自憐。文君酒壚畔。揚子草堂前。品格生來別。風流到老全。繁中生悵望。衆裏見喧闐。暄暖精神出。清明意態便。關關鶯對語。兩兩燕高鶩。天上宜封殖。人間偶佇延。共櫻圍別館。與杏擁斜阡。清暖簾爭卷。黃昏幕尙褰。低籠金轆轤。高暎畫秋千。忽認梁園妓。深疑閬苑仙。怱怱來蕙圃。遠遠別芝田。羞隱冥濛霧。輕如淡蕩煙。乍逢開羽扇。初喜下雲輶。彷彿同星鬢。依稀帶翠鈿。五銖衣宛轉。七寶帳翩翾。獨立挨霓節。成行列彩旃。困宜敲虎枕。步好襯金蓮。

舞定休迴袖。糝濃不傅鉛。蓋張松鬱鬱。茵藉草芊芊。馥郁蘭供夢。扶蘇柳伴眠。軀輕彌綽約。腰細更便嬛。
姪姪常顛若。幽柔自灑然。侍兒羅白芷。婢子列芳荃。口口濃檀注。腮腮薄粉填。解圍施葉幄。買笑有榆錢。
旖旎環瑤席。婆娑市玳筵。嬌依屏曲曲。泣對露涓涓。南陌輕埃蔽。東郊夕照連。幾時休縹緲。從此識嬋娟。
是處遺簪珥。誰家不管弦。妒姬貪恐失。戲穉惜何顛。折閃搔頭褪。擎攏約腕揎。戴遮鬢上鳳。裝壓鬢邊蟬。
汲引新懽聚。消磨忽忿蠲。縱觀須倒載。命宴必加籩。翻曲教歌媛。更詞送酒船。鄉心須暫解。病眼當時痊。
迢遰來油壁。從容住錦韉。雅宜交讓比。穠與棗華聯。不憤參朱槿。寧甘混木棉。醲醲潛失色。躑躅敢差肩。
素柰思投迹。天桃恥借員。梧桐愧金井。芍藥濫花磚。併壓辛夷俗。潛排寶馬薦。天恩無久恃。人寵莫長專。
布影交三徑。敷榮徧一廛。凝眸方曄曄。回首旋翩翩。可忍驚鸞挫。胡煩急景煎。珊瑚隨手碎。絳雪繞枝旋。
拂漢霞初散。當樓月自圓。飄零隨蠛蠓。散亂逐漪漣。灼灼龜城外。亭亭錦水邊。抱愁應慘蹙。有淚卽潺湲。
午隱迷蝴蝶。朝寒怨杜鵑。物情元倚伏。人意莫拘攣。擢秀高羣木。稱珍極八埏。未開獨脈脈。憂落固悁悁。
別著新文紀。重尋舊譜箋。共知紅豔好。誰辨赤心堅。實合陪朱李。根宜灌醴泉。栽須憐竹柏。樹莫繞烏鳶。
恥託膏腴茂。當隨富貴遷。爲多猶底滯。因遠尙迍邐。客思易成亂。心期未省愆。畫思摩詰筆。吟稱薛濤牋。
醉目休頻送。詩情豈易緣。薛能誇麗句。鄭谷賞佳篇。止感芳姿美。那憐託地偏。山經獨罕記。方志未多傳。
巧詠憂才竭。冥搜得意□。遐陬寡真賞。僻境忍輕捐。抽祕慙非據。探奇敢讓先。援毫敍名卉。聊用放懷焉。

海棠譜

張舜民

舜民字芸叟。邠州人。第進士。元祐初。除監察御史。徽宗朝。爲吏部侍郎。以龍圖閣待制知同州。坐元祐黨。貶商州。卒。高宗追贈寶文閣直學士。自號浮休居士。又號訂齋。娶陳師道之姊。有畫墁集。

畫繼芸叟生平嗜畫。題評精確。雖南遷羈旅中。每所經從。必搜

訪題識。東南士大夫家所藏名品。悉載錄中。亦能自作山水。

郡齋讀書志。芸叟爲文。豪重有理致。最刻意於詩。晚好樂府。百餘篇。自序云。年踰耳順。方敢言詩。百世之後。必有知音者。

孫公談圃。張芸叟謫郴州稅。郴多碧蓮。根大

如盃。張嘗以墨印于詩藥上。以詫北人也。

西征回途中二絕

靈州城下千枝柳。總被官軍斫作薪。他日玉關歸去路。將何攀折贈行人。
青銅峽裏韋煙路。十去從軍九不回。白骨似沙沙似雪。將軍休上望鄉臺。

東坡題跋。舜民通練西事。從高遵裕西征。回途中作二絕云云。爲轉運判官李蔡所奏。貶郴州監稅。舜民言。官軍圍靈武不下。糧盡而退。西人從城上呼官軍。漢人兀擦否。或仰而答曰。兀擦。城上皆大笑。西人謂慙爲兀擦也。

自題畫扇

忽忽南遷不記年。二妃祠外橘洲前。眼昏筆戰誰能畫。無柰霜紈似月圓。

鄧正字宅見劉明復所畫麓山秋景

洛陽才子見長沙。自識中丹鬢未華。文武才全皆不試。丹青筆妙更誰加。老杉列在皇堂上。小景將歸學士家。我有故山常自寫。免教魂夢落天涯。

題薛判官秋溪煙竹

深墨畫竹竹明白。淡墨畫竹竹帶煙。高堂忽爾開數幅。半隱半見如自然。

贈山人張無惑

善畫山水

西征已度故關山。秋雨零零路屈盤。受盡艱辛心不足。解程又展畫圖看。以上畫繼

京兆安汾叟赴辟臨洮幕府南舒李君自畫陽關圖并詩以送行浮休居士爲繼其後

古人送行贈以言。李君送人兼以畫。自寫陽關萬里情。奉送安西從辟者。澄心古紙白如銀。筆墨輕清意瀟灑。短亭離筵列歌舞。亭亭誼誼簇車馬。溪邊一叟靜垂綸。橋畔俄逢雨負薪。掣臂蒼鷹隨獵犬。聳耳駢驢扶隻輪。長安陌上多豪俠。正值春風三二月。分明朝雨浥輕塵。客舍青青柳色新。主人舉杯苦勸客。道是西征無故人。殷勤一曲歌者闋。歌者背淚霑羅巾。酒闌童僕各辭親。結束韜縠意氣振。穉子牽衣老人哭。道上行客皆酸辛。唯有溪邊釣魚叟。寂寂投竿如不聞。李君此畫何容易。畫出漁樵有深意。爲道世閒離別人。若箇不因名與利。紅蓮幕府盡奇才。家近南山紫翠堆。烜赫朱門當巷陌。潺湲流水遶亭臺。當軒怪石人稀見。夾道長松手自栽。靜鎖園林鶯對語。密穿堂戶燕驚迴。試問主翁在何所。近向安西幕府開。歌舞教成頭已白。功名未立老相催。西山東國不我與。造父王良安在哉。已卜買田箕嶺下。更看築室潁河隈。憑君傳語王摩詰。畫箇陶潛歸去來。聲畫集

紈扇

紈扇本招風。曾將熱時用。秋來挂壁上。卻被風吹動。蒙齋筆談。

感時事戲作

少年辛苦校蟲魚。晚歲雕蟲恥壯夫。自是諸生猶習氣。果然紫詔盡驅除。酒閒李賀皆投筆。地下班揚亦引車。唯有少陵頑鈍叟。靜中吟撚白髭鬚。

韻語陽秋。熙寧四年。荆公預政。罷詩賦。專以經義取士。元祐五年。復用詩賦。紹聖初。以詩賦為元祐學術。復罷之。政和中。遂著于令。士庶傳習詩賦者。杖一百。畏謹者。至不敢作。故芸叟感而賦此。

真州儀真觀

聞說仙鄉接一作即瀨鄉。閑遊詩侶禮虛皇。三潮寶派通胥浦。萬葉靈杉蔽蜀岡。天地杳冥供寫像。江山迴合助靈祥。五雲送入蓬萊島。留與人閒作道場。

古今詩話。揚州揚子縣。古白沙鎮也。祥符中。丁晉公鑄聖祖天尊像。遂為真州。有儀真觀。觀西一水。縈迴南入大江。號曰胥浦。一日三潮。俗云子胥解劍之所。觀之記載。使者以像在舟。日方午。潮水忽至。今有午潮。張芸叟詩云云。

和喻明仲馬上吹笛

越客思歸黯不平。閑持長笛寫秦聲。羨君氣海如斯壯。博我詞鋒孰敢爭。江上梅花開又落。隴頭流水咽還驚。豈知不寐鰓魚眼。獨坐山堂對月明。

墨莊漫錄。喻陟明仲睦州人。持節數部。政績藹著。雅善散隸。尤妙長笛。每行按至山水佳處。馬上臨風。快作數弄。嘗有馬上吹笛詩寄芸叟。芸叟和之云云。

東坡先生哀詞并序

我守中山。乃公舊國。雪浪蕭齋。於焉食宿。俯察履綦。仰看梁木。思賢閱古。皆經貶逐。玉井芙蓉。一切牽復云云。

石與人俱貶。人亡石尚存。卻憐堅重質。不減浪花痕。滿酌中山酒。重添丈八盆。公兮不歸北。萬里一招魂。
思賢閱古皆中山後圃堂名。

墨莊漫錄。東坡帥中山。得黑石白脈。如孫知微所畫石閒奔流。盡水之變。作白石大盆以盛之。激水其上。名其室曰雪浪齋。公自銘云。玉井芙蓉丈八盆。伏流飛空激其根。時有英州之命。後謫惠州。又徙海外。故中山後政以公遷謫。雪浪之名遂廢。元符中。始被北歸之命。將至吳中。張芸叟守中山。葺治雪浪齋。重安盆石。方欲作詩寄公。聞公之薨。乃作哀詞云云。

題木居士

波穿火透本無奇。初見潮州刺史詩。當日老翁終不免。後來居士欲奚為。山中雷雨誰宜主。水底蛟龍睡不知。若使天年俱自遂。如今已復長孫枝。

墨莊漫錄。退之所題木居士。在今衡州耒陽縣鰲口寺。元豐初年旱暵。禱之不應。縣令析而焚之。僧道符更刻木為形。以事芸叟。南遷郴州。過而見之。題詩於壁。

戲作

芝蘭雖好忌當門。何況庭前惡土墩。畚鍤纔興雙劍出。狐狸盡去老松蹲。百年守冢真堪笑。一日開軒亦可尊。安得擲從天外去。成都石筍至今存。

墨莊漫錄。衢州廳事下。舊有土勢隆起。篠木叢生。相傳云古冢也。舊有碑。其文曰。五百年刺史為吾守墓。以此前後相承。皆畏而不敢慢。紹聖元年。齊安孫賁公素為守。問之左右。以是對公命毀去之。官吏大恐。闔府叩頭以諫。公曰。藉令土中有賢者骨。當以禮法遷之。乃為文自祭而除之。斷深丈餘。了無他異。但有二石峯。長五六尺。堅瘦清潤。又有大木之根蟠踞其下。羣疑遂定。石上有刻云。乾符五年五月三日。安于此。押衙徐諷龍山起此石處得二石。刺史季□題。又刻云。開寶七年。重疊峨嵋山於廳事前。于郡齋文會閣。移季公之石。安置于此。刺史慎知禮題。時公素方修州治南韶光園。重建清冷堂。堂成乃移二石于堂下。名曰雙石。嗟乎。慎公移石去季公之得石。凡九十七年。公素之破疑冢出石去。慎公又一百二十一年。物之顯晦。抑自有數。第不知峨嵋之廢。乃冒冢之名。自何時也。公素一旦戲笑為之。遂釋千百年之惑。張芸叟有詩云云。公素可謂剛毅正直。自信之君子也。

過魏文貞公舊莊

破屋居人少。柴門春草長。兒童不識字。耕稼鄭公莊。老學菴筆記。

宣赦詩

擊鼓填街道。傳聲過水濱。國嚴三歲祀。恩洗萬方春。舟楫隨南斗。衣冠拱北辰。嶺南并嶺北。多少望歸人。

侯鯖錄。紹聖中。芸叟入黨籍。繫潭州。

赦書中獨元祐人不赦。為詩云云。

九日

一見黃花只自羞。蕭然短髮不禁秋。誰人爲整烏紗帽。獨倚西風滿眼愁。合璧事類前集。

次長蘆

炎荒往返正三年。重過長蘆古寺前。萬里風波行欲盡。停橈南望一潯然。輿地紀勝。

賜資治通鑑呈范淳父學士

通鑑初成賜近臣。不遺疎賤布恩均。我投淮水五千里。君滯周南二十春。東觀汗青身是夢。西宮削槩事如新。細思當日修書者。祇有三人今一人。

菊坡叢話。治平中英宗患歷代史繁多難見。令司馬溫公編進君臣事蹟。請置局辟官。薦劉道原。劉貢父。又辟范淳父在局。書成進上。神宗賜名資治通鑑。元豐末。進五代記。遷公資政殿學士。除淳父祕書省正字。爲賞。時道原已死。貢父方貶官衡州也。

元祐初。溫公還朝。作門下侍郎。用宰相蔡持正劄子。付下國子監開板。令溫公門下士及館職

校讎之板成。徧賜宰執侍從及校讎官。各以表謝。張芸叟詩云云。三人謂貢父。道原。淳父也。

打麥

打麥打麥彭彭魄魄。聲在山南應山北。四月太陽出東北。纔離海嶠麥尙青。轉到天心麥已熟。鷓旦催人夜不眠。竹雞叫雨雲如墨。大婦腰鎌出小婦。具筐逐上壠。先搯青。下壠已成束。田家以苦乃爲樂。敢憚頭枯面焦黑。貴人薦廟已嘗新。酒醴雍容會所親。曲終厭飫勞僮僕。豈信田家未入脣。盡將精好輸公賦。次把升斗求市人。麥秋正急又秧禾。豐歲自少凶歲多。田家辛苦可柰何。將此打麥詞。兼作插禾歌。

醱醱

冰肌雪豔映殘春。燠日薰風入四鄰。任是主人能愛惜。也撿一半與游人。

眞珠花

風中的礫月中看。解作人閒五月寒。一似漢宮梳洗了。玉瓏璫壓翠雲□。以上 淵鑑類函。

板子磯

石上紅花低照水。山頭綠篠細含煙。天生一本徐熙畫。祇欠鷓鴣相對眠。太平府志。

離眞州

日日北風吹上水。年年客思攪新秋。山長水遠連三楚。物態人情又一州。隔岸晚峯如見揖。並船孤鷺似相留。因知景略非前達。身後猶須具十牛。揚州府志。

陶弼

弼字商翁。永州祁陽人。以功授陽朔縣主簿。歷官知邕州。招納諸蠻有功。四遷爲東上閣門使。康州團練使有集。

送趙樞寺丞宰虔化縣

路入虔雲去。如何輕解攜。人煙五嶺北。星斗大江西。暖雪梅花樹。晴雷贛石溪。青衫欲無淚。不柰鷓鴣啼。

出嶺題石灰鋪

馬度嚴關口。生歸喜復嗟。天文離卷舌。人影背含沙。江勢一再曲。梅梢三四花。登高休問路。雲際是吾家。

登崑崙臺

落照古城隅。邊風動隼旟。久閑忘戰略。多病熟醫書。白髮隨年短。新情與世疎。桃花春水起。還釣舊溪魚。

天涯亭

雨色絲絲風色驕。天涯亭上覺魂消。一家生意付秋瘴。萬里歸心隨暮潮。兵送遠人還海界。吏申遷客入津橋。山公對此聊酣飲。怕見醒來兩鬢凋。以上陶邕州集。

寄蘇州徐處士弁弁能畫山水

平南無策鬢如霜。七十峯前舊隱鄉。相約祝融孤頂上。借君吟筆畫瀟湘。聲畫集。

賓州作

金鼓聲闌劍戟收。使君迴上雅歌樓。尊前一闋清商曲。消盡窮邊萬里愁。往歲傳聞南詔檄。近時方築伏波城。安城太守知邊計。菡萏花中閱水兵。

閣阜山

崇真宮在臨江新淦縣北。山形如閣。山色如阜。故名。道書云第二十福地。卽漢張道陵丁令威葛孝先修煉之地。

萬仞天門閣阜形。陰陽不似衆山青。一區海上神仙宅。數曲人閒水墨屏。華表鶴歸春谷響。玉京龍起夜潭腥。可憐張葛無人繼。三級高壇拂杳冥。

陽朔縣作

榕葉森森蓋縣衙。不離牀衽見煙霞。民耕紫芋爲朝食。僧煮黃藤代晚茶。瀑布聲中窺案牘。女蘿陰裏勸桑麻。欲知言偃弦歌處。水墨屏風數百家。以上方輿勝覽。

端硯贈王欲

端硯如池狀。潤疑雲雨通。粗官不識字。好去伴詩翁。硯箋

寄新沅守謝麟

險盡天開溪路平。詩書新將曲新城。三千戍卒今無幾。十萬屯田古未耕。屬縣乞除防虎檻。生蠻願獻採砂阬。從茲預擬風塵息。盡是仁威下旆旌。辰州府志

山茶

江南池館厭浮紅。零落山煙山雨中。卻是北人偏愛惜。數枝和雪上屏風。後村千家詩

詠藕

萬頃金沙裏。誰將玉節栽。絲應鮫乞與。津是蚌分來。盤貯冰猶結。刀侵雪易摧。防風骨外折。混沌竅中開。月寺僧家鉢。風亭酒客杯。胸中秋氣入。牙角雨聲回。自媿塵泥賤。得蒙尊俎陪。與君消酷暑。瓜李莫相猜。

蜨

暖翅玉羅薄。香鬢金線微。青春二三月。白日一雙飛。露重休深入。風高且暫歸。南園芳樹下。燕雀最多機。以上合璧事類別集

題柳州柑子堂柳子厚手植

子厚才名甲有唐。謫官分得荔支鄉。羅池水盡黃柑死。獨有穹碑在畫堂。錦繡萬花谷

黃陵廟

溪上龍蛇屋。蕭條帝子祠。竹痕當日淚。山色後人疑。仙服霞留綺。新妝月印眉。楚民亡水旱。簫鼓謝神禧。
粵西詩載。

句

雪山經夏冷。天馬入秋肥。塞上。陰微辨樵火。霽早誤僧鐘。行役。渴蜂銜硯水。飢蜨嗅餅花。順州。梟鳴社旁樹。盜發冢中金。鹿飲沙渾水。猿飢果落雲。將老未聞金作印。師寒猶用鐵爲衣。山險不能留霸業。水聲惟解送年華。道近可憐駑馬駿。時平不見布衣雄。以上後村詩話。

蒐兵四解降王縛。報國三登上將壇。觀曹武惠畫像。澗水燕談。

王令

令字逢原。廣陵人。王安石愛其才。因妻以吳夫人女弟。年二十八卒。有廣陵集。

韓幹馬

天寶天子盛天廡。吐番入馬上天壽。紫衣牧吏偏坐前。騎入金門不容驟。西極苜蓿爲誰肥。六閑飛黃臥嗟瘦。乾元殿下誰把筆。當年人無出幹右。傳聞三馬同日死。死魄到紙氣方就。鐵勒夾口重兩銜。墨絲卓尾合雙紐。天門未上人就觀。老胡驚嗟失開口。生搜朔野空毛羣。死斷世工無後手。當時天子惜不傳。送入御府置官守。胡塵勃鬱燕薊來。宮闕蕭騷旣聞後。誰拚千金出手收。足踏萬里避奔走。幾經蹂躪道邊塵。今日寧無紙上垢。尊前病客不識書。但驚骨氣世未有。冀北駿足無時無。生不逢幹死空朽。世工無手不寫休。往往氣骨陋如狗。

假山

鯨牙鯤鬣相摩捽。巨靈戲撮天凹突。舊山風老狂雲根。重湖凍脫秋波骨。我來謂怪非得真。醉揭碧海瞰蛟窟。不然禹鼎魑魅形。神顛鬼脇相撐揆。以上廣陵集

墨莊漫錄夏均父言此

詩奇險不蹈襲前人

文同

同字與可。梓潼人。自號笑笑先生。第進士。仕至太常博士。集賢校理。元豐初。出守湖州。行至宛丘驛。忽留不行。沐浴冠帶。正坐而逝。有丹淵集。

蘇東坡云。文與可畫竹。初不自貴重。四方之人。持縑素而請者。足相躡于門。與可厭之。投諸地而罵曰。吾將以為韉材。士大夫傳之。以為口實。及與可洋州還。而予為徐州。與可遺余書曰。近語士大夫。吾墨竹一派。近在彭城。可往求之。韉材當萃于子矣。

書尾復寫一詩。其略云。擬將一段鵝溪絹。掃取寒梢萬尺長。余謂與可竹長萬尺。當用絹二百五十匹。知公倦于筆硯。願得此絹而已。因答其詩曰。世閒那有千尋竹。月落空庭影許長。與可笑曰。蘇子辯則辯矣。然二百五十匹。吾將買田而歸老焉。

石林詩話。與可為人靖深。不嬰世故。熙寧初。時論既不一。士大夫好惡紛然。同在館閣。未嘗有所向背。時子瞻數上書。論天下事。退而與賓客亦多以時事為譏誚。同極以為不然。每苦口力戒之。子瞻出為杭州通判。同送行詩有北客若來休問事。西湖

雖好莫吟詩之句。及黃州之謫。

正坐杭州詩語。人以為知言。

退谷消夏錄。世傳道臻淨因禪師居都城隅三十年不出戶。無所嗜好。獨雪方丈四壁。請與可畫墨竹。謂人曰。若使遊人見之。心自清涼。此君蓋替我說法也。

秦王卷衣

咸陽秦王家。宮闕明曉霞。丹文映碧鏤。光采相鉤加。銅螭逐銀霓。壓屋驚蟠拏。洞戶鎖日月。其中光景賒。春風動珠箔。鸞額金窠斜。美人卻扇坐。羞落庭下花。閑弄玉指環。輕冰扼紅牙。君王顧之笑。為駐七寶車。自卷金縷衣。龍鸞蔚紛葩。持以贈所愛。結歡期無涯。

容齋四筆云。語意深入騷人闕域。

王昭君

絕豔生殊域。芳年入內庭。誰知金屋寵。只是信丹青。幾歲後宮塵。今朝絕國春。君王重恩信。不欲遣他人。極目胡沙遠。傷心漢月圓。一生埋沒恨。長入四條弦。

容齋四筆云。令人讀之縹緲。然感慨無已。

新晴山月

高松漏疎月。落影如畫地。徘徊愛其下。夜久不能寐。怯風池荷卷。病雨山果墜。誰伴予苦吟。滿林啼絡緯。

春閨

枕帶縈春意。窗紗漏曉光。蠅蛸傷遠別。鶻鴂感流芳。妝匣蒸殘粉。熏爐滅舊香。洞房燈燭外。只有夢悠揚。

避雨竹閒點點。迎風柳下翩翩。靜依寒蓼如畫。獨立晴沙可憐。以上丹淵集。

咏鷺

娛書堂詩話

云清拔可喜。

題上清宮壁

天氣陰陰別作寒。夕陽林下動歸鞍。忽聞人報後山雪。更上上清宮上看。老學菴筆記。

錢總

總字穆父。易之孫。彥遠之子。居崇德州錢里。以從父明逸任。元祐初。歷龍圖閣直學士。知開封府。拜翰林學士。出知池州。入元祐黨籍。

宋史本傳。總知開封。臨事益精。蘇軾乘其据案時遺之詩。總掃筆立就以報。軾曰。電掃訟庭。響答詩筒。近所未見也。

老學庵筆記。錢穆父風姿甚美。有九子。都下九子母祠。作一巾紵美丈夫。坐于西偏。俗以爲九子母之夫。都下謂穆父爲九子母夫。東坡贈詩云。九子羨君門戶壯。蓋戲之也。

以米二碩送秦少游作二十八字

儒館優賢蓋取頤。校讐尤自困朝飢。西鄰為祿無多少。希薄才堪作淖糜。王直方詩話。

和閣老舍人曝書會

天祿圖書府。芸籤歲曝頻。幡經窮藏室。賜會集儒紳。顧陸高標好。鍾王妙入神。可無鉛槧史。來預石渠賓。
事文類聚後集。

送奉使鈴轄高侯之任成都

烈士由來不徇名。西南萬里不留行。熊羆調整屯千計。尊俎雍容鎮百城。闔外使華新報聘。山西家法舊論兵。封侯富貴須由命。請訪沈冥賣卜生。
合璧事類後集。

和辨才法師新亭初成詩韻

幻泡昧空色。真夢遊黃丘。宦學類狂走。爾來三十秋。齒髮非他時。歲月不我留。古刹插亂石。蟄龍蟠霞湫。天人大導師。駐錫今白頭。安住差護念。晚節非沈浮。昔嘗謂出處。未用相劣優。權術分一智。股肱均九流。今知擾擾者。詎得逍遙遊。從茲許禮足。尚可治幽憂。
天竺寺志。

劉淑

淑神宗朝。以朝請大夫守蘇州。

題虎丘

袞席頻虛未賜環。遊心暫寄水雲閒。霓旌初下姑蘇苑。蠟屐先尋虎阜山。高興不辭溪路險。幽情更羨野僧閑。留連景物慵回首。畫舫寒侵暮角還。
虎丘志。

王仲敏

次劉公遊虎丘韻

松陰嵐影翠回環。盡在牆垣繚繞閒。舟楫更無通別浦。煙霞曾不接他山。詩亡石在雲徒恨。劍去池荒水自閑。偷得公餘來一餉。遙城鐘鼓出催還。虎丘志

崔靜

遊桂林伏波巖和章提刑峴

古木纏溪出老根。四時香火廟空存。人家曉聚鳧鴨亂。水怪夜翻星斗渾。靈洞仙游雲自鎖。陰崖龍去石生痕。幸同軒從乘餘興。酣醉清時酒一樽。名勝志

葉祖洽

祖洽字敦禮。邵武人。熙寧庚戌進士第一。終集賢殿修撰。

句

已分桂葉爭雲路。不負榴花結露枝。

海錄碎事邵武郡庭有石榴一株。士人視結實之多少。以為登科之信。熙寧庚戌歲有雙實於本末者。又有附枝而雙實者。是歲葉祖洽上官均名在一二。何與均兄弟同榜。祖洽有句云云。

國家圖書館



004638214

